

*ASO LUA, 26 IANUARI 2016*

*Na tauaofia le Fono Aoao Faitulafono i le itula e 9:00 i le taeao e tusa ai ma Polokalame o Fonotaga a le Palemene 2014/2015.*

Tatalo.

**SAUNOAGA FAAFEILOAI A LE FOFOGA FETALAI**

**FOFOGA FETALAI:** Ou te faasilasila atu ua amataina nei Taulumaga a le Fono Aoao Faitulafono.

I le agaga lotu mauualalo, ou te manatu o lea ua maea ona tatou momoli lapapala o malo, o le tatou faasagi foi ma le faapolo i le Atua i lenei aso, ua tatou momoli laau i Fogaa, ma tatou faatagisia Lona alofa ma Lona agalelei ina ia mafai ona au ma i tatou i lenei taeao.

Ou te ofo alofa atu ma ou faatalofa atu i tulaga aloaia i le paia ma le mamalu mauualuga o le tatou Palemene i ona tulaga faalupe, ua toe aofaga potopoto le mamalu o sa ma faiga e masani ai lo tatou Maota, i lau Afioga i le Taitai o le Malo ma le paia mauualuga o lau Kapeneta, aemaise foi le afio o lau Afioga i le Taitai o le Itu Agai, ma sui usufono mamalu uma o le tatou Palemene i lenei aso.

O le viiga ma le faamanu e le faaitiitia o le agaga lotu mauualalo i le Atua ona ua toe taitai mai lo outou soifua manuia i lenei aso fou. Faafetai foi i le Atua o lo o i ai le talitonuga atoa o lo o manuia le tapuaiga a lo tatou atunuu, o lo o tapuai mai le paia aua Aiga ma latou Tama, o Tama ma o latou Aiga, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti. E faamuli ma le ai se tala aua le tapuaiga mau i o tatou Faafeagaiga taulagi i so o se fata faitaulaga, e talitonu o la outou tatalo o lo o ae manuia ai faiva o lau Palemene. Ua vaeseuga foi tatou te le mafuta, ona o le tele ma le anoanoai o tiute faatino o le tatou Malo, aemaise le tagata lava ia ma lana matafaioi fai, e le gata i totonu o tatou nuu ma afioaga i itumalo taitasi, aemaise o tatou aiga ma le va faafeagai ai i le faaauauina o tatou galuega mo le tautuaina o le tatou atunuu.

E avea foi lenei avanoa e ofo alofa ma faatalofa atu i tulaga aloaia i le tapuai mai o tatou aiga, o uo ma aumeamamae, e le mafai ona faagaloina lo tatou motu i Sasae, le paia i le faigamalo i lau Afioga i le Kovana Sili ma le Lutena Kovana, lau Afioga i le Peresetene, lau Afioga i le Fofoga Fetalai ma Maota o Sui. Ia o paia lava ia o Samoa na lua i le lauti na laulelei o Aiga, aua Sua ma le Vaifanua, o Fofoga ma Aitulagi, Saole ma Saleaumua ma le Launiu na Saelua, o Tama a le Manuatele ma Tootoo o le Faleula ma le Laau na Amotasi.

26 IANUARI 2016

### Saunoaga Faafeiloai a le Fofoga Fetalai

E faatalofa atu foi i so o se Tupu ma Ee ma tamalii ma failauga o le atunuu o lo o faatalofa mai i tafa e fia o lenei lalolagi, leaga o lea ua tatou i ai i faiga faatekonolosi ua maua uma, e oo foi i tatou Fonotaga i lenei taeao, ia o lo o faapena ona auina atu i upega o faamatalaga.

Ou te ofo alofa atu ma ou faatalofa atu i le paia o Samoa aoao i so o se vaega o lenei lalolagi o lo o faafofoga mai ma maua mai a tatou faasalalau o le tatou Maota Fono. Malo le tapuai, faafetai tatalo, faafetai i lo outou alofa tulai o lo o faapena ona agiga pea le alofa tunoa o lo o fai mai pea ia Samoa ma le matou taputapu ai i fanua i maota ma laoa.

O lenei taeao ou te manatu le paia e o le tatou Palemene, ia ua faliu nei le la i lona tauafafi. O le toe aso lenei o le toe aso nai Moamoa, tatou te tu i le too ma tepa i le ata i le tatou faigamalaga umi na tatou sau ai nei i lenei Paeaiga. Ou te manatu e le tau faailoaina, o le tatou Fono lenei ia o le Fono mulimuli lenei o lenei Paeaiga. E le mafai ai ona tatou faaitiitia le agaga faafetai i le Atua ua tatou taunuu mai i le siui o a tatou galuega o lenei Paeaiga i le alofa tunoa o le Atua na taitai mai ai lo outou soifua manuia ma lo outou soifua laulelei. E ui ina afemoe le malaga i nisi o Tulatoa o le tatou Palemene sa tatou mafuta faatasi ona o le malaga a le maliu ma le oti, ia ma nisi foi ua tatou le mafuta ona o nisi o fuafuaga faale-Tulafono, ae faafetai o lo o toatele le paia ma le mamalu o le tatou Maota, o lo o sasao mai e faai ai a tatou Fonotaga i lenei Palemene.

Ua outou silafia tulaga masani, ia o le tatou Tala o le Tupe Faaopoopo faai lenei. A mafaufau atu i le 10 i le 15 a tatou Tala o le Tupe, e aofia ai Tala Autu ma Tala o le Tupe Faaopoopo, masalo o le tatou toe galuega lenei ae tatou te le i taumavae. O le a fai le tatou Fono i le aso ma le talitonuga o le Aso Faraile o le a fai ai le tatou sauniga faapitoa, e faia ai le tatou Sauniga Lotu, ia ona taumavae ai lea ae alo le atunuu i le faiga filifiliga pei ona faatulagaina.

Ou te tatalo ma lou agaga faaaloalo i le paia o le tatou Maota Fono, ia sagai maia ai o le tai. Ou te manatu ma lou faamoemoe e le tau aoaia e Laupua Tamafaiga, o lo o ua i ina le uta a le faimea i ituaso faapenei, aua o lea ua ilovea ma iloa taiao i le tatou faigamalaga o lo o faafofoga mai e na filifilia i tatou. Na o le faamanu ma le faafetai, ia ona faasolo ai lea o taualumaga o Tala o le Tupe i mea masani, e i ai lou talitonuga e le umi. E lafo atu pea i tulaga masani ona o avanoa e tuuina atu i so o se sui usufono, e maua ai le avanoa e faasolo ai le tatou Tala o le Tupe.

Faafetai foi i lenei taeao ua tatou faatasi ma Faaululuga o le tatou Malo, aemaise o le paia maualuga o uaealesi faasalalau, faafetai foi i la outou tautua, e le na ma se laina, e tofu lava le tagata ma lana iumaea ma lana lafo. Ona ou talitonu lea, o auga na o aute e tatou te tau ai i manu pe a tatou pulupululima faatasi, e tasi le faafitiga o aleaga, ia manuia Samoa mo a taeao.

Ou te manatu o lea o le a faagasolo le tatou matagaluega i tulaga masani.

26 IANUARI 2016

### TUUINA ATU O LIPOTI A KOMITI FILIFILIA

*Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T.51(5).*

1. P.P.2015/2016 Nu.90, Lipoti a le Komiti o Tupe Maua ma Tupe Totogi i le Tala Faatatau Faaopoopo Muamua o Tupe 2015/2016.
2. P.P. 2015/2016 Nu. 91, Lipoti a le Komiti o Galuega, Tulafono Tumau, Maota Fono ma Mataupu tau Faiga Palota i le Lipoti o le Toe Iloiloga o Tulafono Tumau 2016.
3. P.P. 2015/2016 Nu. 92, Lipoti a le Komiti o Faafoega tau Pulega a le Malo i le P.P. 2015/2016 Nu. 61, Lipoti Faaletausaga a le Komisi o Galuega a le Malo mo le Tausaga Faaletupe 2013/2014.
4. P.P. 2015/2016 Nu. 93, Lipoti a le Komiti o Tupe Maua ma Tupe Totogi i le P.P. 2015/2016 Nu. 8, Faamatalaga tau Tupe a le Malo mo le Tausaga Faaletupe 2014.

### TULAFONO TAU FAAOFI O LE FAATATAUINA O TUPE FAAPOPOO (NU.1) 2015/2016 - felafolafoaiga i luga o le faitauga faalua

**FOFOGA FETALAI:** E tusa ai ma le Tulafono Tumau, o le a faagasolo nei loa felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2015/2016.

Ou te manatu a o le i tuuina atu le avanoa mo a tatou felafolafoaiga aemaise foi o saunoaga a sui usufono i le tatou Tala o le Tupe, ou te tapa lau Afioga i le Palemia mo lau Saunoaga Faaminisita.

**Susuga Hon TUILAEPA FATIALOFA AUUEA LUPESOLIAI NEIOTI AIONO SAILELE MALIELEGAOI (Palemia):** Lau Afioga i le Fofoga Fetalai ua vaeseuga foi ona tatou feiloai ma tolo ai le Fonotaga a le Palemene i le malologa umi sa feagai mai i tatou. Ma o lea foi la ua toe ae le Fono, ou te manatu ua tele ina galo upu o le lauga i lenei taimi ua tataua ona ou toe asiasi i ai, ina ia manino lelei le al fua na faataoto atu ai le tatou Tala o le Tupe. O lea foi ua maitau i lenei taeao ua e pa'i i paia aua le tapuaiga a Lana Afioga Mamalu, O Le Ao o le Malo, faapea foi le Sui o le Fono a Sui Tofia le Tafatolu o Pulega o Malo e faatau agai. Le paia lava e faasino i Aiga ma latou Tama, ia po o Tama foi ma o latou Aiga, o le mea lava e tasi, faapea le Usoga a Tumua ma Puleono i Salafai. Ua uma foi ona e pa'i aua le faafogafoga tapuai mai a o tatou uso, ae a le Faigamalo a Tutuila ma Manua, le paia lava e faasino i le Faleagafulu, Faatui ma Tootoo, tainane le tapuaiga mamalu a le Aufaigaluega paia a le Atua.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

O paia ia o le tatou atunuu o lea ua uma ona e faapai i ai, ma e ua ou manatu ai, sei ou toe asia lava se ata puupuu lava i le structure po o le faavae atoa o lo o faavae ai tatou Tala o le Tupe, ma o le faavae lenei, e le o se faavae fou, o le faavae ua leva, ma ou te taofi, o lo o nunu lava le toau i nisi o le mamalu o le Maota lenei ma a latou faasilasilaga e ono taitaiseseina ai le atunuu. O le pese a le EFKS, 'E le tupu fua mea faapena', o lea foi la e taua ai i le Tala o le Tupe. Ua tele taimi e fet t a'i ai le Palemene ma ou tutulai atu e toe faamalamalama le faataotoga o tatou Tala o le Tupe. E masani lava ona ou talanoa i le tasi faa-Roma (i), e manatua foi o le tasi faa-Roma (i), o le tasi lena tomai na maua i le lalolagi ina ua pulea le lalolagi e Roma o le faaaoga o le latou fuainumera, tasi faa-Roma (i), lua faa-Roma (ii), tolu faa-Roma (iii). Mulimuli ane, ona atagia ai lea, e sili atu ona atamamai le au-Arapi pe a oo i fuainumera e faigofie ai ona matau mea ma faitau, o lea la ua tatou alu ai i fuainumera faa-Arapi. O le tasi faa-Roma (i) la lea ou te talanoa atu ai i le Tala o le Tupe. A tilotilo i le tasi faa-Roma (i), se'i ane a outou pepa faamolemole, e le aoga e le malamalama outou pe a le se'i ane a outou pepa, aemaise lava le Itu Agai, leaga o le Tala o le Tupe o le Tala o le Tupe a le Malo.

A outou tilotilo i le faavae lea, tai pei uma lava o le tusiga o le ata o le fale, e tasi lava le ata a o lea e i ai uma lava mea uma. O le (i) faaroma la, o lea e i ai uma lava le tala atoa o le tupe, le faavae atoa lea o le Tala o le Tupe, lea e faataoto atu ai ia tupe maua a le tatou Malo o fuafua ma le tausaga lale e faagasolo e faaiu i le aso mulimuli o Iuni. Na ou suia le tausaga lea faaletupe i le faaiuga o le 1989, na ou suia ai ina ia ogatasi le Tala o le Tupe a Samoa ma nisi o atunuu o lo o tele seleni o lo o tatou maua mai ai, ina ia faigofie ai ona tatou faamaumauina, faamau ma lesitala a latou tupe e aumai i fafo ona alu faatasi ai lava lea o tatou ma faafaigofie ai ia le tulaga o le faatulagana o tatou tupe ma seleni a latou e foai mai e amata ai a tatou atinae. O lea la o lo o taoto atu i i, o le faapuupuuga, o lo o amata le Tala o le Tupe lenei i le faitau o tatou tupe uma lava e maua. O ala ia sa tapena ai le Tala o le Tupe ina ia maioio mea uma aua ne'i i ai se mea e faanunumi ae ia i ai uma tatou tupe maua faapea foi ma tupe o foa. Ia aumai uma i luma o le Palemene e aumai e pasia atu e le Palemene lenei, ou te talitonu e le o se mea amiotonu le aumai na o tatou tupe ae le aumaia ia tupe foai. O i ina tonu lava e amio piopiopi ai se Malo pe a aumai na o ni tupe ae tuu nisi tupe i tua ona piopiopi ai lea o le Malo. O le ala lena i lalo o le Tulafono, o mea manino ia aumai uma lava tupe maua a tatou mai tulaga masani ma ia aumai foi ma tupe foai mai atunuu lea tatou te galulue faatasi i le atinae o Samoa. O lea la e faamatala auiliili atu i i i fuainumera nei le aofai o seleni lea e faatatauina e maua mai, e \$697miliona o lea o le a ou ta'uina atu na o miliona e faigofie .

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetala'i o le a le mea lea e fai?

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

**Susuga Hon TUILAEPFA FATIALOFA AUELUA LUPESOLIAI NEIOTI AIONO SAILELE MALIELEGAOI:** O le tautalaga faa-Palemia lea e fai atu, ua leva ona i totonu o le Maota isi sui usufono ae le malamalama i Tulafono Tumau. A o loo i le taimi e tautala ai se Minisita Faaminisita, se toe faalavelave ina ia malamalama le faafogafoga mai a le atunuu.

Lau Afioga i le Fofoga Fetalai o le tulaga lena lea e tau faamatalaina atu, \$697miliona le tupe lea e faagasolo ai le Malo ma ana atinae. Ia ona faatulaga loa lea faapea, a o lea toesea le seleni mo nisi lava mea faamuamua a le vaega o aitalafu ma nonogatupe lea e faaupu, o tupe alu faaletulafono. Aisea le mea e ala ai ona ta'u o tupe alu faatulafono? Ona o vaegatupe ia e i ai ona Tulafono e faavae ai ma o loo taa'i ai i totonu i i po o fusia ai i totonu i i ma ta'u ai le paia maualuga o Samoa i ona tulaga faalupe. O paia faale-Malo, paia faale-Ekalesia, paia faale-Atunuu lea e fusia atoa ai i totonu o le vaega lea e muamua lava. O lona uiga a o lea faia lava se isi mea ia muamua lava ona faatatau le vaegatupe mo tatou nonogatupe nei lea e aofia i totonu o vaegatupe nei faatulafono lea e \$102miliona ia ona totoe ai lea o le \$595miliona ma isi mea. A o le a la le taua o le mea lea? O le t ua o le mea ua ala ai ona ou manatu e faasolosologasue ia la'u faamalamalamaga i le faavae i le taeao leni ina ia manino ai ia i latou o perofeta vavalu pogisa lea o loo faia talaiga, o lea e alu le Malo e nono mai tupe e totogi ai nonogatupe. O le matu faavalevave o lena mau, ma e atagia ai ivi le l malamalama i le faavae o loo taoto ai ia le faavae o le Tala o le Tupe a le atunuu ma le Malo. O lea la ua uma ona aveese muamua lava le \$102miliona lena o tatou nonogatupe ona totoe lea o le \$595miliona. Silasila la lau Afioga, e leai lava se nonogatupe e toe faia o lea lava e lava le tupe na fuafua e le Matagaluega o Tupe e faaulu ai le tootoo o tina ia ma aumai ai le fautuaga i totonu o le Kapeneta ma talia e le Kapeneta.

Ia ona agai loa lea i le vaega lua ma le vaega tolu o le vaegatupe masani e faagaoioi ai le Malo, ia ma le 3% foi lea na saunoa autago mai ai le Taitai o le Itu Agai e ave e fai ai le faalavelave lea na tupu. A lea ua uma ona faatatauina, na tatou faatatauina mai i le Tala Autu o le Tupe i le masina o Iuni i le tausaga talu ai e faasoaso i lalo o Matagaluega taitasi ia le vaegatupe lea.

E tolu lava mea e faaalu ai, o le mea muamua o faalavelave faafuasei pei o Tsunami leaga o mea ia tatou te le iloa pei o Tsunami ma afa. E pei o timuga tetele foi nei na ave ai pusaoti o isi aiga i tai faatoa tatanu i le tausaga e 1989, mea faapena lea e faasoaso ai i totonu o Matagaluega. Ua uma la ona faatatau o le vaega muamua lena.

O le vaega lua, e faatupe ai atinae ua matu moomia vave lava e le Malo o atinae sa lea mafauina i le taimi sa fuafua ai le Tala Autu o le Tupe.

O le vaega tolu, e faaauau ai atinae ua toe moomia le tupe faaopoopo ona ua alu i luga le tau o oloa.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

O vaega ia e tolu lea na mafua ai ona faasoosoa le vaegatupe lea e 3% o vaegatupe atoa mai le Faavae lea la ua uma ona faasoa. E i ai la le manatu e tatau ona faamanino i i leaga e atagia mai i faasalalauga a le Taitai o le Itu Agai, o mea ua uma ona tatou talanoa ma pasi ae le malamalama. O lona uiga e ioe pogisa lava.

Lau Afioga i le Fofoga Fetalai, a uma uma mea uma, ona totoe ai loa lea o le \$93milion. O Malo uma lava o le Lalolagi o mea ia latou te taumafai e fai, ia i ai se seleni e faavagavaga mo le atinae. Aisea? Ona o le atinae e tupu ai le tamaoaiga ma tupu ai galuega mo fanau e fananau pea i aso uma aso uma, aua e le mafai ona tatou taofia le meaalofa a le Atua e liligi mai pea ia Samoa ina ia tupu pea le faitauaofai.

Lau Afioga i le Fofoga Fetalai, o le tulaga lena e naunau le Malo ia i ai lava se vaega e fuafua mo le atinae aua e uma loa i luga i le vaega lea o aitalafu ma le faagaioiga, ona leai loa lea o atinae e mafai ona fai ona le tupu ai lea o le tamaoaiga. O lea la ua alu alu mea ua uma ona totoe ai lea o le \$93milion o le atinae. O le \$93milion la lea lau Afioga i le Fofoga Fetalai lea ua totoe mai e fesoasoani i le atinae. A o le a le mea lea e aveatu i le Tala Faaopoopo o le Tupe? E le \$93milion le atinae ae \$189milion. O fea e sau ai le isi \$96milion? E sau mai i a tatou paaga ma faletupe e lagolago mai i le tatou faamoemoe, e sau i tuutuuga m m . E leai se faletupe faavalevlea e aumaia ni mea faapenei i se atunuu o faaletonu lona tamaoaiga. O lena foi e aveatu i le Tala o le Tupe aemaise lava le Tala o le Tupe Autu lena e ootoo atu ai ia le mea o lo o sau ai faaunegatupe nei.

A mataituina i le 2014 ma le 2015 na o lo o faataoto mai ai polokalame mo le atinae o Aoaoga faatupe mai e le ADP. E \$2.2milion amata mai i le 2014 uma i le 2015 ae leai se mea o aumaia mo le 2016. O lona uiga ua uma le atinae. Ae a oo mai loa i le polokalame mo le faaleleia o tulaga tau faatoaga ma lafumanu, o i ina la o lo o vaai i ai e \$4.5milion le tausaga talu ai ae \$4.9milion le tausaga lena. O le a le uiga o ia mea? O lona uiga o atinae faaauau e le faapea e tasi se tausaga e faatino ai le tele o atinae, e faamaonia lena upu i le tatou Falemai pe 4 ea pe 5 tausaga lea sa faagasolo ai ae tasi lava le nonogatupe na fai a o lea e talatala auaua mai e faatino ai le tatou atinae tamaoaiga. O totonu lava o faalapotopotoga nei tau tupe lau Afioga, se na o tagata e ma'ai fai'ai la i ai latou te malamalama lelei i le faagasologa o atinae a atunuu e le mafai, le mafai ona latou faamaumauina tupe i se atunuu o lo o soonafai a latou atinae. E iloa lelei aua la e i ai fua e fua ai ia mea faapenei, ma e na o le lua lava fua la e fua ai e Faalapotopotoga tai pei o le Faletupe o le Lalolagi ia le maualuga o le atinae ma le malosia o le totogi aitalafu. O le fua lea o tatou aitalafu i le tatou tupe maua po o le GDP, lea fai mai isi o aseta pei e foliga mai o ni ato talo ma ni ato esi. E le totogiina ni aitalafu i ni ato talo ma ni ato esi. O lea lava tatou te iloa i totonu o Samoa, a e alu e fai sau aitalafu e totogi i income e te maua tupe maua lava a oe ia. Ae a e alu atu ma se ato talo, a e le vave mai i fafo e ono toia oe i se talo e se pule o se faletupe.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

O le mea lea e faaoga, o lea e faaoga le Faletupe o le Lalolagi, income, GDP a tagata uma. E i ai lava auala faapitoa e galueaiina ai e i latou o lo o i ai le tomai e maua ai le tele o le tupe lea e taavili i totonu o le atunuu i le latou tupe maua. O le taimi nei lea e \$1.9piliona ae o le forecast po o le valoaga lea i ai a le Matagaluega o Tupe e tatau ona oʻo atu i le tausaga fou ua oʻo i le \$2piliona ma o lo o tupu pea. Aisea le mea e tupu ai? A le tupu leaga e \$189miliona le atinae.

Lau Afioga i le Fofoga Fetalai o le isi fua e fua ai le malosi o le totogi aitalafu, e fua i le tupe maua faaagaga mo le totogiina o aitalafu, foreign exchange earnings. O tupe maua mai i isi atunuu aemaise lea tatou te aeae nei i le tulaga o tagata asiasi maimoa mai, e tatau ona maua se \$400miliona i le taimi lea o fusuaga ia na fai nei lea na omai ai tagata e fia matamata i Samoa nei ma faalauiloa atu ai Samoa i le Lalolagi ma atili ai ona faatupu le agaga fia asiasi mai i Samoa ma tupu ai pea le mea lea. O le t u a o le fua lea ona e le totogiina i tatou tupe ia tatou aitalafu i fafo e totogi i tatou foreign cheque. O le taimi nei la e i le va o le \$300 ma le \$400miliona le tatou teugatupe lena i taimi uma, taimi uma, taimi uma. Ia 'aia ne'i toe oʻo tatou i le mea na i ai i tua atu a'o le'i tulai mai le Faigamalo leni. O le faaletonu ona o le l lava o ni tupe faaagaga mo fefaatauaiga.

Lau Afioga i le Fofoga Fetalai o le tulaga lena lea e ala ai ona fuafua tatau le tatou Malo i ana fuafuaga, o le mafuaaga foi lena na faatu ai e le Malo leni ia le Faletupe Tutotonu ia, na faatu i le faaiuga o le 1983 agai mai i le 1984, na faatu ina ia fai ma a latou galuega tumau le vaavaai ma autilotilo i auala eseese e mafai ai ona faaoga tatau ia tatou tupe faaagaga mo fefaatauaiga. O le mea la lea e le toe oʻo tatou i le tulaga sa i ai i la aso ae le'i tulai mai le HRPP o le faatali, faatali, faatali o se uta se tasi ua gaogaioi faleoloa ae taunuu mai pusaapa eleni ia e tau.... E i ai tagata na feoti ai i taufaoga araisa ma pusaapa ina onapo. Ua a nei o le a le mea lea ua vaai i ai? O le mea lea ua vaai ai nei ua tau le 'aina ia pusaapa i le tele o pusaapa lea ua i ai i le taimi leni, ua tau foi lele mo pusaapa fai faalavelave. A o na onapo ia sa tau fao ia aemaise foi le au faioloa i tua i le omai e tau suʻe se pusaapa se tasi. Ae talu nei ona tulai mai le HRPP, e le'i toe vaai le atunuu i lena mea. O le a le mea lea i ai? Ua le toe i ai ma se oge.

Lau Afioga i le Fofoga Fetalai mafua i se a? E mafua i le faataotoga o fuafuaga mamao, o le tagata e matau lelei mea, e vaai i le malamalama, ae le vaai ae faatauasoina pea, faalogo ae logonoa.

Lau Afioga i le Fofoga Fetalai, o le ala lena o lea ou te tulai atu ai i le taeao leni, seʻi faamanino mea ia. O lea ua tatou i ai foi i le taeao ma mea o tala fatu, tala faafefe tagata, lea e avatu le mea moni iinei i le Malo o lo o i ai mea uma iinei.

Lau Afioga i le Fofoga Fetalai, o le mafuaaga lena ua ou manatu ai i le taeao leni e lelei ona faamalamalama mea ia, leaga o le faapogisaina pea, e o sese ai tagata i latou faaiuga fai.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Lau Afioga i le Fofoga Fetalai, ia o le faamalamalama lena i tagata atoatoa lelei mafafau saʻo e le moomia ai ni fuefuesina e fofu ai. Lau Afioga i le Fofoga Fetalai, manuia le tatou Fono i leni taeao.

**FOFOGA FETALAI:** E momoli atu le faafetai i lau Afioga i le Taitai o le Malo, ou te taofi o lea ua logo faa-Tutuila le tatou Maota i leni taeao, ma ou te taofi foi o se tulaga ua sili ona talafeagai, ma ua tatau ona fai, aua o lea foi e maitau uma le Maota lea foi e tapuai Samoa i tulaga o faasalalaua o uaealesi faasalalau. Ia o lea ua manino ma malamalama le folasaga a lau Afioga i le Palemia. O le manulauti autu, ina ia malamalama le atunuu, e leai lava se isi mea e sili ona taua nai lo o lena, ne'i meaane ua le mautonu le tatou atunuu po o fea le saʻo? ae ou te taofi o le taeao leni, ua naʻo mea tautino ma faamaonia e aumai i le Maota. O lea lava sa maitau atu, le aumai avatu i luga o uaealesi faasalalau, ia o tala na o lea e fai i fafo atu, ae o mea faamaonia ma le tautinoga ina ia taatia i le agatonu faamalamalama ina ia manino ma malamalama le faafofoga mai a le atunuu, ia lea la ua i ai leni taeao. Ou te taofi foi ua avea lea ma faatomuaga lelei, aua o lea o le a tatou sagai atu e talanoa le Tala o le Tupe i a outou lauga faalauaitete. E agai tonu a outou saunoaga i le tatou tala o le tupe lea ua amata ona faataatia. Ae o le aotelega o le finagalo o le faamalamalama o le tatou Malo, ona o le itu e tatau lava ona faamalamalama, i tulaga lautele, ina ia manino ma malamalama le faafofoga mai a Samoa i tulaga masani, ina ia faataatia le al fua ina ia tatou maua uma le femalamalamaai, ia ma fai ai laia o le faaiuga amiotonu i finagalo o tagata. O lea ua saunoa le Taitai o le Malo e a ia le Tala o le Tupe, lea foi ua faafofoga le tatou Maota nei, ou te taofi e le o se fonu e umi tele. O le tatou Tala o le Tupe faaiʻu leni, o la e faafofoga ma tapuai mai lo tatou atunuu, ona ou taofi lea, o le a tatou talanoa faasolo.

O le avanoa leni, mo se sui usufono e saunoa i tulaga tau tupe mo le tamaoaga o Samoa e ala i faiga faavae tau tupe. Ia e faamanatu atu foi i sui usufono ua outou silafia e le tau toe fai atu i lo outou mamalu ua outou silafia saunoaga o taimi faapenei ia ma tausisia le tatou taimi e 30 minute. Ma le agaga faaaloalo ua avanoa le Maota mo se saunoaga a se sui usufono mamalu.

**Afioga Hon Palusalua Faapo II:** Lau Afioga i le Fofoga Fetalai ma le faaaloalo.....

**FOFOGA FETALAI:** Ia seʻi tulai mai lau Afioga i le Taitai o le Itu Agai.

**Afioga Hon Palusalua Faapo II:** Ou te faatu le lafo, *Ina ia faataoto le Saunoaga Faaminisita a le Afioga i le Palemia ina ia talanoaina vave nei a i le taimi leni o le tatou Paeaiga.* Aua e leai se aoga o ni saunoaga, ae le maua se avanoa, o lona uiga faatoa omai e o le Paeaiga fou talanoaina. Ae ou te faatu le lafo, ina ia faataoto ina ia lavea i saunoaga faalauaitete a sui usufono o le Maota. O le lafo lea lau Afioga.



26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

**FOFOGA FETALAI:** O lea ua faatuina le lafo, e i ai se isi e faatoluina? Ia seʻi tulai mai lau Afioga i le Palemia.

*E le i faahuaina le lafo.*

**Susuga Hon TUILAEPFA FATIALOFA AUELUA LUPESOLIAI NEIOTI AIONO SAILELE MALIELEGAOI:** Lau Afioga i le Fofoga Fetalai, o lea e leʻi aumaia le pepa i totonu, ae lea ua manao e talanoa, seʻi aumai le pepa, neʻi teʻi ua uma le Fono nanei ae leʻi aumaia lava le pepa.

**Afioga Hon Palusalua Faapo II:** Lau Afioga, e le tau aumaia se pepa, ua matua manino atoatoa lau saunoaga lau Afioga i le Palemia, pau le mea ia talia le lafo, e le tau faatalia se pepa lau Afioga. O le mea masani, e le faatalia i ni pepa le lafo.

**FOFOGA FETALAI:** E leʻi talia sau lafo, ma o le faamalamalama saʻo lena lea e fesili atu pe i ai se isi e faalua, ia ae fua i finagalo o le Maota. Ou te taofi, finagalo malie ia lau Afioga i le Taitai o le Itu Agai, ia ou te manatu o tatou faiga faavae o le lauga lea sa saunoa ai le Taitai o le atunuu, o le lauga faa-Minisita e toe faamanatu ai le tatou Tala o le Tupe, ae aumai ai ma faiga faavae masani o lo o agaga i ai e tusa ma le felafolafoaiga sa fai i fafo atu o le tatou Maota. Ia na ou manatu lea, ia malie ia, ou te talitonu lava o lea tatou te i luga o lauga faalauaitete, agai pea i le Tala o le Tupe aua o lauga faalauaitete e tiu talaloga. Ae tatou faapena ona fai, ou te talitonu seʻi i ai se taeao aena ona tatou seʻi lea i lea tulaga. Ia...

**Afioga Hon Aeau Peniamina Leavaiseeta (Falealupo):** Ia ua ou te tulai atu, leaga ua manaia le tatou taimi i le manaia o le lauga lea na uma, o le mea la lea, lea ou te fesiligia le mafuaaga ua mafua ai?

**FOFOGA FETALAI:** Aeau, ia malie, Aeau lea ou te taofi lea e te malamalama i le tulaga o taimi faapenei. Ou te lagona foi e le tatau ona toe saunoa se tama matua maimau le taimi, e pei lava ona ou faatalauula atu ma ou faaooloo maau, e leai se saunoaga soona faia i totonu o le tatou Maota. O lea e faapulapula ma faamalamalama le saveuga moa lea na fai i fafo atu o lenei fa masina. O lea la ua faamalamalama ma tali manino ma tali aloaia le Malo, la e faafofoga mai le atunuu. O lea tatou te agai e faapulapula ma aumai mea moni o le tala lea na outou faia i fafo atu o le Maota. E leai lava se isi mea e tatau ona faapulapula e tatau lava ona faapulapula e le Malo, leaga o lo o i ai e vaivai mafaufau e le mautonu. O lea la ua tali manino le Malo, lea ua i ai auga o aute o le taeao lenei, tatou sagai laia i le tatou Tala o le Tupe, ona manino ma malamalama lea o le tatou mataupu.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

**Afioga Hon Palusalue Faapo II:** Lau Afioga i le Fofoga Fetalai ma le faaaloalo lava, e ala la ona ou tulai atu ona o faiga faavae o le Palemene e faataoto e faatu le lafo e faataoto le saunoaga. A lea ua e saunoa i saveuga moa faamolemole o saunoaga tuulafoa'i lau Afioga. E le o se saveuga moa le mea lea e fai o le faamalamalama o le atunuu.

**FOFOGA FETALAI:** Malie, ia o le faamalamalama i le tulaga e tatau ona aumai mea moni. O upu ma tala e taea ae vaea i fafo atu o le Maota Fono lenei ou te le amanaia. Ae a i ai loa ni itu ogaoga e tatau ona faamalamalama lea ua i ai saunoaga i le Taitai o le Malo. O tu ma aga masani e tatau ona faaliliu muamua Ministerial Statement ona faataatia lea i luga o le tatou Laulau a Fono, lea ua ou fai atu e le o ni 'ai ave'a, lea ua outou faafofoga la foi ua faafofoga mai le atunuu. Faamalulu foi i lo'u fai atu i le tulaga leaga o le mulumulugaveve lea fai atu i tua atu o le Maota lenei. Ae malie le sui usufono, ua malamalama le mataupu o le a lafo ia i se sui usufono o fia saunoa, tulai mai.

**Susuga Hon Tuilaepa Fatialofa Auelua Lupesoliai Neioti Aiono Sailele Malielega'i:** Lau Afioga i le Fofoga Fetalai, ou te manatua le Fono a le Palemene na fai i le tausaga e 1987, na o le lima minute na tau faatali ai le Fofoga Fetalai e leai nisi e lauga, ia tapuni loa ma le felafolafoaiga ae tali le Malo. Ia aga'i loa i le auiliiliga o le Tala o le Tupe ia aua o mea lava na tutupu ia e tatau foi ona toe tupu e faamama avega i lau Afioga a e fiu a, aua o le Tala ia o le Tupe, o le Tala o le Tupe a matou. O le Kapeneta ma le Vaega Faaupufai, Minisita Lagolago e lavevea uma i le Tala o le Tupe, ia a faapea loa e le fia saunoa le Itu Agai, ia aumai le fesili.

**FOFOGA FETALAI:** Ia agai maia le sui usufono mo Faasaleleaga Nu. 2, ua maua lea ua e tulai mai e tamua mai lena itu.

**Susuga PAPANI LIO FAAVAIVAIOMANU TAEU MASIPAU (Faasaleleaga Nu. 2):** Ia lau Afioga i le Fofoga Fetalai, faapea foi le paia o le Maota, ia afai foi ua maitau mai ua faatutu gata, ia leaga lea ua ese foi le amatalia o lenei fonotaga. Sa sauni mai foi aua le Tala Faatatau o le Tupe, aepeitai, lea ua saunoa le Afioga i le Palemia i lana Lauga Faaminisita, ae ui i lea, o le a taumafai atu ia se sao o lenei foi itumalo aua le tatou tala faaopoopo o le Tatou Tala i le Tupe. Ia e talitonu foi lau Afioga i le Fofoga Fetalai, o taimi foi nei tatou te tuu ai le avanoa ae toe foi i itumalo ma le latou faafofogaaga, ia atonu o le avanoa foi lenei e i ai foi se taimi ia matou o atu i tapuaiga a o matou itumalo. Ia ae se i muamua lava ona ou aga'i i le Tala Faatatau Faaopoopo o Tupe (Nu.1) 2015/2016.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoga i luga o le faitauga faalua**

E momoli le agaga faafetai i le Afioga i le Minisita aemaise foi le faataatiaga o lenei Tala Faatatau Faaopopo (Nu.1) o Tupe 2015/2016, aemaise foi le Afioga i le Taitaifono ma le Komiti o Tupe. A o lea foi ua taatia le latou Lipoti i luga o le Laulau a Fono, ia malo lava faafetai, malo le galulue i le faamalamalamaina o le tatou Tala Faaopopo o le Tupe. Ia talitonu e le o se Tala Faaopopo tele, ae faafetai mo le galuega, ae ao lava ona e i ai foi nai mea e fia maua se malamalamaaga, o loʻu foi nei sui usufono, ia atonu e fesoasoani mai lau Afioga i le Taitaifono faapea foi le Komiti, i ni manatu foi ua tupu aʻe, i le faitau atu i la outou Lipoti faapea foi le Tala Faaopopo o le Tupe. I laʻu vaavaai i le Matagaluega lea o Aoga, Taaloga ma Aganuu, ia o lo o i ai le tupe lea e faaagaga mo le toe fetuunaiga o totogi o faiaoga. Ia lea foi ua maitau atu i lo outou lipoti, lea ua faamatala e le Matagaluega, ia lea ua i ai le siitaga e 7% ma le siitaga lona lua foi lea mo tatou faiaoga. Ia atonu o se tulaga talafeagai, a o se tulaga lelei foi lea, aemaise lava o le fesoasoani mai i o tatou faiaoga, ia ma e molimauina foi e tatou fonotaga, e tele le tiute o faiaoga, aemaise foi o le tele o faiaoga o aotauina le lumanai o alo ma fanau a le atunuu. Po o le a lava le matata e agai i ai aoaoga, a lelei lava le faavaeina mai o alo ma fanau mai galuega a faiaoga, ou te talitonu ua maua foi le lumanai manuia o alo ma fanau o le atunuu. Ia aʻo le faafesili, ia po o lenei siitaga ua aofia uma ai faiaoga uma o le atunuu, pe naʻo se vaega? Ona o lea e maitau atu, e le o manino mai i Lipoti i lau faitau. Ia po o le a foi se molimau a le Matagaluega po ua aofia uma, aofia uma tatou faiaoga i lenei siitaga lea ua maua atu o lea ua manaia le siitaga lea ua i ai e 7 %, po o ua lavea atoa tatou faiaoga uma i lenei 7% po o i ai se vaega o totoe?

Ona ou oo mai lea i le Matagaluega i le va i Fafu.....

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui:** Lau Afioga i le Fofoga Fetalai.....

**FOFOGA FETALAI:** Malie le sui usufono o saunoa, se i tuu atu le avanoa i le Afioga i le Palemia.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoui:** Lau Afioga i le Fofoga Fetalai, o le mea e fia faasaʻo, e i ai ia faiaoga ma laaloa ai le faatulagana, o lea la e aafia i le mea lea. Ua iloa foi na talosaga mai ia ae ona sa i ai lava nai faaletonu i le tapenaga mai o le mataupu lenei, o le ala lena ua tuai ai, aemaise ia alauni, lea la e mafua ai le vaega lea e i ai ia latou ua laaloa ai le faatulagana i le amataga. O siitaga ia sa fai muamua lea la ua toe faasaʻosaʻo i i, ia faamaumauga, ae ona o le tulaga o le toatele tele, aemaise lava le Matagaluega lenei e aupito sili ona toatele ai tagata faigaluega. E pei o le tulaga lena e mafua i le fenumiaʻi, masalo e i ai se taimi e saunoa atu ai le Minisita ma faamalamalama atu le itu lea.

**FOFOGA FETALAI:** Tulai mai le sui usufono e faaauau le saunoaga.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

**Susuga PAPANII LIO FAAVAIVAIONANU TAEU MASIPAU:** Ia faafetai i le saunoaga a le Afioga i le Palemia, o lea ua maua atu, e fai sina toatele o le Matagaluega, ia o le agaga lena o loʻu nei sui usufono, o le manatu foi lele ia aafia uma, po o ai lava le faiaoga, ia aafia uma i mea ia o faamanuiaga ua agai i ai lo tatou Malo.

Ona ou oo mai lea i le Matagaluega o le Va i Fafu ma Fefaatauaiga, lea ua ou tau atu i le Lipoti, ia pe le o silasila ifo lau Afioga i le Taitaifono ma le Komiti i le tatou avanoa foi lea i Fiti, na gafa ma le vaavaaia o tamaiti aoga i Fiti, po o talafeagai pea lea tulaga, peiseai ua mafua foi ia tulaga o avanoa nei ona o faafitauli foi ia sa tutupu mai i le atunuu lea. Po o alagataua pea lenei tulaga ia mo le vaavaaia o alo ma fanau i le atunuu i Fiti.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai e le na ona pau lena o le mea na faatu ai le tatou tulaga lenei, e le'i faia le mea lena. Ae e tele lava mau faafitauli e faafeagai ma le fanau aoga, o faafitauli ma o le lipoti foi lea o la e tupu le misa e aafia ai a tatou tamafanau, aemaise lava mea nei o tama i le mea o le tataa. E te'i i le faauouo atu o lea, tatou fetau i tai i le GoGo. Ia ona o loa lea i falesiva foi ia ma onana faavalevave ai, e tele lava la le galuega aemaise foi o fanau teine e tutupu ai faalavelave, e moomia tele la, o le galuega tele lena a le tina lea, o le faufautua, e consult i auala eseese ina ia faaleleia ai le aoga, aemaise lava le tausaga muamua e o atu loa fanau ua leai nisi e toe vaaia, ia o faasauai loa ua saoloto. O le taimi lava lea e aupito i sili ona tele ai le galuega e fai o le tausaga muamua. Ma o lea la e aumai pea ia te au lipoti i le tulaga o latou uma nei sikolasipi, ina ia ou manino ai i mea ia o lo o tutupu, ma o le ala foi lena o lea e moomia tele le tulaga lea. E i ai lava le taua, e le faapea se i tupu le faalavelave i le faigamalo a Fiti ona faatoa fai lea.

**FOFOGA FETALAI:** Ia afio mai le sui usufono mamalu faaaauau le saunoaga.

**Susuga PAPANII LIO FAAVAIVAIONANU TAEU MASIPAU:** Faafetai ia o le mea sili lea ua maua le agaga o le Malo aua foi le atiaeina o alo ma fanau aemaise le Iunivesite o le Pasefika i Fiti. Ia faafetai lea ua malamalama foi lou sui usufono i le tulaga mo le faaaauina aua foi alo ma fanau o aotauvaa atu i le Iunivesite i Fiti.

Ona ou oo mai ai lea i le Matagaluega o Tina ma Tamaitai, Atinae o Nuu ma Agafesootai, ia lea ua maua atu le Lipoti a le Komiti. Sa tusi foi lou sui usufono aua o lea e maitau atu o lea e na o sui tamaitai o lea e i ai le siitaga, e tuufesili ona o sui o nuu fai pulenuu. Ia ae faafetai o lea ua maua, e i ai mafuaaga lea na toe fetuunai ai totogi o sui tamaitai ona o nisi foi o manaoga faaletulafono mo alauni ma totogi i le sii lea e pei ona maua, ia o le mea lea e faafetai foi o lea ua malamalama foi i le tulaga lea.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ona oo mai lea i le auunaga faasoifua maloloina, ia e talitonu lava lea ua maua aemaise lava o gasegase foi o le tatou atunuu mo atunuu i fafo. Ia malo lava i tatou meafaigaluega aemaise foi tomai faapitoa lea e maitau atu i Lipoti, lea e manino i le Lipoti a lau Afioga i le Taitaifono aua le silasila foi o le Matagaluega ia tatou gasegase foi lea mo atunuu i fafo. Ia ae na o se fautuaga lava ia mo le agai i luma poo ai foi faigamalo e tulai mai i lea Paeauga. O le agaga lea ina ia fautuaina pea le toe uunai pea o alo ma fanau o le tatou atunuu ina ia aooga pea aemaise lava tomai faapitoa, o tomai faapitoa lava ia faatatau mo gasegase ma togafitiga i totonu o le tatou atunuu. Ia e i ai lava i nisi o suesuega o lo o i ai lava nisi o gasegase o lo o moomia pea ni fomai faapitoa, e pei o le Prostate Cancer vaeane lava le paia o le Maota. Ia maua foi se tasi lea o faamai ua fai foi sina tele o le itupa o alii ua aafia i totonu o le atunuu, e le na ma le laina lea tulaga ae mo le agai i luma ina ia vave maua se togafitiga e le gata i masini e ono test ai le vave ona maua aemaise foi togafitiga. Ia a o le uiga lava ia o le fautuaga ma le lauga mo le agai i luma o le atunuu, ina ia tele alo ma fanau o le tatou atunuu e aooga faafomai e lelei foi lea poto faapitoa aua le agai i luma o le tatou atunuu.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** O le taua ia o le saunoaga a le tatou Malo, ia pau lava le mea e fia faasao o le saunoaga foi lea, ua tele lava tagata mo le prostate cancer i tama. O faasilasilaga a le teine fomai ua ou talanoa i ai e maua uma lava ia tama i le prostate cancer e leai lava se isi e faasaoina. O lona uiga, o le umi lava o lou soifua ae le i kilia oe e se isi faamai. O lona uiga e maua uma lava tatou i le prostate cancer, a o le aoga la lena o luitau foi lea faale atoatoa, o lea ua ou toe tulai atu e faaatoatoa e aoga mo tatou uma lava. A silafia le Minisita foi lea talavou o Taua, o taimi uma lava ou te fautua ai i lau Kapeneta i lena taimi. Sole fai ma o e siaki kou prostate aua e maua uma lava ia tamalolua ae pei e tilotilo mai ia Minisita ia au e pei o au o se fomai. Ia o lea ua uma ae ua tuumalo ia taua ona ou alu atu loa lea fai ia lau tala lea, ua uma ona fai lau tala ae fai mai le tala a le Faifeau, faafetai lava i le alii fomai faapitoa i mea tau cancer. Ona ou sau lava lea ou nofo ma ou ata, e le atoa le tausaga ae tuumalo si o matou faifeau. Ae ou alu atu e toalua o lo o taoto mai, ou fesili atu lea i le fomai, o le a le mea ua uma ai le ola osi faifeau lea? Ae faapea mai, ua maliu i le prostate cancer. Ia ona ou talanoa lava lea o taoto mai si toeaina ae ou talanoa i ai. "Ana e faalogo mai i laua lauga lea na fai, semeamanu faapenei e le o aso ia e te malaga ai, ae pei e te ula mai ia te au. Ia lea la ua ou faapea atu ai i le tatou Maota, a ta loa le sefulutolu (13) taeao, ona o uma lea e siaki a outou prostate.

**Afioga Afualo Wood Uti Salele (Salega):** Lau Afioga i le Fofoga Fetalai, ona e taua foi le saunoaga a le Palemia ae tatau ona aumai faamaumauga mo le Maota aua o lea e fai mai, o tama uma lava e aafia ai, faafetai.. Faafetai.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

**FOFOGA FETALAI:** Ia ou te iloa e le tau faamalamalamaina o lea e susu mai le alii fomai, ina ne i te i ua ou avatua le avanoa ae ese le mea o le a toso i ai le tatou mataupu.

**Tofa Lealailepule Rimoni Aiafi (Faleata Sisifo):** Ia sui usufono mamalu o le Maota Fono, a o faafofoga Samoa ma tatou a o faalupe le Afioga le Palemia i le Doctor, ne i te i la ua sese ai ia tatou o le Doctor foi lele o le Medical Doctor foi lea mo puua. Ia o le doctor ia a si toeaina o doctor lava ia faapolokiki ae lea pei o le a faasese atu ai ma tatou. Ia ma le faaaloalo lava.

**FOFOGA FETALAI:** O le doctor lava o le doctor. Ia Papalii, susu mai ua taua lou tu i lenei tulaga.

**Susuga PAPALII LIO FAAVAIVAIONANU TAEU MASIPAU:** Faafetai mo manatu, faafetai foi mo le saunoaga faamalamalama i le Afioga le Palemia. Ia pei o le agaga lena e le na ma le laina, e tele foi nai tama o si o matou itumalo na aafia, mafua foi i le tulaga lea. Ia a o le faaupuga ia e faamalulu atu ona e le o i ai ni tatou tulaga faapea. E pei o le agaga lea ma lou faaaloalo, o le tala a le isi fomai na ma talanoa, e i ai le masini lea le iloa pe sao au, aua o lea e faafofoga mai le Minisita o lea ua uma. Ae le iloa pe sao o lea ua oka aua o le masini lena e tuu mai lava ma maua atoatoa ma togafitiga e vave foi, aua o lea ua saunoa le Afioga i le Minisita. O le gasegase lea e vave foia lava i le amataga e kilia ai e le toe afaina ai se tane. E pei o le agaga lena o lea foi e maua e matou, o le uiga lena aua ua fai sina taatele o le gasegase i totonu o le atunuu. Ia ae pei e agaga faapena, ia maua se masini vave ma fomai vave. Ia o lea la ua faauma le taimi aua o lona uiga....

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Ae e le i tulai mai le alii fomai ona o lea e pei ua amata ona ula mai le la itu pei lava o le faifeau lea na tu mai, ae ou te fautuaina lau Afioga, ae a pe a faaoga se tolu itula ete lauga ai lava i mea ia.

**FOFOGA FETALAI:** Ia tulai maia, o lea ua manino ua tali manino le Minisita pe a oo le taimi e folasia ai lea mataupu. Ia malie le finagalo o le Minisita e tulai mai foi e i ai lava le taimi.

**Susuga PAPALII LIO FAAVAIVAIONANU TAEU MASIPAU:** Ia e i ai foi a tatou fomai faapitoa foi ia e masalo mo tatou taotoga faale tulafono ia ua maua foi e i ai nai a tatou fomai faapitoa i mea tau fofoga, taliga, ma isi vaeatu le paia o le Maota ma le atunuu. Ia o nai fautuaga mo le agai i luma ae le mo nei taimi. Ia ae aoga foi le fesoasoani atu ia po o ai lava le Faigamalo e tulai mai, ia outou alofagia le talosaga a Faasaleleaga Nu.2. Ou te talitonu ua uma se manatu foi na fai atu ai i le Tala Faaopoopo o le Tupe, ae ou te manatu o se avanoa lenei e fai ai foi se tala i lou itumalo ia ona uma ai foi lea o lenei Paeaiga.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ia le tapuaiga a si ou itumalo pele o Safotulafai ae faapea foi Sapapalii, Faasaleleaga Nu.2, i le afio o lau afioga le alo o Leilua, Salalatoa ma alo o Malietoa, ia oulua na Pule Tuilagi ma Namulauulu faapea foi Maopu Tufuga ia ma le mamalu tele o lautu na laulelei ia te oe Safotulafai. O oe o le Pule, aemaise foi si ou nuu o Sapapalii, susu sui o le Nofo ma Tooa, ia faapea foi le aiga Sa Malietoa ma le aufono Uso Mago ma Luasiufanua, aemaise foi le Aufaigaluega paia a le Atua i so o se fatafaitaulaga i totonu o lou itumalo i la outou tatalo ma la outou tapuaiga, aemaise foi ia mafutaga a tina i saoa ma tamaitai, aemaise foi o le malosi o le tatou itumalo ma o outou aiga, ma le lavaloa a le tatou itumalo. Malo tapuai, faafetai tatalo.

E avea foi lenei avanoa e momoli atu ai le agaga faafetai i lau susuga i le Toeaina, lau susuga Ioane Viliamu Samoa, ia e ui lava o lea e toe o se aga faataunuu lou tofi, ia ae o lea lava ua silafia le tatou Pulega. Faafetai i tofiga a le tatou pulega ia lea o le a seei mai lau susuga i le Toeaina faaolioli e amata ia Iuni, ia o ou mama na. Ia manuia lau nofoaiga aemaise foi le taitaiina o le tatou Pulega, ia malo le onosai, malo le lototele aua le galuega a le Atua. Ia o si o tatou itumalo, ia o le ala lena o le taumafai a lo outou auauna, e talitonu lava e leai lava se faiva e asa ma se maimau, e le atoa foi atu i lona vaa, e potu foi le tautai ae sese lava lana atu i ama. O le a se taumafaiga o lenei Paeaiga, ia ua pau lava o le malosi ua maua mai. Ae o le agaga o le fia auauna ma le fia tautua i le maualuga e gata mai ai, ia ae faafetai i le tatalo, faafetai foi i la outou tapuaiga ia o lea ua iu foi ma le manuia lenei Paeaiga. E momoli foi le agaga faafetai i le Faigamalo ona o nisi foi o a tatou galuega ua maea ona fai, agai i le falemai i Tuasivi i lona faaleleia ua i ai nei, faafetai i le Faigamalo aua le falemai o lo o tu i totonu o le tatou itumalo o lo o autovaa mai i ai le tatou Motu tele i Savaii.

O le mea lea, faafetai i le faigamalo mo ia galuega ua maea, aemaise foi o a tatou auala i Fogapoa, lena ua uma ona teuteuina le tatou auala. Ia sa tatalo lava i le malo ina ia faasili atu i gauta ae peitai, o le agaga lava ia sa manatu o le falemai i le mamalu o le motu o le falemai aemaise mo faalavelave e tutupu mai, e pei o le Tsunami, faafuaseia ai le falemai, ia sa i ai lava le agaga ma le talosaga i le agai i uta. Ia ae u ii lea, o le mea sili o lena ua teuteu le tatou auala ae faapea foi tatou auala i o i Mauga e oo foi i Tapueleele, ia o lena ua uma ona faatino e le tatou Malo ia tatou auala ia ae tatou faafetai, e u ii galuega ua fai i lenei taimi mo le agai i luma o le tatou itumalo. Ia sa i ai foi isi tatou galuega tuua lea e silafia e le Afioga i le Minisita ma le Faigamalo, o lo o i ai a tatou galuega tuua, ae ui i lea, e tele foi fuafuaga taua aua le Faigamalo o tulai mai aua foi Paeaiga.

O le tatou auala laupapa i Sapapalii ae faapea foi a tatou auala galue i le Vaimaga ae faapea foi Aeauli ma le Vaito. Ia o lea lava ua uma ona faaoo le tatou talosaga i le Faigamalo, ia ae o lo o i ai pea fuafuaga agai i luma faapea foi le tatou paipa agai i uta, aua foi tausii auala galue ia aemaise foi moli mo nai aiga i Vaimaga ma eleele ia matou taligalu.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

Ia tatou talosia ia o le Atua lava ia ma Lana faasoia, ia faapena ona fesoasoani mai. Ae o le agaga lava ia i lenei aso, faafetai tatalo, faafetai i lau tapuaiga. Ia o le a foi sa outou silasila i le Nofoa, ia e leai, o mea lava ia o Nofoa a le Palemene e faapelepele i ai o so o se sui usufono. E manatu foi ia nofo mamalu se sui usufono e puipui le Nofoa. Ia o le a foi se silasila i le tausiga o le tatou Nofoa, ia lena ete faamasino mai lou itumalo. Ae leai o le mea lava e gata ai le malosi ia ma le taumafai puipui le mamalu o le Nofoa aua foi upufai o le atunuu, o lena e i ai lau faamasinoga. A o le tatalo, e leai, o lo o maua pea le malosi. O le a foi se filifiliga a le tatou itumalo mo le faiga paota, e leai, o lo o i ai lava le malosi. E tatalo pea i le tatou itumalo, e leai o la outou auauna, e leai e le o se futu tafea o le fatu lava na tupu ae i le laueleele ma le itumalo, ae i ai foi le agaga o le alofa, e i ai foi le agaga o le lagona o le militino faatasi aua na tupu ae ma totogo ae i totonu o le itumalo, aua o lo o nofo i totonu o le itumalo, e i ai le agaga faapena. Afai e le taunuu pe le taulau moomooga, e le uma pea le faiaso a le Atua, e tele pea taimi a le Atua, e tatou te faamoemoe foi i le musuia e le Agaga o le Atua. Po o ai lava le Faigamalo, tatou faamoemoe pea i le Atua e maua ai lo tatou fesoasoani. O le tatalo lea e momoli atu ai le agaga faafetai tele i lou itumalo pe le Safotulafai ma Sapapalii, faafetai i la outou tapuaiga, faafetai tatalo.

O le matou tatalo, ia manuia lau faiga filifiliga aua le masina o Mati mo lau Faiga Palota, ia manuia lau filifiliga, ia filifili faatasi ma le Atua e te maua ai le manuia mo le agai i luma. O le faafetai lea si ou itumalo ia manuia tele le tatou itumalo, manuia foi lau Afioga i le Fofoga Fetalai, ia e toe tulai mai. Malo lava mo le faafoega o le Maota. Ia manuia foi lena Itu o le Maota i lau Afioga i le Palemia ma le mamalu o le Kapeneta, ia faapea foi le Taitai o le Itu Agai ma sui usufono mamalu uma o le Palemene. Ia manuia lo outou alofaiva aua le faiga filifiliga a le atunuu.

Ia manuia lau Susuga i le Failautusi o le Fono Aoao ma le Matagaluega mo le faatinoina o tatou galuega uma, malo le galulue, faafetai le punouai. Faafetai foi i Ofisa Sili o Pulega ma Pule Sili o Matagaluega ma Faalapotopotoga, e leai o le lima taumataua outou o le tatou Malo, o outou o le faamoemoega o mea uma. O lea mea lea e pei lava ona saunoa le Afioga i le Palemia, o outou mama na, o outou na ua i ai le maai atoatoa, e atamamai, aua le agai i luma o Matagaluega a le tatou atunuu.

Ia manuia le tapuaiga a si o tatou atunuu, ia manuia foi le tapuaiga a Lana Afioga Mamalu, O Le Ao o le Malo, faapea foi lau Afioga i le Masiifo, aemaise foi le Sui o le Fono a Sui Tofia, faafetai tatalo, faafetai foi tapuai, aemaise foi le Faamasino Sili ma le Vasega o Faamasinoga, ia manuia la outou tapuaiga, manuia Samoa o lo o faafogafoga mai, faafetai.

**FOFOGA FETALAI:** Malo. E manatu e le tau faafuluina le vagana fetalai Papalii, leaga o oe o se tasi o Tootoo e fesili i ai le tatou Puleono i Salafai. Ua maitauina pea i nei Fonotaga uma o tatou Tala o Tupe o lo o fai pea oe ma taimua i lena Itu o le Maota, o oe e te muamua ona e tulai mai e lagalaga le amataga o manatu ma lagona.



26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

A o tatou felafolafoaiga foi, e leai o lea e tamau le Maota lenei e oo i le faavavau. Malo saunoa, faafetai foi i manatu ma lagona, o lea ua e faafetai mai i le Malo, o le Palemia ma le Kapeneta ua e faamanuia mai foi i le Fofoga Fetalai, ou te faapea atu foi, ia e manuia, faamoemoe i le Alii, ia musumusuina lou agaga ia sao uma le mea lena e te i ai. A o matou moomooga alofa na, malo fetalai, malo saunoa.

Ia, ua avanoa le Maota mo se isi sui usufono e toe fia saunoa. O le a lafo i lea Itu o le Maota. Tulai mai se tasi o sui usufono mo Falealili, Tofa Tusa Misi Tupuola. Tulai mai le sui usufono mamalu.

**Tofa TUSA MISI TUPUOLA (Falealili):** Faafetai tele i lau Afioga i le Fofoga Fetalai o le Maota mo se avanoa foi o lenei sui usufono o le itumalo o Falealili. E manatu e lelei foi ona fai so matou manatu meamanu o malu le taeao, aemaise foi o lenei vaiaso puupuu e fia faaleo foi le agaga o le faafetai. O lea ua maea ona tatou sulaina le agalelei ma le alofa le faatuaioia o le Atua mo Samoa ma ona tagata, o lea ua tatou tini taunuu mai ai i le Fono faaii a le Paeaiga Lona XV a le Palemene o Samoa. Lau Afioga e ui lava ina pipii tia ma tele foi faafitauli sa tulai mai i le faaiuga o lena tausaga, aemaise foi le amataga o leni tausaga ona o fesuisuiaiga o le tau, a ua tatou ioe o le Atua o lo tatou -Olo Punimatagi Na te taofia mea uma, aua e agalelei pea le Atua mo Samoa.

O lenei la taeao, o lea ua matalupe le seuga, ua auoloolo foi aua ua paia ma mamalu le Maota lenei o Tiafau, pei ona tatou faaaogaina leni maota tele i Tuanaimato. Ia ua maota tauave lava Tiafau o le malae o le faautugatagi a Samoa.

Le paia ma le mamalu o lenei Palemene i le afio o lau Afioga i le Fofoga Fetalai, afio lau Afioga i le Palemia ma le mamalu o lau Kapeneta, afio Minisita Lagolago, i lena foi Itu i le afio mai o lau Afioga i le Taitai o le Itu Agai, afio lau Afioga i le Sui Taitai, afio foi a outou Afioga i Minisita, o ata lafoia. Masalo o mamalu ia o le Palemene i lenei aso. E manatu e le toe ooo se matou faamatalaga i se isi lava itu i tua atu, aua o outou paia, sa ma outou faigata, o le a le oo i ai se leo o Falealili.

Lau Afioga i le Fofoga Fetalai, e faamalulu atu lava, o se taimi ona o o lea o se matou faamatalaga i le Tala Faaopoopo o le Tupe 2015/2016. A o le i oo se matou faamatlaaga i le Tala Faatatau Faaopoopo o le Tupe a le Malo, ou te tulai atu e faaleo le agaga o le faafetai tele i le Tala o le Tupe, ma e lagolagoina e lenei itumalo vaega uma o lo o aumai i le Lipoti a le Komiti faa-Palemene sa latou lauiluina le Tala Faatatau Faaopoopo o le Tupe, aemaise foi le saunoaga matagofie a le Afioga i le Minisita o Tupe lea sa tatou faafofoga ma faalogologo i ai talu ai.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoga i luga o le faitauga faalua**

Ae se i ou liliu ane lava lau Afioga se i ou oo muamua lava i lou itumalo, se i fai foi se agaga faafetai ona o le latou tapuaiga i totonu o lenei lima tausaga o le Paeaiga o lo ua tatou faaiuina nei. Ia lou itumalo e pele i le agaga Falealili, i le afio o le Alaalagafa ma la oulua Nofo i Tulafale ma le Tauagaeseese ia te oe Falealili, o lea ua tatou tini taunuu i le faaiuga o galuega Faapalemene a lou atunuu i totonu o le lima tausaga. I le amataga o lenei Paeaiga, sa matou faafetai atu i lau faaeaea Falealili, ua outou tofofi ai maua ma le Afioga i le Minisita po o le Afioga ia Tuiloma Lameko e fai ma outou sui i totonu o upufai a le Palemene. O lenei la itula ma le tulai atu i lau faafofoga mai lou itumalo, ua faamalo faafetai i la outou tapuaiga lelea, faafetai i lo outou alofa moni i le tulai mai i le faatinoga o galuega e pei ona outou tofofi i matou e galulue ai i totonu o le Palemene se i faaleo se finagalo o le tatou itumalo aua ana atinae ma lona tamaoiga mo le agai i luma.

Lou itumalo Falealili, e tele naua mea e le i oo i ai le Paeaiga lenei, e tele a tatou galuega ma tatou talosaga ua maea ona faataatitia ae paga lea ua puupuu le taimi, a o lo o faagasolosolo pea galuega lelei a le tatou Malo, ma e le na o Falealili se itumalo. O le talosaga Falealili, ia lavapapale pea, tatou tuitui pea le mulipapaga ma o tatou talia lupe o m e pei o upu e masani ai le atunuu. E fai aso pea le Atua, i lenei foi Paeaiga o lo o loma nei, o ai lava se tasi o le a tulai mai e tauave le tatou itumalo, o i latou na latou te faaauuina a tatou polokalame lea ua maea ona faataatitia, i se taimi ona talanoa atu ai lea, ae aua tatou te atuatuvaile ma popole, e faagasolosolo lava polokalame lelei a le tatou Malo aua le atinae o si o tatou itumalo.

E momoli atu le faafetai tele i le tapuaiga i lau Susuga i le Toeaina Faatonu, lau Susuga Tunumoso Iosia ma le faletua ia Susana Iosia, ua malo faafetai le tatalo, malo faafetai i le tapuaiga mau ia te oe le Toeaina, faafetai i au timaiga ma au fautuaga ia te au nei o le sui usufono, e tusa ai ma le tauaveina o le tofi o le tatou itumalo. O le upu moni, matou te manuia i a outou fautuaga ma la outou tuualalo i o matou tagata vaivai.

Faafetai i le Aao Tუსitusi o le tatou Pulega Falealili, ma o loou tama faale-Agaga foi lea, le Susuga ia Amosa Vaetoe ma le faletua ia Punipua Vaetoe, malo le alofa, malo lou fai atalii i le tatou mafutaga, e le gata i mea uma e fai i totonu o le Ekalesia ma le nuu, ae faapena foi i le tatou Pulega o lo o tatou galulue ai i Falealili. Ia alofagia lava e le Atua ia maua pea lo outou soifua, ia maua la outou utu ia faatumuina pea e le agaga o le Atua aua le Atua ma Lana feau ma Lana Talalelei.

Faafetai tele i le paia o le Aufaigaluega tofofi a le Atua ma o outou faletua i totonu o le tatou Pulega, malo faafetai le tatalo, malo i la outou tapuaiga, ua leai lava se mea e gase, ona o la outou tapuaiga lelea e faia pea i le ao ma le po aua se manuia o le tatou itumalo, lele ua manuia eleele o Falealili, tele a tatou atinae, ua lelei faatoaga, leai lava se mea o gase, vagana lava nisi o mea laiti o lo o fia faamaopoopoina pea.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

E le faagaloina foi a outou Susuga i Tausi Matagaluega, Peresetene o Auso a le Ekalesia Metotisi o lo o i totonu o le tatou itumalo, malo le galulue, malo le faatoatoa. O upu lava a le Ekalesia Metotisi e masani ai tatou, aemaise lava taimi faapenei o faafetai ona o le galuega sa feagai ai, ua malo le tau, ua malie le toa, ua faafetai le tausala, ia alo ane i feau ma galuega o lenei tausaga, ia maua pea le agalelei o le Atua ma lona filemu mo outou.

Faafetai foi i Susuga i Faafeagaiga o le Ekalesia Katoliko i totonu o loo itumalo, o le Ekalesia a le Au Paia o Aso e Gata Ai, o le Ekalesia Aso Fitu, Faapotopotoga a le Atua aemaise o le Ekalesia Molimau a Ieova e pei ona i ai pea i totonu o le tatou itumalo. Faafetai i le galuega o lo o outou utuvai ai i le itumalo aua se manuia faale-Agaga o Falealili, ma ia manuia foi feau o lo o feagai ai ma a outou Susuga i Faifeau.

E le faagaloina foi se faafetai tele i le paia maualuga o si ou nuu o Matautu Falealili, aua le Afio o Tupuola ma Matautia, afio le Matua ia Tiavaasue, afifio le Usoalii aemaise le mamalu i le Falelulufi. Ua malo faafetai i lo outou fai atalii Matautu, faafetai i la outou lagolago ma outou fautuaga i le tatou nuu, ua tele atinae ua mafai ona outou faatino, ae peitai, o lea lava e le i oo atu se fesoasoani a le tatou Malo i le tatou nuu, e mafua ona o outou lava, ua outou talosagaina le sui usufono e taatia Matautu ae alo i le itumalo. Matautu, faafetai tele o la outou pule lea, ia alofagia e le Atua ia maua pea le soifua, e fai aso le Alii, o le a lava le tulaga o le a i ai le faiga filifiliga a le atunuu i lenei tausaga, ia tatou tatalo pea, o lea ua taoto lava fuafuaga i le Malo, pei ona talosagaina e le Afioga i le Minisita mo Galuega, Felauaiga ma Atinae Eeseese a le Malo, aua le faasologa o lana lisi tele o lo o i ai ma le Afioga i le Minisita mo le faatinoina o tatou auala galue i Saleilua, le auala galue i Poutasi, le auala galue i Matautu, faapea foi le afioaga o Satalo ma Malaemalu, a o auala uma nei o lo o taoto i le lisi a le Afioga i le Minisita. Aua tatou te popole e fai aso pea le Alii.

Ou te manatu e le faaumiumia se manatu lau Afioga i le Fofoga Fetalai, ae le mafai lava ona faagaloina ia te au le galuega o lo o feagai pea ma tina ma tamaitai, le galuega faatina o lo o faia pea i aso uma, aua se manuia o le itumalo le nuu ma le afioaga aemaise o le itumalo pele o lo o galulue ai i so o se fata faitaulaga o lo o galulue ai i totonu o le itumalo, tina, ua le ole lea, faamalo i lo outou faitama i la outou tatalo leleoa ua ae ai faiva o le Palemene i lo outou tofi faipule o lo o i ai nei i totonu o lenei lima tausaga. Ia alofagia e le Alii ia maua pea la outou fautua lelei, aua o upu lava a le atunuu, 'e au lava le inailau a tina. Ø Ia manuia pea tina uma o lo tatou itumalo, o outou foi e fautuaina le manuia ma lelei o so o se itu, o lo o galulue ai lo tatou itumalo.

E manatu lau Afioga i le Fofoga Fetalai, e tele lava nisi mea e fia faafetaia ai lou itumalo, ae ua ou manatu o la ua loa ona silafia e le Atua le agaga. O le agaga faafetai a le itumalo o Falealili, ua moni lava upu a le atunuu, 'se ua ta fia Falealili fua.' E mafua aisea? Leaga e fai mea silisili Falealili, o Falealili lava e na te lagolagoina lava le itu o lo o vaia nei le Malo.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

O le ala lea e faapea ai le itumalo, o le itumalo e sue malo. Falealili e pele ia te au oe. O lea ua vaeluaina lo tatou itumalo ona o le Tulafono o Faiga Palota. Falealili Sasae ma Falealili Sisifo. Ae i ai lou talitonuga, o Falealili o le nuu o le aiga e tasi. E ui ina ua lua itumalo faapalota, a o le tuualalo a la outou atalii i lenei taeao, ia tumau faavae o le itumalo, ia tumau le soifua fealofani ma le feoeoeai o le itumalo, o ona mamalu o ona sa ma faiga, Falealili e le aoaia e Laupua Tamafaiga. Ae na o se matou tuualalo, e tasi lava Falealili. O lea o le a tatou alo i le faiga filifiliga a le atunuu, e le o toe mamao ona faia lea o le Faiga Palota a le atunuu, a o le matou tatalo lava le itumalo e, ia faimalu faiva, ia faiva malu o outou faiva, palota i lau filifiliga saoloto, palota e faamoemoe i le musumusuga a le Alii. Ae aua tatou te faia ona o nisi o tapu o sa i totonu o afoaga ma nuu, ae ia tatou faamoemoe i le Alii ma lau aiatau e palota ai i so o se tasi. O upu e masani ai le gagana i le tai, 'Sema se mago, fesili i le tai se tautai o agavaa, aua le faatautaiga o le Nofoa o le itumalo.' O au toe upu le itumalo, o le a sa outou silasila mai i le faatinoga o feau ma ou tiute faa-Sui usufono na outou totogi au ou te sau ai, 'e poto lava le tautai ae sese lana atu i ama.' Faamolemole faamagalalo mai lo outou atalii, faamagalalo mai se sese, aua e le iloa lava e le tagata ona leaga ma ona sese. O le a foi se tu ma se aga ua le tautamalii Falealili i lau faafofoga mai, malu ave i fale lou finagalo faa-Tupu, po o lou finagalo faatamalii aua le Palemene o Samoa. Ia manuia tele lo tatou alofaiva Falealili mo le faiga filifiliga, o manu na. O ai lava o le a outou filifili i ai e ala lava i le tatou Faiga Palota, o ia lava lena.

Lau Afioga i le Fofoga Fetalai, ona oo mai ai lea i le Tala Faatatau o Tupe Faaopoopo (Nu. 1) 2015/2016 . O lea ua maea ona matou fai atu e matou te lagolagoina le Tala Faatatau o Tupe Faaopoopo (Nu.1) 2015/2016. Na o nai mea laiti lava pe tasi pe lua lau Afioga e fia oo i ai se manatu, aua ou te iloa o nisi o talosaga fou e faia i le taimi lenei, e le toe faia i le taimi lenei, e le toe talia e le Afioga i le Minisita leaga o lea ua tatou lamalama faaii, ae tuu ia se i aulia lea tausaga fou, ia ona toe faia lea o nisi talosaga fou.

A o leni ituaso, faafetai tele i lau Afioga i le Minisita o Tupe, o lau Afioga i le Taitai o le Malo lau Afioga i le Palemia, ua malo le galue, malo le faatoatoa. E pei lava o upu a Ulumu lea na fai ia Lefaoseu e te silafia ma tatou iloa, faafetai le alofa ia Samoa ma lona Malo Tutoatasi. O galuega e tele sa feagai ai i totonu o leni lima tausaga i lau Afioga ma le Kapeneta, ia e le toe selu atu, leaga o la outou galuega e faia i le loto e alofa i le atunuu, e faia i le agaga e filemu ai mea uma, ia manuia le soifua o lo o tatou atunuu nei ma a taeao. E laitiiti ia o le tupe lea e sau i le Tala Faatatau Faaopoopo o Tupe, ae ou te talitonu foi, e tele lava Faauluuluga o Matagaluega a le Malo ma Kamupani Tumaoti, o lea lava ua aumai ae le o auau lava i le faaso, ae ua tatou o lava i le fua ua aumai e lau Afioga i le Minisita o Tupe, e fua lava galuega i le tupe lea e i ai. Ia malo le lima lelei, malo i la outou faaso, e mai lava i le amataga o leni Paeaiga seia oo lava i le faaiuga leni, ia alofagia e le Alii ia maua pea le soifua i lau Afioga aemaise le mamalu o le Kapeneta ma le mamalu o le tatou Palemene a o tatou alo atu i le faataapeina o le Palemene i leni vaiaso.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

Ia masalo ua pau lea o mataupu o lo o totoe, o lea lava o lo o i ai foi nisi sui e omai, a o le agaga lea e fia avatu e lenei sui usufono. Ia manuia lava lau Afioga i le Fofoga Fetalai, malo faafetai faatoatoa, malo le onosai foi i lau Afioga i le faatautaiga o le Maota o le atunuu, e le faigofie. Faafetai o lo o maua pea le toamalie i lau Afioga aua le faatautaiga o le Maota Fono a le atunuu, o le Fonousu a Samoa, aua taeao a le atunuu.

Faafetai tele i lau Afioga i le Failautusi o le Fono ma lou ofisa. O le tele ia o mea e matou te mananao ai, o isi foi taimi ua sese foi tala ma faamatalaga, ae faafetai i lo outou lavapapale i le faatautaiga o le Fonotaga a le Palemene ma o matou sui usufono, ia alofagia e le Atua ia maua pea le soifua i lau Afioga i le Failautusi o le Fono a le atunuu, aemaise le mamalu eseese o lou ofisa.

Faafetai tele i Faauluuluga o Matagaluega a le Malo aemaise afioga i Pule Sili o Faalapotopotoga Tumaoti a le Malo. Malo le galulue, malo le tauatai ma lo outou galulue punouai i le ao atoa ma le po, aua Samoa ma sona lumanai mo a taeao. O le a foi ni o matou aleu i le va feagai ai ma a outou afioga i Pule Sili ma Faauluuluga o Matagaluega, faamagalo mai sui usufono. Ia o le matou upu lea, manuteleina fuafuaga o lenei aso, soifua ma ia manuia.

**FOFOGA FETALAI:** Malo faafetai saunoa i le Tofa Tusa Misi Tupuola, ia o se tasi foi o sui usufono aloaia o le itumalo o Falealili pei ona seelua ai ma le Afioga i le Minisita. Ia ua logomalie le tuleiga ma le saunoaga i lenei vaega o le taeao, faafetai foi mo le faafetai mai. O le tatou galuega e tatou te le feseuai. A o lo o maitauina pea e le Nofoa o oe o se tasi o sui usufono e te saunoa i tulaga faatamalii i taimi uma o tatou Fono, e fai foi o le na a o lenei, e momoli atu foi le agaga faafetai ma matou faamanuiaga, ia tatou lafo i le Atua mea uma. O le tagata ma lana ma le fua e te lulu e te selesele o lo o faafofoga mai lo tatou itumalo, ae faafetai mo lau sanoaga faaii i lenei vaega o le aso.

Ia lau Afioga i le sui usufono mo Vaisigano Nu.2, ou te manatu e leai lava se isi fomai e o ma lau Afioga, ona e tatau ona fai muamua le tatou tausiga o le taeao, e tatau ona tatou o muamua se i...leaga o lea ua tatou tulalata i lo tatou taimi malolo e faigata foi lau Afioga i le Vaisigano Nu.2, o le a avatu le avanoa i lau Afioga pe a tatou taliu mai i le tatou faiga malologa o le taeao.

E faasilasila atu o le a faataatiaese Taulumaga a le Fono Aoao Faitulafono mo lana malologa masani.

*Na faataatiaese Taulumaga a le Fono Aoao Faitulafono ile itula e 10:43 i le taeao ma toe faaauau i le itula e 11:26 i le aoauli.*

*Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2015/2016.*

26 IANUARI 2016

### **Lafo mo le suia o Itula Fono**

**FOFOGA FETALAI:** E manatu o lea ua foʻi mai le tatou malologa masani, e maualuga foi le faamoemoe ua faapena ona maua sa outou faamalositino maua ai foi le malosi atoatoa e faaauau ai tatou galuega mo lenei aso.

E faamalo atu i sui usufono na saunoa, e pei lava ona ou faatalaauula atu ma talosaga atu i le taeao analeila ia o le aga o lenei aso o le agaga o le faafetai. O le tatou Tala o le Tupe lenei ua uma foi ona tolaulau e le Malo ia ua manino ma malamalama mea uma, ae ou te manatu ua sagatonu lau o le fo i le faafofoga mai o tatou itumalo ia ona faigofie ma puupuu ai lea o le tatou Fono. Na ona tuu atu pea i tafatafa o sui usufono mamalu e le i saunoa ina ia agai mai i totonu saunoaga e tusa ma le auga o lenei aso, o le tatou Fono mulimuli foi lenei o lenei Paeaiga. Ae faamalo atu i sui usufono ua maea ona saunoa i le taeao ua tea.

Ae le i faia le tatou malologa ua faailoa mai e le sui usufono mo Vaisigano Nu. 2, ia tulai maia le sui usufono mo lau saunoaga i lenei taeao. Ae le i tuuina atu le avanoa ou te tapa lau Afioga i le Palemia mo le tatou lafo aua le faatulagaina o le tatou taimi faigaluega ona e i ai le talitonuga, ina ia soo fau le faaauauina o le tatou galuega i lenei aso fono, tulai mai lau Afioga i le Palemia.

### **LAFO MO LE SUIA O ITULA FONO**

**Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI:** Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faataatiaese tatou Tulafono Tumau 31(1), ia avanoa ai le suia o tatou itula Fono e faapea; 9:00 i le 1:00 malologa, ona toe amatalia i le 3:00 i le 7:00 i le afiafi.* Seia oo lava ina maeʻa felafolafoaiga i le tatou Tala puupuu o le Tupe. Ia ma maua ai foi se avanoa seʻi molimoli atu ai le faafetai ma le faamalo a Afioga i sui usufono mamalu o le Fono Aoao Faitulafono i itumalo sa o latou filifilia i tatou uma. O le toe Fono lenei a le Palemene ia ma ua alagatau foi ona faafogafoga mai le itumalo i le agaga o le faafetai ma le faamalo. E tataua ona tatou toe foʻi i o tatou itumalo e momoli i ai le agaga faafetai i le sao o a latou filifilia ua filifilia ai tatou. Ia tatalo ia toe aumai uma lava tatou nei ae tapuai mai isi mai tua, ia manuia le tatou Fono.

*Faaluaina e le Sui Palemia, Minisita mo Galuega tau Alamanuia ma Atinae a le Malo, ma le Minisita mo Tina ma Tamaitai, Atinae o Nuu ma Agafesootai.*

*Na faamaonia le lafo.*

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

**FOFOGA FETALAI:** Ia ua suia nei a tatou itula Fono, o le 1:00 tatou malolo, saunia le tatou taumafataga masani o le aoauli, tatou toe amata i le itula e 3, 4, 5, 6, 7. E i ai le tuutuuga, o taeao aena e tali ai le Malo, na ona faapena atu. Ia le sui usufono mo Vaisigano Nu.2, tulai mai mo lau saunoaga.

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2015/2016.*

**Tofa MOTUOPUAA UIFAGASA AISOLI VAAI (Vaisigano Nu.2):** Faafetai i lau Afioga i le Fofoga Fetalai mo le avanoa, e muamua ona sii le viiga ma le faafetai i le Atua i lenei aso ua maua luga pea le aoina o le masina i so outou soifua ma so matou ola. Le paia o le Malo ia faapea foi le Taitai o le Itu Agai ma lenei itu, faafetai i lau Afioga i le Fofoga Fetalai e momoli atu le faafetai a lou nei sui usufono i lau Afioga faapea le aufaigaluega o le tatou Fono nei i le Susuga i le Failautusi ma le Sui Failautusi aemaise le aufaigaluega. Malo le faatoatoa, malo mo le faafoeina o tatou fonu i lena lima tausaga ua teā, malo le faitonu saō ma le faitonu lelei. E ui foi ina luga, lalo ia tatou fonotaga, ae malo lava i lau Afioga le lavapapale ma le lava o lou onosai. E faapena le tagata e faatuatua ma ola i le Atua, faamalo lava i lau Afioga ia faapea foi le aufaigaluega.

O lenei aso na i ai le manatu e faaumiumi laititi lava se lauga ia ae o le faapuupuua ona o lea ua musumusu mai si ou uso o Lealailepule, Motuopuaa 'aua le faaumia sau lauga e le o se maliu le mea lea e fai. A umi loa o lona uiga o se maliu ae faapuupuua e iloa ai o lena e te fiafia. Ia e puupuua foi le lauga i lenei aso.

Lau Afioga i le Palemia po o le Minisita o Tupe na ona ou soso atu lava i le vaega lea \$1.5million. Na o le pau a le talosaga i lau Afioga ia faapea foi le Minisita ia atonu e faaitiitia lava nei mea o le ave o gasegase i falemai i atunuu i fafo pe a lelei ona faatotoga le tatou Falemai tele. Ia ma ave a tatou alo ma fanau Fomai ua iā mai e fai nisi a latou aoaoga pe ave i Niu Sila ma Ausetalia, o i ina e tele ai le tomai ma le iloa. E moni a o lea e ave i Fiti ae o Fiti ua tai tutusa lava ma tatou le malamalama. E pei lava foi ona ou talanoa atu ai i le Tala o le Tupe ua tea, a ave a tatou alo ma fanau pei o alo ma fanau a Papua New Guinea la e laō agai i Ausetalia i le latou polokalame. Ua le o toe lauina ni mā a Papua New Guinea e taoto i Ausetalia ona ua tele le tomai o alii ma tamaitai fomai o lena atunuu ona o latou aoaoga o lo o faia i Ausetalia. Ia ona uma ai lea o lou popole ma lou faitio i le ave soō o mai e taoto i atunuu i fafo. Ae e faapena lava se atunuu e vaivai lona tamaoiga. O Niu Sila foi e le lava foi le latou tomai i nei mea o gasegase, sa masani ona ou alu i Ausetalia ou te faigaluega ai i le Royal Melbourne e laō atu lava ia mā a Niu Sila e taoto e fomai Ausetalia ona e le lava ia le tomai foi o fomai Niu Sila ma latou foi meafaigaluega, ia e faapena lava le olaga. Ae o lea e toe soso atu ai i lau Susuga i le Palemia ina ia vaai ni tatou alo ma ni a tatou fanau ina ia aotauina i metotia fou ma technology fou, ona tatou le toe maua ai lea o se popole i le toe lau o tatou gasegase i fafo.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

A o lenei taimi, se i ou paʻi atu i si o tatou itumalo ou te faafetai atu i loʻu itumalo le onosai i lenei 5 tausaga, faafetai i lo outou filifilia o au e fai ma outou sui usufono i totonu o lenei Palemene. I le paia aua Aiga ma Sataua, lau fetalaiga Lealuga, ia le paia foi aua Utuutu ma Fuitau, Luasiufanua ma Ufagalilo faapea oe Tagaloa le alii o le Nuū ma le mamalu ia te oe Fagasa. Ia faafetai atu foi i Auauna paia a le Atua o lo o alaala i totonu o loʻu itumalo, lau Susuga i le Toeaina Amia ia faapea ia Auauna paia a le Atua o lo o faapena ona ositulaga mo le tauasuina o le Vai o le Ola i totonu o si ou itumalo.

O lenei taimi e momoli atu ai lau faafetai tele, e le galo lava a outou upu na fai mai, 'Motuopuaa e le i aveatua le tofi e te alu ai e te faalue i le Nofoa.' Ioe, o upu a ia a toeaiina o loʻu Komiti na fai mai ia te au ma latou apoapoiga, alu e tautua le tatou itumalo aua e te tautua fiamatai ae ia tautua ma le faamaoni. Ia loʻu itumalo, o le a se tautua ua faia e la outou auauna, ia pau lava o le mea ua oʻo i ai loʻu malosi ma loʻu mafai. Ia tau ina ia alofa le Atua a o tatou alo atu i lena faamoemoe i le masina fou, o ai lava se o le a filifili mai ia faapena ona faamanuia le Atua.

O lenei taimi lau Afioga i le Fofoga Fetalai, ua maeʻa le lauga, ia manuia tele lau Afioga faapea foi le aufaigaluega i Taitai o le Malo ma le mamalu o le Kapeneta ma lena itu ia ma le Afioga foi i le Taitai o le Itu Agai faapea foi lenei itu. Ia talosia ia tatou te toe foi uma mai i lea tausaga po o lea masina pe a uma le Faiga Palota. Ia manuia tele lenei aso faamanuia mai le Atua, ae ou ola i Lona alofa ma Lona agalelei, faafetai.

**FOFOGA FETALAI:** Malo faafetai saunoa i lau Afioga i le sui usufono mamalu o Vaisigano Nu. 2, ia Motuopuaa ia o le a faapena foi ona matou tapuaia lou alofaiva. O manu na aua le tatou faatamasoaliiga.

Ia tulai mai le sui usufono mamalu mo Aleipata Itupa i Luga, Tofa Fagaivalu tulai mai mo le saunoaga.

**Tofa FAGAAIVALU KENRICK SAMU (Aleipata Itupa i Luga):** E momoli atu le faafetai i lau Afioga i le Fofoga Fetalai e tusa ai foi ma le avanoa se i taumafai atu ai se sao puupuu o lenei itumalo o Aleipata Itupa i Luga e tusa ai foi ma lenei Tala Faatatau Faaopoopo o Tupe (Nu.1) 2015/2016.

E muamua ona ou faatulou i Tiafau nei o le Malae o le Faautugatagi a le atunuu, i le afio o lau Afioga i le Taitai o le Malo aemaise le Sui Palemia ma le mamalu o le aiga Kapeneta. E faatulou atu foi i lea itu o le malu i le afio o le Taitai o le Itu Agai ma le latou vaega toaitiiti lava. E faatulou atu foi i lau Afioga i le Fofoga Fetalai aua o lau Afioga e te faatonu folau aua le fonousu a le atunuu.



26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafaiga i luga o le faitauga faalua**

E faatulou atu foi i le paia i tamalii ma tupu i Faauluuluga o Matagaluega taitasi aemaise o Faalapotopotoga a le tatou Malo, aua e le faagaloina lo latou sao taua aua se manuia o Samoa mo a taeao. O lenei itula ou te faaleo le agaga fiafia o lenei itumalo e tusa ai foi o le Tala Faaopoopo o le Tupe ma ua i ai le lagolago aua e talitonu, ia o seleni aua le faaauauina o galuega tuua a le tatou Malo aua se manuia o le tatou atunuu. E talitonu foi le mafaufau ma le agaga e tele foi talosaga o lenei i itumalo ua taoto atu i le paia ma le mamalu o outou Minisita. Ia ae talitonu e le i fausia Roma i se aso se tasi, na ona toe tatalo atu i lo outou paia ia se i tautuana, afai ua le faatinoina i lenei Paeaiga, ia tatou tatalo i le Atua i lena foi taeao o lo o fofou mai. A o le aga o lenei itumalo ma lenei tootoo, e momoli atu le faamalo ma le faafetai ma le lagolago i lenei Tala ua taatia i le Laulau a Fono.

Ae ou te le i tuua le Maota lenei, e aveatu foi sau faamalo ma sau faafetai i le Taitai o le atunuu, le sui Palemia ma lou auvaa. O lea ua mapu nei i tialogo ma tiuvaai i le seugalii ina ua salanaa lupe o le taeao ae faaifo le naaloo i lona taogamutia. A aē se faatamasoaliiga po o se faatautaiga ma le manuia ona lafo lea o le faamalo, malo le tautai ae. A faaifo foi ma mapu i falega tautai o le vao ona lafo foi lea o le faamalo, malo le galulue. A tuta foi i fanua ma le manuia se folauga ona faapea lea, se ua malo le folau. O le lagona ma le agaga ua fiafia e faaosofia ai le manao ua faamalieina.

Lau Afioga i le taitai o le atunuu ma lou auvaa ua faamalo galulue, faamalo le fai o le faiua aua e talitonu e le faigofie la outou pitolaau. A o le mau a le itumalo lenei e le o upu ma tala a o galuega vaaia o molimau ola ia o lo outou soifua galulue aua le tautuaina o Samoa mo sona lumanai manuia mo a taeao. Malo le faatoatoa, faafetai le faapalepale, malo le onosai e le faigofie lo outou fitaituga aua se manuia o Samoa mo lana tapuaiga a o feagai ai ma ana Fonousu i lenei 5 tausaga o le a maea atu. O lo o sisila fofoga alofa o le Atua i le faataunuuina o tiute ma tofiga e ala lea i la outou faatofalaiga ma le faautautaga fetuutuunai lelei mo le atinaeina o si o tatou atunuu.

Lau Afioga i le Fofoga Fetalai ona faaiu ai lea o se faamatalaga a lenei usugafono i sau faafetai isi ou itumalo pele o Aleipata Itupa i Luga, i le amata mai i Ulutaotogia, Vailoa seia paia Lalomanu. I le afio o lau Afioga Sagapolutele, afio mai le Matua ia Falanaipupu, le taofia a Taiai ma le mamalu ia Saoluafata. Susu lau susuga le Sea ia Semi Iosefatu, afio mai le Saofetalai ma le Falelima o Alii, le paia ia Alaalamalae, maliu mai le Matua ia Tualemoso ma le mamalu ia Saleleaalii.

Susu lau Susuga i le Faafeagaiga Taulagi ia Etisone Gafa, o le paia lava lea aua le afio o le Tuiatua Faanofonofu, afio le falefia o Alii, afio Amituanai o le Maopu o le Tuiaana, susu i laua Suafa, le Toafa o Tootoo, le Igoamatua ma le mamalu ia Saleaamua.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Lou itumalo e, e amata faaleo sau faafetai i le afuaga o lou nofoia o le ta Nofoa i totonu o lenei Palemene. O lau filifiliga ma le faatuatuaga sa le sailigofie lona tali aua ua na o le Atua e faaleagaaga lana filifiliga. Peitai sa ou galue lava ma le loto fiafia i lenei Paeaiga atoa ma lou talitonuga, sa faaleagaaga lou finagalo i loʻu filifiliaina e fai ma sui o le ta itumalo e faaleo ta manaoga i le Maota lenei. Ua e manino ia te au e le o aʻu o se tagata e i ai se tamaoaga, e le o au foi o se tagata tauoloa, pe ou te soona tu pe laa i le ta vatausi. Peitai ua na o au se tagata na aoaoina ia ou iloa ona ola i le alofa ma le loto mauualalo, o ala ia e finagalo i ai le Atua. O lea ua ou pale i le tofi le tapagaiā nai le gataifale o le uluai Tumua, aua ua aʻe malo le folauga a le Palemene i lenei Paeaiga. E ui i fita ma faigata sa feagai ai ae sa tulivae lava ile Atua, ina ia toiā saʻu galuega mo lau tapuaiga leleoa. Faafetai le tapuai, faafetai le tatalo, faafetai le faamalosi, o lou aao faatalofa ma lou sagisagi fiafia mai, o isi auupega ia sa fai ma malosi e saga faaosofia ai le agaga finau i lenei Paeaiga o le a alu atu. Ou te faamalulu atu foi si ou itumalo po o lea lava se mea ua oo i ai le taumafaiga, ua pau lava o le fesoasoani mai o le Atua i la outou auauna faatauavaa. E le o toe faailo foi le sagai atu o le atunuu i lana faiga filifiliga mo le isi Palemene fou, ae o se avanoa lenei e momoli atu ai lau faafetai i le tatou itumalo, o fea lava o le agai iai suaga ole vaatele, ou te talitonu o le finagalo lea o le Atua. Ae i ai le lagona ma le manatu sa ta mafuta faatasi ma atiaʻe o a ta aiga talu ina ou itiiti, sa ta matitiva faatasi, talu ona ou itiiti, ai o le ala lea ua outou faapale ai aʻu lea ua ou ula i lenei lima tausaga o le a mou atu. Ou te malamalama lelei i ou manaoga, aisea? E leaga o le ta militino ma mafuta faatasi i taimi uma o le tatou ola. Ou te malamalama foi i ou faamoemoega e leaga o lo o ta tautua faatasi i aso uma i totonu o le tatou itumalo. Afai o le a se taotoga o le a taoto i ai le finagalo o le Atua e ala i faiga filifiliga, ia tatou maua pea le filemu mai le Atua. O le tatalo ia i ai pea le agalelei o le Atua i aiga uma o le tatou itumalo, ina ia tumau pea le filemu ma le tatou ola feoeoeai. Alofagia foi e lona agaga ana Auauna tofofi o le Talalelei, ia maua pea le loto toa e folafola ai lona finagalo, ia maua ni agaga mo lona malo e faavavau.

Lau Afioga i le Fofoga Fetalai, e momoli atu foi alofaaga ma faamanuiaga a lenei itumalo mo lau Afioga, aua o oe sa e faatonufoalauina le sa o le atunuu i lenei lima tausaga o le a mou atu. Ia faamanuia le Atua i le tapuaiga a Samoa mai ona ao seia oo i se aupito itiiti. Manuia lau Afioga i le Palemia, manuia sui usufono mamalu uma o lenei Fonousu a Samoa, manuia le alofaiva o le tatou atunuu i lana faiga filifiliga. Soifua ma ia manuia.

**FOFOGA FETALAI:** Malo, se e iloa lava tama o le Matamatagi e malosi le leo. Malo le onosai, ia tatou lafo laia o le faatuatuaga i le Atua o ia e taimatalii i mea uma. O lea foi ua logona le Maota i lau saunoaga ma le faafetai i le atunuu aemaise foi le faafetai ile itumalo, malo saunoa.

Ia ua avanoa pea le tatou Maota mo se sui usufono mamalu e fia saunoa. Ia, e faigofie lava na fai lau faaiuga ae o le ava tele atu ona o le tatou Fono mulimuli lenei.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

Ia, tulai maia le sui usufono mo Faasaleleaga Nu.3, Tuileutu. Ia afai ua gona le maota tulai mai ia oe e vavae foe, o se tasi o sui usufono Matua o lena Itu o le Maota, aumai le tofa. Tulai mai le sui usufono mamalu.

**Tofa TUILEUTU ALAVAA VOI (Faasaleleaga Nu.3):** Ia, faafetai mo le avanoa i lenei vaega o le taeao na lua. Lau Afioga i le Fofoga Fetalai faapea foi le paia tele o le Maota, o le Maota o Samoa, le malae o malo, o le Faautugatagi a Samoa i lenei taeao. Ae peitai o lenei aso e le o se taeao na afua o le taeao na loma ma o le aso na lupe, o le taeao na fuafua, lea ua tatou tauaofia i le futiafu e tasi i le alofa o le Atua.

Lau Afioga le Fofoga Fetalai ma le mamalu tele o le Maota, ua tulai lenei sui usufono e fai foi se sao ia manuvao e tusa ai ma fuafuaga o lea ua lelea le laumeavale ua palasi foi le taulaumea, ua ifo foi i tialogo le lupe sa faalele aua faigamea a le Malo o Samoa aemaise lau Afioga i le Palemia faapea foi le paia tele ma le mamalu o a tou Afioga, le Afioga i le Sui Palemia faapea foi le Aiga Kapeneta ma le mamalu tele o sui usufono o le Maota i lena Itu e faapea foi lena ituvai. E oo foi i le Afioga i le Taitai o le Itu Agai faapea foi le Sui Taitai. Ia ee ia lau Afioga i le Fofoga Fetalai, e te tu i Matagiolo e faatautai Samoa i se manuia, aemaise o upufai o le malo. Ae peitai o lenei aso, o lenei ua ou tulai e talitonu lava le agaga ma le faamoemoe, e le o toe i ai se lagona e tusa ma le tala ua fofola nei le Tala Faaopoopo o le Tupe 2015/2016. O lea ua manino le mata ole vai ua taoto foi i lagatonu, ma e leai lava se isi foi e toe manatu aua o le folasaga e pei ona... Ae peitai o le aso, o le aso lava ma le filiga, o le aso foi pei ona ua taoto nei i le malaefono. E au foi le taofi i le fuafuaga a le Malo aemaise le Tala Faataoto o le tupe mo se manuia o le atunuu e faapea i lea taimi i lea taimi, i lea Paeaiga i lea Paeaiga, e oo mai foi i lenei Paeaiga fou ua tatou aulia.

E i ai le lagona e le tele se faamatalaga a o le agaga, ia ua ou tulai tau a na ou faapea ane ma ou manatu ane, e leai o le folauga a le Soama e faila tu i ama. E manatu foi i le tapuaiga a si ou itumalo i le talimau mai ma nopiai mai ma tui pea le mulipapaga ma ololo nonofo, leaga e le i tunoa ona filifilia lenei sui usufono po o au nei e avea ma tofi o le itumalo. I le tapuaiga ia la outou Afioga i le Faletolu, Faga, Saasaai ma Saipipi, i le paia o le Aiga Taulagi. Afio Vaafusuaga ma Toleafoa, ae faapea foi Tootoo aua Salemuliaga ma le Faleaana. I le la ituvai mai Ogevasa seia paia Siufaga ma Vaimolialii, i ona maota ma ona tulaga maota, o le paia i le Taulagi e Taulagi mea uma. Taulagi ou maota e taulagi ou malaefono, e taulagi ou Tupuaa Tausi e faamemelo i ai le taofi. Faafetai ma faamalo i lo outou tapuaiga, ae a le tapuaiga foi a Sa Levi i le aufaitaulaga, o le Aufaigaluega Paia a le Atua.

Le paia i a outou Afioga i le afio o Tofa faapea foi le Aiga Sa Tofa, Susu le Maopu o le Taulagi, le mamalu tele i le Falefitu ma lau fetalai Tatau. Le paia i le ituvai i Vaiana. E talitonu le faamoemoe i lau tapuaiga Vaafusuaga ma Tea ma Usoalii le Malaefono ma le paia i lau fetalai i le Matua Fetalai lau Tofa Segi ma le Puleileuu ma le mamalu ia te oe le fale Salemuliaga.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ia le mamalu i le la ituvai i le paia i le Toaono, ia Toala ma Nonumalo, o Unasa ma Ufagalilo, Filoialii ma Sooaemalelagi. Tapuaia ma puipui aua lo outou toafa, Fili ma Vaisau ae a Laufiso ma Tapuala, ae a le tagata o le aava le Matua ma le tapuaiga i le Faleaana ma oe Salemuliaga. O paia e le vaea ma tulaga masani e le oo i ai se taofi, ae manatu ua mavae lenei Paeaiga ma tulaga... ia o le agaga faamalo ma le agaga faafetai. O ai le tagata ua manatu i ai ua filifilia ai? E le i faigofie sa outou filifiliga ae lea ua aveai aveai tatou taunuu ina ua tuta le sa o Samoa i lenei Paeaiga. E faafetai tele e leai se faiva e asa ma le maumau so o se tautai lava e leai foi se tautai e sii se vaa ina ia asa, ae a sasi pe vale foi, ia o le soifuaga, matou te faamalu atu ma avatu foi malu i puega i la outou tapuaiga pe a ua le auau le tulaga o le tatou feagai a o sa outou faafofoga ma sau faalogo, leai o le atunuu o le ia iviivia o le Faigamalo o le iavai o maseesee, e le faamalieina e se tasi, a o le filemu tatou te ave i le Atua, ia fusia i tatou ia maua e Samoa se atunuu lea o lo o i ai, e maualuga le alofa o le Atua ua mafai ai ona tau lau o le faamoemoe. Ia Aiga e, faapea foi lau susuga i le Toeaina lau susuga Kaleve, Leifi le Aufaigaluega paia i ona fata e fia, aemaise foi le tapuaiga mamalu i le tatou ekalesia le susuga ia Alofa Ale faapea foi le tatou ekalesia i Nuua, i Aoa ma Tiakono faapea foi le mamalu tele, faamalo le fai o le faiva. Faafetai foi tatalo ma fesoasoani ua atoa ai ia o le sa.

O le agaga maualuga o lenei aso, e avatu le faamalo ma le faafetai, lau Afioga i le Palemia e le fuatasi e le o se galuega tofi le valaauina, faapea foi le mamalu tele o a outou Afioga i Minisita, lena ituvai Afioga i sui usufono mamalu uma o le Maota aua lo tatou va feagai faapea foi lenei ituvai le Afioga i le Taitai nei o le Itu Agai, leai e talitonu le faamoemoe e tasi lava.

E maualuga foi le faafetai i lau Afioga i le Fofoga Fetalai, o oe lava o le fati faafuagalua, o oe o le lauu tele e malu ai le atunuu, e faatusa oe i le aila ma le mea foi lea o le sevi i le mauga foi lea o Peteli, e faapena e le o se mea faigofie, so o se mea tiga, o ona tua atu o mea aupito sili ona lelei, ioe.

Samoa e ma le faafofoga mai, e le o toe po se lilo i lenei Tala po o le mataupu foi i tulaga pei ona tulai lou sui usufono, ia e leai o le na ua faaiu foi se tulaga pei ona i ai. A o le agaga faamalo ma le agaga faafetai, o ai na iluulu ma talotalo i le Nofoa o le itumalo, ae faafetai tele o galuega lelei mo le atinaeina, a o le mea o le alofa e iloa i galuega. O le mea lea i lenei itula ma lenei aso, e le au e le lava sau upu e faafetai atu, aemaise o le tapuaiga foi i Lana Afioga Mamalu, O Le Ao o le Malo, le Sui o le Fono a Sui Tofia, i ona tumutumu mauga e oo lava i ona vanu loloto, le tapuaiga mamalu, ia le Aufaiglauega paia o le laumanusina e malu ai Samoa aua le Atua ma Lona finagalo.

A o lenei taeao ma lenei aso, e avatu ai le agaga faamalo ma le agaga faafetai, ia tatou saili ia i le tai, o le agaga, ia saili i le tai se ua agavaa, saili mai i lagi, e aumai e le Atua ni tofiga fou ma suiga fou, aemaise foi o le tatou aga atu aua lenei tausaga, ae a ni.....o fou mai le XVI nai Paeaiga a le atunuu, ia alofagia e le Atua ia sao ma uli, tautai lo tatou Matai ma fusia i tatou e tusa ma le Faavae, Faavae Samoa i le Atua. Ia manuia le Fono.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

**FOFOGA FETALAI:** Malo. Ia aumai se tatou patipati tele i le saunoaga mulimuli a le Afioga i le sui usufono mamalu. E manatu foi e le o toe na ma se laina le tautinoga a le sui usufono mamalu, e le toe tauva i le tatou Faiga Palota o lumanai nei.

E momoli atu foi le agaga faafetai ma le faamalo i lau Afioga i le sui usufono mamalu mo Faasaleleaga Nu. 3, le sui usufono, leaga o lena sa e maa faafuagalu i lena itu o le Maota, e le faagalo Afia isi ona vao i le tatou mafutaga i lenei lima tausaga, o lau tofa tatala ma le tofa saili, sa saili i ai manuia o Tiafau. E talitonu foi le faamoemoe e le faagaloina foi se mafutaga sa lelei, sa e fautua, sa e timai, sa e tuualalo, sa e faafetai foi i lenei taeao o le ua papaaveloa foi tuleiga ma saunoaga, o le matou tatalo, ia alofagia e le Atua lou soifua. O le faaiuga foi o se isi galuega taua, o le amataga foi lena o lou valaauina. E le faigofie le filifiliga a lo tatou itumalo aua le paia taulagi ia Samoa, Vaafusuaga ma Toleafoa, Toaono Aliifaga ma le Faleaana, ia matou moomooga alofa na ia tumau pea le soifua manuia, o se aso, ia e i ai foi galuega a le Malo e te aoga ai, matou faamanuia atu ia ma manuia le tapuaiga.

Lo tatou Maota, ou te taofi e le tau tauanauina lo outou paia pei lava ona ou fai atu i le taimi ua sola, o le tatou Fono lenei e ese le Fono lenei, o le Fono o lo o faalogologo mai itumalo o le tatou faafetai lea ua momoli, ae leaga le mea lea o le tauanau e le Fofoga Fetalai e faafetai se isi. E avatu pea le tulaga i tulaga aloaia e faaoga avanoa. O lea ua oo le tatou Fono i le aoauli i le afiafi a nanei ona o le manatu, o le avanoa lenei e momoli ai le upu i le itumalo, e le afaina le Tala Faatatau Faaopopo o Tupe e le toe tautalagia ma malamalama, ae o lea ua faagasolo le tatou faafetai i itumalo ma le tapuaiga a Samoa, aemaise le tatou faiga filiga o lo o lumanai nei. Ona ou manatu lea lo tatou Maota, sa ou manatu e tatau ona tufi tauafoa le avanoa. O lea e maitau atu pei e faatutugata lo tatou Maota i lenei taeao, ia ae alo maia, aumai le tofa le sui usufono mo Anoamaa Sasae, o se tasi foi o sui usufono matua o le tatou Maota.

Tulai mai le sui usufono mo Anoamaa Sasae.

*Na faaalua le agaga fiafia o sui usufono i le patipati o latou aao i le saunoaga mulimuli o le sui usufono mo Faasaleleaga Nu. 3.*

**Tofa ALO FULIFULI TAVEUVEU (Anoamaa Sasae):** Faafetai mo le avanoa taua lau Afioga i le Fofoga Fetalai. E manatu e pei lava ona saunoa, o se tasi lenei o Fono taua o le tatou Paeaiga o le tau faaiiuga o lenei Paeaiga pei ona alo i ai ia le mamalu o le Palemene i ia foi tausaga e lima ua mavae nei. Ae o le a taumafai atu, a sau se taimi ona avatu lea o se faamatalaga e tusa ai ma le Tala Faatatau Faaopopo o Tupe (Nu. 1) 2015/2016 e i ai lava le manatu o le avanoa lelei lenei, se i taumafai atu ai se faamatalaga aua le faafogafoga mai o le itumalo, aemaise foi le faamoemoe o le itumalo aua le faamoemoe i le alo atu i le Faiga Palota i lenei tausaga.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

O le paia ma le mapuepue o Tiafau o le Malae o le Faautugatagi o Tumua ma Pule, ou te faatulou atu. O le paia lea o le Maota o Samoa o lo o taoto ai le ato ponapona o lo o utuvai ma saili ai manuia o le atunuu, ou te faatulou atu.

Ua atoa i lagi le tatou faapolo e ala i le.....malu a le tatou Tapaau ma lo tatou molimoli atu ai pea le faafetai i luma o le Atua, e ala i le faafetai na momoli e lau Afioga i le Fofoga Fetalai. Ae ua ou faatauina lenei avanoa, se i molimoli atu ai se sao o lenei itumalo aua le tapunia o le Paeaiga Lona XV o le Palemene o Samoa.

Tulouna ia le paia le avea o le Faigamalo o Samoa, le afio o Lana Afioga Mamalu, O Le Ao o le Malo, lau Afioga Tui Atua Tupua Tamasese Efi ma lau Masiofo. Afio le Sui o le Fono a Sui Tofia, afio Afioga i Faamasino Sili, le paia lava lea i le Ofisa o Faamasinoga. Afio le Afioga i le Palemia ma lau Kapeneta, afio le Afioga i le Fofoga Fetalai, o le Fofoga o le Maota o Samoa, afio Afioga i alii ma tamaitai sui usufono o le Palemene o Samoa, afio Faauluuluag o Matagaluega a le Malo. Tulou, tulou lava.

O aso faapenei e le avea le fala ooto le paia o lo tatou atunuu, mai le taisamasama o Tuimanua na alofi ai Tupu ae paia lava le tai ulaula o Nafanua na saili ai Malo. Tulouna le afio o Tama ma Aiga, Aiga ma a latou Tama, Aiga i le Tai ma le Vaa o Fonoti, o le paia lava lea na tausi vaatele i le Usoga a Tumua. E le faagaloina Afia isi ona vao, e faapea foi le Aufaigaluega a le Atua aua se manuia o le atunuu mo le lumanai.

Le Faigamalo a Samoa, ou te faatulou atu. E le faagaloina foi le seu silasila a nai o tatou motu tuaoi, Faleagafulu, le paia tele ia Sua ma le Vaifanua, Fofu ma Aitulagi, Ituau ma Alataua, ma oe le Launiu na Saelua. Le paia lava lea e tausi vaatele i le fetalaiga i le Tama Matua, tulou, tulou lava. Le paia o Motusa i le afio o le Laau na Amotasi, afio le Faatui ma Tootoo, puipui le fetalaiga i le Tootoo, tulouna, tulou, tulou lava.

E le faagaloina i le loto ma le agaga le tui mai pea o le mulipapaga a lou itumalo pele o Anoamaa Sasae, i le afio o le Tui Atua, afio Seutatia na alaala i maota. Susu le Toaono ma le Saofaiga o le paia na ia te oe Tumua Lufilufi. Afio le Tapunuu, afio le Fuaifale o Salevalasi, susu le Matua ia te oe Lufilufi, o paia na o le alaalfaga i Manunu. Afio lau Afioga Afoa le Matua ia Lefauseu, susu Ti ma Tagata, ma oe Lufilufi, o paia na o le alaalfaga i Lalomauga. Afio Aiga ma se Faatauevaga, afio Usoalii, Tama o le Paepae, mamalu mai oe o le putuputu o tagata o le Tui Atua, o paia na ia te oe Saletete. Afio Aloalii ma Aiga, alaalfatai Mutau ma oe Leatua Faleono ma le Faletolu ma le putuputu o tagata o le Tui Atua. O paia na ia te oe Sauano. Afio Gagaeolo ma le Suafa Neioti, afio Alae o le Alo o Malietoa, mamalu mai oe le Falelima o le siitaga fita, aemaise o le putuputu o Tagata o le Tuiatua. O paia na o le alaalfaga o Falevao.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Afio Aiga Sa Fenunuiavao ma le latou Tama, afio le Aiga Sa Alaiasa, afio Aloalii, alaalatai Matua ia Iuli ma Moeonono, mamalu mai le tofi faasolo i le aai o le Tupu, le paia lena o si ou nuu o Falefa. Tulou, tulou, tulou lava.

Lau Afioga i le Fofoga Fetalai, ua tatou oo mai i le faaiuina o lenei Paeaiga o le Palemene o Samoa, ua ta manatu ai o se avanoa taua lenei se i taumafai atu ai se faamatalaga aua le mamalu o si ou itumalo o Anoamaa Sasae. Ou te manatua ai le tala a le Afioga a le Atua, ina ua amia e le tupu o Tavita le atalii o Ionatana lana uo e talisua faatasi ma ia i le maota o le Tupu. O le agaga faagaetia o lenei taulealea o Mefiposeta na ia faapea atu ai i le tupu o Tavita, o Lau afioga i le Tupu, o ai ea lau auauna ina ua e silasila i le uli mate, e pei o au nei?o Anoamaa i Sasae, se o lau pule lea, o sota manatu valevale na lafo atu, faafetai le itumalo i lenei fa tausaga ma le afa na outou tuuina ai au i luga o lenei Nofoa, faamalo faafetai. Faafetai faafetai tele mai le taele o lou agaga aua o ai lo'u tagata se i tulou le paia o lenei aofia. O lau pule lea Anoamaa Sasae. Lota naunau e ta te fia tautua pea mo oe si ou itumalo, peitai, ua le ogatasi le futia ma le umele, na ta popoe nei avea lota manao e aafia ai le Nofoa o le itumalo. O le ala lea ua ou manatu ai, o le a ou see pitovao, ua le atoatoa le malosi. O le mea lea ou te faapea atu ai lou itumalo e o Anoamaa Sasae, lo tatou itumalo e, o le tatou tofi lena, tuu atu le alofa ma le agaga moni ina ia saili ai se tofa mo le tatou itumalo, saili se tasi e agavaa aua so outou finagalo i le Maota e pei ona loma nei.

Lo tatou itumalo, tatou faamoemoe i le Atua, e leai lava se mea tatou te maua ai le manuia. Afai ua le atoatoa sau tautua mo le itumalo, ia tatou faamoemoe pea i le Atua. O le agaga moni, e silafia lelei e le paia o le tatou atunuu o fau ma soloi, na ou nofo mai lava o taumafai le tatou itumalo. Ia le tatou itumalo e, o lena le faamoemoe, o le a se mea sa taumafai ai i sa outou silasila i lenei fa ma le afa tausaga, ona pau o se mea ua oo i ai le vaivai o la outou auauna.

Ae momoli atu lau faafetai i lau Afioga i le Minisita mo le Siosiomaga, sa maua tala i le faaiuga o le tausaga lea, na oo mai ai se faamatalaga ia te au, ua talia manaoga o si o matou nuu i Lalomauga. E pei lava ona silafia, tasi lenei nuu, i tausaga uma ma tausaga uma, e aafia i le vaitafe malosi o lo o tafe ai totonu o le aai. O lea ua oo mai le faamoemoe o le Minisita ma le Matagaluega, o le a amata galuega i lenei tausaga fou. Faamalo faafetai i lo outou talisapaia, ou te le i naunau i ni mea se tele pei ona avatu se lagona i le tele o le itumalo, ae o sau vaai tasi lenei nuu o le itumalo ua matua mafatia lava i tausaga uma. Faamalo faafetai i lau Afioga i le Minisita, faafetai mo lou talia, ia alofagia e le Atua ia fesoasoani atu i lau Afioga i le Minisita aua le faamoemoe mo lenei tausaga fou. Ae le gata foi i lea, o le taligalu o lenei itumalo, tasi lava lenei mea e tai tulai atu pea i tausaga uma talu ona nonofo mai, peitai, o lea foi ua maua le tala, e le o toe mamao ona amatalia lea o tulaga ia.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

Faamalo faafetai, faafetai le lagolago mai, aua na ou sau lava o tausailili po o fea ni talosaga na i ai i ia tausaga, a ua leva ona mafatia lenei itumalo. E tatalo atu, atonu o le tasi lenei avanoa, pe tulai mai foi se isi sui usufono, o le agaga moni, ina ia silasila i le itumalo, o lo o tele mafatiaga o lo o i ai.

Ona oo ifo lea i lau Afioga i le Minisita mo Galuega, Felauaiga ma Atinae Eeseese, ia faamalo, manaia moli o le auala galue i Falefa, e pei lava ona avatu talosaga, ae na vaaia lava i le tulaga o le saogalemu, e toatele fanau o lo o feoai ai i le po, o le mea lea, ua manaia ma lelei moli o le auala galue ae paga lea, o lo o e silafia, o lo o tele pea talosaga, e le i faatatau lava le auala. Ae taoto atu pea, o le tatalo, ia alofagia e le Atua ia toe taliu mai e faaauau galuega a le tatou nuu ma le itumalo.

O le faafetai lena i Afioga i Minisita, ae o lo o maua ai pea le avanoa e tatou te fetufaai ai aua le faamoemoe o lenei itumalo. Ona oo mai lea o se faafetai i lau Afioga i le Palemia, faafetai. E talitonu lava le taofi, e tele le tulaga faigata na oo i ai lenei Paeaiga. E molimauina e le faigofie lau pitolaau faa-Taitai, aua e le o taimi uma na folau ai le sa o Samoa e malu, e tele taimi ma le anoanoai e lualuta ai le gataifale ma toetoe a goto ai le sa o Samoa. Faamalo faafetai, ia alofagia e le Atua ia faatupu pea lou soifua tautua mo Samoa, e ala i lenei faamoemoe.

E momoli atu foi le faafetai i lau Afioga i le Fofoga Fetalai, e talitonu, e leai o lo oe lava tofi, aua ua silafia e Samoa lau taitaiga aemaise o lou tootoo e tu i le vateatea. Malo faafetai mo le taitaiga o lenei tausaga o le a mavae o le Maota. E ui lava ina tele fita, ae talitonu le taofi, e matua lava i le oooo o lo o manuia. E aoga foi mea e tutupu e saga faatele ai pea fuafuaga lelei mo le lumanai. Ia alofagia e le Atua ia maua pea lou soifua aua le tautuaina o le tatou atunuu e ala i tofi ma valaauina o lau Afioga i le Fofoga Fetalai.

Ona oo mai lea o se faamatalaga i ou uso a sui usufono, ua tele nei tausaga sa tatou feiloai ai i le Maota, e talitonu sa tatou fesuaai, sa tatou saili. E tasi lava le auga ma le faamoemoe ia manuia Samoa mo le lumanai. Tatou tatalo ina ia alofa le Atua ia toe taliu mai lo outou soifua ma toe maua atu ai nisi Paeaiga se tele ae tautua ai pea si o tatou atunuu.

Faafetai foi i lau Afioga i le Taitai o le Itu Agai, e ui lava ina le nofo mai, a o lea e nonofo mai ou sui. E ui lava ina vevesi le tele o taimi o le tatou Fonotaga, e le o se vevesi leaga, o le vevesi e faatoa atili ai le manuia mo le faamoemoe o Samoa mo le lumanai. Ia faamanuia atu le Atua i la outou nofoaiga, ia maua nisi sui usufono fou o le tatou Vaega, aua le tautuaina o le Vaega Faaupufai malosi.

Ia, ona alu alu lea ma se faamatalaga lau Afioga i le Fofoga Fetalai, ia manuia tele Taualumaga o totoe o lenei aso, tau ina ia alofa le Atua ia saga liligi faaua mai manuia i si o tatou atunuu o Samoa, ma ia tatou maua pea le mafutaga ma le Atua e maua ai le manuia. Ia faamanuia mai lenei aso ma tulaga o lo o totoe, soifua ma ia manuia.

*Na faaalua le agaga fiafia o sui usufono i le patipati o latou aao i le Saunoaga Faamavae a le sui usufono mo Anoamaa Sasae.*



26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafaiga i luga o le faitauga faalua**

**FOFOGA FETALAI:** Alo, e le faagalo Afia i si ona vao i le tatou mafutaga. E ese le taimi o le tagata, ese le taimi o le Alii. Ae manatu ua musumusuina oe, e tiga le naunau i le manao i le ufi ae ua e fefe i le papa. O le tulaga o le soifua maloloina, ia alofa le Atua ia toe faafoi le soifua maloloina, a o molimau o lo o molimau foi uso a sui usufono, e le galo le mafutaga sa lelei. O tulaga o le suaga o le vaatele i le tatou va faafeagai ai, faafetai faatamalii, o oe lava sa faatilo i ai le laumea i sui usufono, e aumai foi lau tofa e sau lava le fuauli e toa ai le moa. O lea la ua faafofoga le tatou Maota, malo saunoa faafetai fetalai. O lea foi ua oo le saunoaga i le tapuaiga ma le faamavaega aloaia i le tatou itumalo, e momoli atu le faafetai i le sui usufono mamalu. Alo, e tatalo pea i le Atua e sau se aso tatou feiloai ma faaaoaga lou tagata aua nisi galuega mo le lumanai, a o moomooga alofa na e momoli atu i lau Afioga i le sui usufono.

Ia, o lo o maua pea le avanoa i nisi sui usufono se toalua pe toatolu ae tatou te le i malolo i le itula e 1:00. Ia, o lea ua ou maitau atu ua tulai mai se tasi o sui usufono mo Vaimauga Sisifo, Tofa Lefau Harry Schuster. Lefau, ua manaia lava le taimi lenei o le aso muamua o le Fono, ua matagofie lava ou ata i luga o alatetele ma le magaala o le taulaga, lea e faapipii ai ou ata lalelei.

Ia, tulai maia le sui usufono mamalu Lefau, ua avanoa le Maota mo lau saunoaga.

**Tofa LEFAU HARRY SCHUSTER (Vaimauga Sisifo):** Faafetai lava i lau Afioga i le Fofoga Fetalai mo le avanoa. Tulouna lau Afioga i le Fofoga Fetalai, tulouna foi le afio o le Afioga i le Palemia ma le Kapeneta, ae tainane Minisita Lagolago. Tulouna foi le afio o le Afioga i le Taitai o le Itu Agai ma le Sui Taitai ma sui usufono uma o le Maota.

E faatulouna i le Failautusi ma le mamalu o le Ofisa, faapea Ofisa Sili o Pulega ma Pule Sili o Matagaluega ma Faalapotopotoga a le Malo o lo o tatou faatasi. Tulouna foi le tapuaiga ma le faafofoga mai a Samoa. Tulouna foi si o matou itumalo o Vaimauga Sisifo i lau tapuaiga ma lau faafofogaaga.

Lau Afioga i le Fofoga Fetalai e laititi lava nai manatu i le Tala o le Tupe, e muamua ona momoli atu le faafetai tele i le Minisita o Tupe po o le Afioga foi i le Palemia ia o le Afioga foi i le Pule Sili o le Ofisa o Tupe ma le mamalu o le aufaigaluega mo le Tala o le Tupe. E lagolagoina e loo sui usufono le Tala o le Tupe ona o le tulaga lea i lona aotelega, o le Tala Autu o le Tupe na tatou pasia ia Iuni pe a ma le \$700miliona e faatupe ai galuega a le tatou Malo. A o le talosaga lea e toe talosaga mai ai i le \$8 miliona ia o lau vaai atu i ai e i lalo ifo o le 10% o le tupe atoa lea sa pasia ia Iuni. O lau la vaai i ai o lalo ifo o le 10% o se taiala lelei lea, e atagia mai ai i o lo o lelei le faafoeina e le Matagaluega o le Tala o le Tupe a le Malo ma le faatinoina o le galuega. O le i si \$8miliona lea e suæ mai e tulai mai i mo mea faafuasei mai ae lei fuafuaina, o lea e lelei lava le faafoeina o galuega. O le tulaga la lea lau Afioga i le Fofoga Fetalai e momoli atu ai le lagolago i le Tala o le tupe pei ona faataatia.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafaiga i luga o le faitauga faalua**

Lau Afioga i le Fofoga Fetalai ia avea ia lenei avanoa taua ou te faafetai atu ai i lau Afioga ma ou te fia momoli atu ai foi le agaga faafetai tele i lou Itumalo o Vaimauga i Sisifo tusa o la outou faaeaea ma la outou faaaloalo maualuga e ala i le tofia o au o se tasi o sui usufono mo le tatou Itumalo i le Faigapalota o le 2011. Faafetai tele le faaeaea, faafetai le agalelei, faafetai le agaalofo, e momoli atu ai lau faafetai tele lava i lau Afioga i le matua lau Afioga Tofaeono aemaise foi le afifio o Asi ma Asi ma le aiga Sa Asi, afifio foi Afioga ia Patu ma le aiga Sa Patu aemaise aiga e tolu. Ia alalatai foi Tamapua ma Manogiamanu ma le nofo ituaiga ia te oe Fuata. Ia taliu ane foi se upu ma le faafetai aua le paia i le fale sagauga, tulouna le matua Faaolasa ma Augafiatele tulouna foi lau Afioga i le Alosina ma le alo o le Tuiaana lau Afioga Seumanutafa Aeau Tiavolo o le Aiga Salevalasi ia Tamaseu ma Taualo. Alalatai le Faletolu ma lau fetalai i le Vainalepa ia Lealalasa ma le fale fesiitai, lau fetalai Tuiletufuga, lau fetalai Letaa ia e faafetai tele atu mo la outou lagolago.

Ia tulouna foi le afio o le matua ia Leupolu aemaise foi le afifio o Leusoalii, afifio alo o Malietoa ma le Aiga Sa Malietoa, alalatai lau fetalai i le Faletolu ma lau tofa Atoa ma Fuaiupolu lau fetalai i le Vainalepa. Tulouna le afio o Sooiolo ma Aiga, e momoli atu foi lau faafetai tele i lau Afioga i le Alosina lau Afioga i le alo o le Tuiaana lau Afioga Toomalatai Fetaoai Lepili, susu foi lau Susuga i le matua le Alo o Malietoa lau Susuga Tauasa. Faafetai foi i lau fetalai i le faletolu, lau Tofa Pupualii aemaise foi lau fetalai i le vainalepa lau Tofa Tuaimalo. Faafetai foi i lo oulua toalua i lau Tofa Samau ma le fetalai ia Feagaimaalii aemaise lau Susuga Tuisamau o le Tumua o le Vaimauga.

E faafetai atu foi i Susuga i Faafeagaiga uma lava i totonu o Vaimauga Sisifo o lo o faanonomanu e le gata mo le itumalo ia ae mo Samoa atoa. Faafetai i la outou lagolago, o le malie ia o le tatou itumalo e i ai a faasinotonu i ai faalaniga ae i ai foi nai vaega ia e i ai ia le sau mai Taufusi, Palisi ia ma le faasolo atu i gauta i le Mauga Fiamoe ia e faale manino tele po o a faalupega e ave i ai. Ae faafetai ia te outou uma lava mo le tapuaiga. O lenei olaga ma mea e fotuaʻi mai, e i ai mea e mafai ona e mafaufau i ai ma e faatinoina ae i ai foi mea e te le mautinoa ae o mea ia e faataatia mai ai fuafuaga a le Alii. Po o a lava la auga o lenei olaga po o fea foi ou te oʻo i ai i faigamalaga o lenei olaga, e le galo ia te aʻu Vaimauga Sisifo lo outou alolofa ma lo outou agalelei ma le tou faaeaea. Ou te le iloa po o ai au ua outou aumai ai lenei faatuatuaga tele, ona o le nofoia e se isi o le Nofoa o le itumalo e le o se meaitiiti ae o se tulaga maualuga mo le itumalo ona. E le gata i tulaga faale-Malo ae o lau vaai a au ia faa-Loia i le Fono Faitulafono a Samoa, o le Faamasinoga aupito sili lava lea ona maualuga ia Samoa. Ou te le manao e faaita nai ou uso Faamasino ma nai ou uso Loia, ae e sili atu foi i lo le Faamasinoga maualuga ma le Faamasinoga toe Iloilo aua e moni o le vaega lena e faimai ai le faaiuga o le Tulafono ae le mafai ona latou pasia le Tulafono na o tatou e mafai ona tatou faia le tulaga lea.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

O le mea lea ua maualuga ai ia te au Vaimauga i Sisifo lau faaeaea ona na e filifilia au lea ua ou oʻo ai i le Faamasinoga pitosili a ona maualuga ia Samoa, faafetai tele i lau faatuatuaga.

E ui i le Tulafono o le Faiga Palota lea ua vavae ai le tatou Itumalo ua Numera 2 ia le Vaimauga Sisifo lea ou te i ai ae Numera 1 le Vaimauga Sisifo lea e i ai si ou uso a sui usufono o Lenatai. Ia o le Tulafono o Faiga Palota e na o le tasi lava le aso e faatino ai a o lea tatou tu ma le vaa faaitumalo e tasi lava le Vaimauga Sisifo ma e tasi foi lava le Vaimauga lea i ai Vaimauga Sisifo ma Vaimauga Sasae e tumau lava le tatou Faavae lea.

Ae o si au talosaga i le tatou itumalo o lea ua fotuā mai ma ua lata mai foi le taimi o lau faiga filifiliga, ma ou te talosaga atu ia te outou e faapea, amuia i tatou i Samoa o le Faigamalo lea tatou te i ai o se Faigamalo saoloto. O le Faigamalo lea tatou te i ai o se tasi o mea aupito sili ona matagofie ia te au e filifili e tagata lautele o le Malo ia latou e latou te taitaiina le Malo. E i ai foi ia poʻu ma lape o le mea lenei o le Temokarasi ae o laʻu lava vaai i ai e ui i lape ma poʻu ia o le Temokarasi, ae sili mamao atu lava lea nai lo Faigamalo ia e pulepuletutu e leai ni Faiga Palota ae pulea faa-Komunisi. O lau vaai a au ia faatagata ola, e talafeagai le Faigamalo lea tatou te i ai ma le finagalo o le Atua, tatou te talitonu i le Faavae o Samoa aua o le finagalo o le Atua ia saoloto tagata. E le i taugofie le mauaina e o tatou tuua o le saolotoga lea tatou te i ai. O le mea foi lea ou te faamamafaina ai ma ou talosaga atu ai, aua le mauaina ia lau aiatatau e te palota ma e filifili ai po o ai e te filifilia.

Le tatou iumalo Vaimauga Sisifo pule lava oe po o ai e te palota i ai, o lau aiatatau lena. O totonu foi o le tatou itumalo o lo o alaala ma papaaao ai foi isi e palota i isi itumalo, ou te talosaga atu foi ia te outou e faaaoga a outou aiatatau fai lau palota. E tai lima tausaga ma fai le palota faaaoga lelei le aiatatau aua e te maimauina. Ou te iloa foi e i ai isi ona o latou talitonuga faale-Ekalesia e latou te le lagolagoina lea tulaga o le palota, ia o lau aiatatau foi lena la i totonu o le Faavae ia ma e talafeagai foi pe a faapea e te auai i le talitonuga lea. Ae a faapea o oe e te le auai i le talitonuga lea a o lena e i ai lau aiatatau, faamolemole aua le mauaina lau aiatatau ae faaaoga lau aiatatau e te filifili ai lava oe po o ai e te palota i ai. O mafuaaga foi e te palota ai i tagata o lo o avea ma sui tauva e pule lava oe, e leai ma se feau a se isi tagata ola i le mea lena, o lau aiatatau lea na aumai i le Atua. O laʻu talosaga lena i le tatou itumalo, faamolemole faaaoga lau aiatatau e te palota ai i le aso 4 o Mati.

Lau Afioga i le Fofoga Fetalai e momoli atu laʻu faafetai tele lava i le Afioga i le Palemia ma le mamalu o le Kapeneta ma le Malo. O le tele ia o galuega lelei ua faia e le Malo mo le Vaimauga, faafetai o auala i totonu o le taulaga i Apia ua matua manaia lava. O tatou sui usufono ma le toatele o le tatou atunuu ua oʻo foi i isi atunuu o le Pasefika ma o latou taulaga - ma o laʻu vaai i ai, e tu lua ia le taulaga o Samoa i le tulaga tau auala pe a fua atu i isi atunuu o le Pasefika.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

O lea foi ua i ai le Falemai tele ma le maketi fou, ia ma le maota fonu o le Tui Atua Tupua Tamasese Efi, ia o atinae mo Samoa atoa a o lea e tutu i totonu o le Vaimauga e aoga tele foi mo le matou itumalo. Ou te faapea atu i lau Afioga i le Fofoga Fetalai ua talafeagai lava mea ia mo le Vaimauga. E i ai le faaupuga faapea, o le mea e lelei mo Apia e tu i totonu o le Vaimauga e lelei foi mo tua, ou te talitonu i le mea lena ae ia matua faamalosi le Vaimauga, aua a tale le Vaimauga pe maai le Vaimauga e maai uma lava Samoa atoa. O le mea lea ia faamalosi uma Samoa ae faasili le faamalosi e ave i totonu o le Vaimauga o i ina foi tatou te malosi ai. Ia ne i faapea mai Lealailepule ua a, ae faamalosi foi ma Faleata aua e lavea foi Faleata i totonu o le taulaga.

Lau Afioga i le Taitai o le Itu Agai ma le Sui Taitai ma le tatou Vaega Faaupufai, e momoli atu laua faafetai tele ia te outou aemaise lau Susuga i le Taitai mo le taitaiina o le tatou itu. Lau Afioga i le Fofoga Fetalai o le manaia foi lea o le mea lena o le Palemene, sa masani lava loou olaga i le Loia ia a o lea ua oou mai i nei i le Palemene. Ae o le faa-Loia o oe le isi itu o le isi Loia i le isi itu ae nofo mai le Faamasino e faia le faaiuga ma faatonutonu mai ouluga pe sao le mea lea e te lua fusu ai pe leai. A o i le Maota Fonu, e toatele le isi au, ae toaitiiti le isi au, ia o isi taimi e alu alu lava pei ua tau oso mai le ita ona o le toatele o le isi au. Ae faafetai tele i lau Afioga i le Taitai o le Itu Agai le faamalosi.

E i ai loou talitonuga o vaega o mea nei o Malo Faatemoralasi, e tataua lava ona i ai foi ia le itu e Agaia ia le Malo, tusa lava pe toaitiiti e le faitaulia le toatele po o le toaitiiti ae o le i ai o nisi latou te faia le galuega lea o le mea taua lea. Na o le pau a le mea e amata lava ona taalo atu i le au vaivai, ia o tatou uma lava i le olaga lena tatou te mananao e taaalo i taimi uma i le au malosi. Ia ae e tataua a ona tofi le itu e te alu i ai ma le mea e te talitonu foi oe i ai, ae faafetai tele.

Lau Afioga i le Fofoga Fetalai ou te faafetai atu i le paia ma le mamalu o sui usufono uma lava i totonu o le Maota, malo le galulue. E i ai lava le taimi e fai ai a tatou finauga, ia ma o le tele lava o taimi i le faafofoga mai a Samoa a fai a tatou finauga o i si taimi e luga ma lalo ia o nisi taimi la e faapea mai ai o se misaaga matautia, ae atonu a fai tatou galuega faakomiti e tatou te felagolagomaai lava. O le autu foi a o le tatou galuega e le faapea o se talitonuga faa-HRPP po o se talitonuga faa-Tautua tau lava ina ia vaai mai la e agai atu. E leai e ui lava ina eseese o tatou manatu i isi taimi ia ae o le tulituli lava o o tatou manatu mo le mea silisili mo Samoa, e le o se measili mo i tatou taitoatasi pe sili mo le HRPP pe sili mo le Tautua. A aluifo a le aua o le faaiuga ma mea tatou te faia o le mea aupito sili mo Samoa, o le mea aupito sili lena ona taulia. O lea la e faafetai tele atu lava i le paia ma le mamalu o sui usufono uma o le Maota Fonu o Samoa.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ou te faafetai atu foi i lau Afioga i le Fofoga Fetalai, e le o se galuega faigofie lau galuega, o taimi foi e luga ma lalo ai e faigata uma lava itu e lua o le Maota. Ou te iloa e au le faigata o lau galuega ona o le tele ia o le eseese o Tulafono Tumau a le tatou Maota ma Tulafono Tumau a le fale Faamasino aua o so o se Faamasinoga lava e fai mai loa le faaiuga a le Faamasino i le mea ua taatia ai lona manatu ia e taatia ai i ina. A o totonu i le tatou Maota i le Tulafono Tumau e i ai lava le taimi e alu ai lava finauga, e fai lava lau faaiuga mulimuli, ae o le tele ia o le avanoa e tuu mai e Tulafono o le Maota i sui usufono e faaali ai o latou manatu i taimi o finauga. Ae faafetai i lau Afioga le faapalepale, malo le onosai. E manaia foi ituaiga galuega lea i ai tatou o sui usufono e tai lima lava tausaga ma toe talosaga i galuega pe talia e pulea tatou pe toe foi mai galuega pe le toe foi mai. Ia ta te le, ua na o le Atua na te silafia pe o le a le mea e tupu i le aso 4 o Mati, ae a au ia, ua tuai na oo mai le aso 4, se i fai le filifiliga a le atunuu po o ai e toe foi mai. O le aluga o lou olaga o le oo mai i totonu o le Palemene o se privilege, e le faagaloina ia te au, pe foi mai pe le toe foi mai, e le galo ia te au sa ou i totonu o le Maota Fono o Samoa. Ma o le tatalo foi talosia sa i ai sou aoga i totonu o le Maota Fono o Samoa.

Lau Afioga i le Fofoga Fetalai, ae faafetai tele mo le avanoa, o le tatalo ia alofagia e le Atua si o tatou atunuu laitiiti ma le faatauvaa, ia alofagia lau Afioga, le Afioga i le Palemia ma le Kapeneta ma lena itu o le malu. Alofagia foi le Taitai ma le Sui Taitai o lenei Itu, le afioga i le Failautusi ma le Ofisa ia ma e uma o tatou faatasi i lenei aso ma Samoa, ia manuia lau palota i le aso 4 o Mati, faafetai tele.

**FOFOGA FETALAI:** Malo, faamalo atu saunoa i lau Afioga i le sui usufono mo Vaimauga Sisifo, ia e le toe tau faamatalaina i le Maota lou sao taua i le tatou Maota Fono nei, e le gata i lou sao i le tataou Komiti ia aemaise foi taimi uma e felafolafoai ai le tatou Maota Fono. Ia pau lava le itu taua, e ese le matagofie o ou ata ia e faapipii i le taulaga. O le faatomuaga lena o lou lototele e faaaau le faiga filifiliga a le tatou atunuu, alofagia e le Atua lou soifua, ina ia e fautua lelei pea i le Taitai o le Itu Agai, taimi uma, ma aso uma e fai a tatou press conference ma mea uma na. Aua e sau lou taimi, aua e alu alu foi e Taitai, ae onosai i ina lena e manaia le tulaga lena e te i ai.

Ia ua tatou taunuu mai i se isi saunoaga e faauma ai le tatou aso o lea lava e lava le tatou taimi, lelei foi le po ananei taimi nei e toe tamua ai le afiafi ananei.

Ia Toesulusulu, ia tulai mai o oe o se tasi o taitai. Tulai mai le sui usufono mo Aana Alofi Nu. 3.

**Afioga TOELESULUSULU CEDRIC POSE SALESA SCHUSTER (Aana Alofi Nu.3):** Faafetai i lau Afioga i le Fofoga Fetalai mo le avanoa, faamalo atu foi i le paia ma le mamalu o le Maota Fono i lenei taeao.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafaiga i luga o le faitauga faalua**

Lau Afioga i le Fofoga Fetalai, faafetai mo le avanoa, ae mua'i se faamatalaga lau Afioga i le Fofoga Fetalai e tusa ai o le tatou Tala o le Tupe Faaopopo o lo o taoto nei i le Maota. E lua lava ni vaega e fia oo i ai se manatu lau Afioga i le Fofoga Fetalai. O le vaega muamua o lea e maitau atu i le faaopoopoga o seleni mo le suavai.

Lau Afioga i le Fofoga Fetalai, a mafai ona faatagisia se faamalamalamaina o le vaega pe aisea ua le faailoa mai ai e le i faia lava se investment plan ua tuai ai ona oo mai seleni mai le EU ona mafai ona faatinoina ai ia galuega faatino e le gata i le Water Sector. Ia ma le lua lau Afioga i le Fofoga Fetalai, ia o le talosaga a lenei nu'u i Satapuala, e pei ona silafia ua fai foi si leva o tausaga o faatalitali aua le suavai Independent Water Scheme, ia atonu o lea ua saunoa le Afioga i le Minisita, o lea o le a sosoo lo matou nuu. Peitai ane o le tulaga lava o lo o i ai i lenei tele o lenei tausaga lau Afioga i le Fofoga Fetalai, ia e le'o o'o le suavai aemaise lava i Maota o Galuega o lenei afioaga. Ia o le mugala sa feagai ai lo tatou atunuu, ia e tele a ina aafia ai ia maota o galuega o lenei afioaga lea ua i ai le talosaga sa tuuina atu i le Matagaluega o le Suavai, pe mafai ona silasila atonu e mafai ona faaoga i ai vaegatupe nei e toe talosaga e faaopopoina e fai ona faalelei ai ma faaoo atu i ai le suavai a le tatou malo aemaise lava maota o galuega o lo o i ai. Ma le vaega lona lua lau Afioga o le vaega lea a le LTA, le vaega o tupe o le Climate Change Alliance Funds O le fia malamalama lelei lau Afioga po o le vaega lea o se vaega tupe aumai mai fafo po o se vaega tupe o lea e i totonu e aumai i totonu o le tatou Tala o le Tupe e tuuina atu, ona o lea ou te vaavaai atu i le Tala o le Tupe o lea e aumai i totonu o le Tala o le Tupe o tatou funds a tatou ae le o se vaega e aumai mai fafo. Ou te iloa ona o le faapapalagi lea e faasau ai o le Alliance Funds po o se toe finance uma lea a tatou po o se tupe e aumai mai fafo.

Lau Afioga i le Fofoga Fetalai, ia pau ia o nai manatu e tusa ai o le Tala o le Tupe, talitonu foi ua uma ona faataoto polokalame mo le fatinoina o nei galuega, ia e le toe o'o i ai se leo, ae faamalo i le tapenaina o lenei Tala o le Tupe e le gata o le Matagaluega ae faapea foi le Komiti sa o latou iloiloina lenei Tala o le Tupe, ma ua maitauina le tele o le ma'e'a'e'a o le latou iloiloga e leai foi la nisi o manatu e o'o i ai. Ia lau Afioga i le Fofoga Fetalai, ona ua tatou, e pei ona e saunoa, ua tatou paia foi faaiuga o lenei Paeaiga, ia o lea e avea foi lenei avanoa e fai ai se leo, e le gata e avatu ai se faafetai i le atunuu aemaise foi o lo'u itumalo, Lau Afioga i le Fofoga Fetalai, ia e muamua lava ona avatu le agaga o le faafetai, i le tapuaiga i Lana Afioga Mamalu, O Le Ao o le Malo ma le faletua, le Sui o le Fono a Sui Tofia, o le faamalumalu a o le tapuaiga a o feagai ai le tatou Palemene mo lenei lima tausaga. Avatu foi le faafetai i le Faamasino Sili ma le Ofisa o Faamasinoga e tusa ai o le latou galuega fai, ia faafetai foi i lau Afioga i le Fofoga Fetalai, Failautusi o le Maota ia aemaise le aufaigaluega o le Palemene a o feagai ai lenei lima tausaga i le tautuaina o le Maota o le Palemene, i galuega e le gata i galuega faa-Komiti ia a o le tautuaina foi o le Maota i aso taitasi aemaise o fonotaga a lo tatou malo, o le tatou Palemene.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoga i luga o le faitauga faalua**

E tuu atu le agaga faafetai e lagona lava le tele o le fesoasoani i le taunuu mai i totonu o lenei Palemene ia e lea i ai se malamalama tele, peita'i ane o le fesoasoani ma le lagolago o le Ofisa ua talitonu ua mafai ona tele ai foi se sao o le fesoasoani ai fo'i le tapenaga o le Palemene.

Lau Afioga i le Fofoga Fetalai, e avea ai foi lenei itula e avatu ai foi se faafetai i le afioga i le Palemia ma le Kapeneta mo galuega fai i lenei lima tausaga aemaise ai foi le tofamamao ma le tofa fetalai ua faatino ai nisi o tuualalo sa tuuina atu ma manatu sa tuuina atu, aua e talitonu, e mo se lumanai o Samoa. Lau Afioga i le Fofoga Fetalai, ia sa mafaufau lava po o le a se vaega e toe faatatau i ai se manatu, ia ua ou aumaia le tusi lea le Filipi 4: 8, e le o maua sa'o Tusi Paia faa-Samoa, ae e faufau ai se faafetai lea e faapea, Finally, brothers and sisters, whatever is true, whatever is noble, whatever is right, whatever is pure, whatever is lovely, whatever is admirable, and praise worthy, think about of such things. Lau Afioga i le Fofoga Fetalai, ia o le agaga faafetai, o galuega fai e le gata i totonu o le Maota, le Palemene, le Afioga i le Palemia ma le Kapeneta, Taitai o le Itu Agai ma sui mamalu uma o le Palemene, o galuega faa-Komiti, e le gata foi i lea, o uluulu..

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, pe mafai ona faa-Samoa mai.

**Afioga Hon Palusalua Faapo II:** Lau Afioga i le Fofoga Fetalai, e ala ona ta'u o le Tusi Faitau Aso, o la e sa'o lelei lava le saunoaga, o mea aoga ma mea le aoga, o le faa-Samoa lena.

**FOFOGA FETALAI:** O le a avatu pea ia Toeolesulusulu e ona le mau, e lelei lena e manino ai, e ese le tusi lena e te tau taua mai i lau Tusi Faitau Aso. Toeolesulusulu faa-Samoa le feau.

**Afioga TOEOLESULUSULU CEDRIC POSE SALESA SCHUSTER:** E faamalie atu i lau Afioga i le Fofoga Fetalai, leaga o la e i le fale la'o Tusi Paia lea na aumai ai le afioga, na'o le Tusi Paia palagi lea na ou sau ma a'o. Faamalie atu foi i le Afioga i le Palemia, atonu e su'e mai se Tusi Paia Samoa ona faaali lea i luga o tatou screens ia mo se taimi o i luma, ae o le agaga lau Afioga i le Fofoga Fetalai, o le faafetai i galuega lelei, o galuega sa le lelei, o le a leai se manatu i lea itu. Pei o le taua lea o se lagona lea po o se agaga faafetai, e le gata foi i totonu foi o le tatou Maota lau Afioga i le Fofoga Fetalai ia e faapea foi se faafetai i lo'o Itumalo mai i le Fofogaole fatu seia paia le Papa, nuu totonu o Alofi Aana Nu. 3, le afioga o Fasitootai, Vailuutai, Faleatiu, Satapuala ma Satuimalufilufi. E faafetai i lo'o itumalo i lo outou tautua ma lo outou fautua, la outou tatalo, la outou tapuaiga a'o o'u feagai ai ma lenei lima tausaga.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

E avatu foi le agaga faafetai i Faafeagaiga o la e tala faauto i totonu o le itumalo, Susuga i le Toeaina Faatonu, Susuga i le Sea, e le gata i lea o Faafeagaiga taulagi i totonu o le itumalo, aua o fatafaitaulaga aua agaga o le itumalo mo le malo o le Atua.

Lau Afioga i le Fofoga Fetalai, ia o le ooo mai foi i totonu o le Palemene, ia e maitauina foi, e le o se galuega faigofie, ia e tele foi le le tau auai i totonu o lenei Palemene, e i ai lava ia vaega sa i ai faanaunautaiga i le faatinoina o le tiute o le faipule. Muamua o le fia lagolagosua lea i galuega fai i totonu o aiga ma nuu, lua, le vaavaai ma moomia se tuualalo i le faigamalo mo atinae i totonu o afioaga ma alalafaga ma le itumalo, tolu, molimoli se finagalo o le Itumalo le atinae o le atunuu mo se lumanai manuia mo Samoa. fa, ia ave se fautuaga i le poupouina o Tulafono ma faiga faavae ma le lufilufiina o le tamaoiga ia maua avanoa ma agavaa tutusa uma tagata o Samoa e aofia ai ma lenei Itumalo. O le vaivaiga ia na tapena i ai se lagona o lenei sui, o le galue foi la, ia sa taumafai a i le mea e gata ai. Ia lo tatou Itumalo, e ui e lea ooo le faasoaa le malo i lo tatou itumalo i le faiga o se auala mo lenei lima tausaga, ae ou te talitonu o lea ua taoto i le tele o tapenaga o le isi Paeaiga, ua ooo mai loa ia te i tatou aua o lea ua maitauina ua maee tapena le tele o isi itumalo, ia ae o le tatou itumalo o le a sosoo mai ai nei. Ia e tele foi o le agaga faafetai ia e le gata o nisi o tapenaga sa faatinoina o le faaleleia o aoga, o le suavai i totonu o le tatou itumalo, i nisi galuega fai sa galulue e le gata i le Malo, ia sa taumafai foi i ai lenei sui usufono, ina ia faaleleia ma siitia, e le gata na o le galuega e faatino i totonu o le tatou itumalo ma seleni e maua mai i le malo, ae o le saili atu foi i paaga i atunuu i fafo, ina i mafai ona fesoasoani mai, i le lagolagosua niisi o atinae i totonu o le tatou itumalo.

Lau Afioga i le Fofoga Fetalai, ona faaiu ai lea o se manatu, e faafetai atu ai, e avatu ai le agaga faafetai i lenei Paeaiga, ia o ai lava o le a tulai mai i le faiga palota, talosia ia mafai ona faaauuina galuega o lo o tapenaina aua le lumanai o Samoa aemaise le itumalo, faafetai.

**FOFOGA FETALAI:** Malo, Toeolesulusulu, ia, ou te talitonu o oe o se tagata lotu, fealuaa ma feaveaa lau Tusi Paia i taimi uma faa-Samoa. Atonu o lena e molimoli ai le feau ae taua tele le faamanatu a le Palemia leaga o la e faafofoga mai le tatou atunuu. O le a lafo i le Taitai o le Itu Agai i lana folasaga i le taimi o lana lauga ona faa-Samoa lea o le feau molimoli o lau faafetai o lenei aso. Ia malo saunoa, malo fetalai, faafetai foi i timaiga ma tuleiga ma saunoaga o lenei Paeaiga, talitonu o oe o se tasi o sui e ese lou aggressive taimi uma e fai ai saunoaga o lena itu o le Maota. A ta malaga foi i fafo, na o loo nofonono ma ou vaavaai i au fegi ma le taamilosaga e tauanau ai ma fai luata mo le taimi o tatou fonono. Malo faafetai, tatalo i le Atua mo faamoemoega aua le faiga filifiliga, saunoa atu le Afioga i le Palemia ina ia ulimasao ia sui mamalu uma o lo o epa i le Maota.



26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

Ona o lea ua tatou taunuu i le tatou taimi malolo, ua manatu ai ai, o lea ua sauni le tatou taumafataga, le paia ma le mamalu o le tatou Maota Fono, ou te taofi, ia o le a tatou toe amata i le itula e 3, 4, 5, 6, 7 ia ona faaauau ai lea o le tatou fonotaga i le afiafi a nanei. Momoli atu le faafetai ma le faamalo le onosai i le paia ma le mamalu o le tatou Maota Fono.

Faamalo atu foi i Faauluuluga o Matagaluega ia aemaise Samoa ua potopoto, ou te manatu o le a fai se tatou malologa e saili malosi, ona toe potopoto lea i le itula e 3:00 i le afiafi.

*Na faataatiaese Taulumaga a le Fono Aoao Faitulafono i le itula e 1:00 i le aoauli ma toe faaauau i le itula e 3:00 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2015/2016.*

**FOFOGA FETALAI:** E faasilasila atu ua toe amataina nei Taulumaga o le Fono Aoao Faitulafono.

Ia o le aoauli lava o le faatalofa, e faafeiloai atu foi i le paia ma le mamalu o le tatou Maota Fono i lenei vaega o le taeao na liugalua. E talitonu le faamoemoe o lea ua tatou taunuu mai i le tatou galuega faaauau e ala i le tatou lafo faatu i le taeao analeila. Ia e i ai le talitonuga sa vasafoe ia ma faatini le tatou faasiliga malosi. E i ai le faamoemoe ua maua sa outou malologa i nai itula ua mavae atu nei, ua uma foi le tatou taligasua e faafoisia ai le malosi i le tino, agaga ma le mafaufau e faaauau ai le tatou galuega. Faamalo atu i lenei vaega o le aso i le paia ma le mamalu o le tatou Maota ia sagafoe maia e manatu ua fetau tonu le tatou taimi o lea ua atoatagi le paia o le tatou Palemene ia ua talafeauga foi ma le amataina o le tatou polokalame pei ona faatulagaina.

E fai le tatou malologa ua faaiu mai le saunoaga a le sui usufono mo Aana, ia ona manatu lea e toe lafo atu i le tatou Maota Fono mo nisi o sui usufono e fia sausaunoa i le tatou Tala o le Tupe ia ma faaauau ai le tatou galuega.

Ia tulai maia lau Afioga i le sui usufono mo Vaisigano Nu.1 ua avanoa le Maota mo le saunoaga.

**Afioga TUFUGA GAFOALEATA FAITUA (Vaisigano Nu.1):** Faafetai mo le avanoa lau Afioga i le Fofoga Fetalai. Ia e avea ia lenei avanoa mulimuli o le Paeaiga e fai atu ai se faamatalaga aua le Tala Faatatau o le Tupe 2015/2016. O le Tala o le Tupe lenei o le Tala o le Tupe a le Malo ia e matua lagolagoina lava e lenei usugafono se i vagana nai fautuaga laiti i le Tala o le Tupe aemaise lava i le Matagaluega lea a le Soifua Maloloina.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafaiga i luga o le faitauga faalua**

O lea lava ua manino i le folasaga e \$1.5miliona e faatupe ai auaunaga faa-Soifua Maloloina aua lava gasegase ua le mafaia e le Falemai, leai se fomai faapitoa ia ae faamoemoe mo le ave i fafo. O le fautuaga la i nai fomai nei e feagai ma le mamalu o le atunuu afai e leai se tomai faapitoa ma leai se fofo a le Falemai e mafai ona fai ia vave fai lipoti e ave i le Minisita aua le faagasologa mo gasegase nei mo le agai i fafo e togafiti ai, aua e le na ma le laina o le aiga o lenei usugafono ia na lavea ai i le laina lea o le le vave o lipoti a alii fomai faapitoa mo le gasegase ae taofiofi ai lava le gasegase se i vagana lava ua le mafai ona fai se togafiti ma faasolo atu ina alu ese ma lenei lalolagi. Ia, o le fautuaga lena mo fomai nei, afai e leai ni togafitiga i Samoa nei ia faavave lipoti aua le faagasologa o le finagalo o le Minisita aemaise le Kapeneta mo gasegase nei aemaise le mamalu o le atunuu mo le agai i fafo, e leai ni Fomai ia ma le mamalu o le atunuu o lo o ua maua i ma*ʻ* faigata.

Ia ona ou faasolo mai lea i le isi tulaga lenei i maota o le Malo, o maota nei o le Malo e le i leva ona uma ona fau. Ia e le na foi ma le laina le silasila a le atunuu aemaise foi tatou i le maintenance, e fai lava sina pa*ʻ* o le tulaga lea a o fale fou e le i taitai, ia ae a le lelei le tulaga lea i le maintenance ia e vave foi ona tuai le fale fou. O le fautuaga mo le Tala Faatatau o le Tupe.

Toe tasi lava, faafetai i le Komiti o Tupe o lo o latou fautuaina le Matagaluega o le Soifua Maloloina pau lava lenei o le Tala o le Tupe e le mafai ona aumai i le Palemene, lea o lo o maoti mai i le fautuaga a le Komiti e mafai ona aumai latou Lipoti ma o lo o taua manino mai ai 5 tausaga talu ai e le i aumaia se Lipoti. Ia ae talosia ia i le agai i luma ina ia faavavevave mai Lipoti mo le galuega a le Palemene aemaise Komiti faapitoa o lo o nafa ma lea tulaga.

Lau Afioga i le Fofoga Fetalai ona ou oo mai lea i si ou itumalo o Vaisigano Nu.1, i le afio o le Tapaau lau Afioga Toomata, susu mai le Gafa lau Afioga Vaepule, afio mai le Aloalii lau Afioga Vaai, malii mai Taulauniu, Tuiasau ma Gale, malii mai le Aiga Sa Oloapu ae tainane foi Safune.

E faapea foi le afio o Tapu ma Leatimanutai, susu mai le Toalima ia ma upu ia te oe Safune. I le susu foi o lau Susuga Tufuga ma lo outou Aiga Sa Tufuga, afio mai Masoe ma lo outou Aiga Sa Masoe, Falefa o le Usoalii, afio mai lo outou mapou lau Afioga Tupua ma le Aiga Sa Taneavai, ae tainane le Salafai e ona faiga i ona tuagalua, Falefia ma le Siuofanua, ia o le Fofoga o le Aiga Sa Lilomaiava. Ia o paia na ma mamalu o le itumalo.

E avea ai lenei auauna e avea ma o outou sui usufono i le Fono a le tatou Malo o Samoa. Faafetai i lo outou faatuatuaaina o au nei le auauna faatauvaa, ae afai foi ua i ai se auaunaga ua le atoatoa ona faatino, ou te tatalo atu ina ia faamagalalo le auauna.

Ia ona ou afe atu ai lea i lenei itula i le itumalo, silasila foi na taunuu mai le sa o lenei itumalo i le faigamalo ua uma tofiga ua uma ona tofofi le Kapeneta. Ae faafetai o lo o mafai ona tofia pea e avea ma Minisita Lagolago i le Siosiomaga ma Punaoa Faanatura, aemaise foi le Faalapotopotoga o Suesuega Faasaienisi e faapea le Esetete Tausi.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoga i luga o le faitauga faalua**

Ia ona ou toe tatalo atu foi lea i le tatou itumalo, ia o lea lava e malosi le auauna e toe auauna ai mo lea Paeaiga pe a tusa ai ma lo outou finagalo. Ia afai o le a outou manatu ma ii lou toe tulai mo lea Faiga Palota o lo o lumanai, ia faafetai i le Atua. Ia o upu ia, lau Afioga i le Fofoga Fetalai, tau ina ia manuia le Paeaiga nei a lau Afioga i le Palemia ma lau Kapneta, le mamalu o Minisiga Lagolago ae faapea foi le Taitai o le Itu Agai ma lona soatau ma le mamalu o sui usufono. Ia faapea foi ona maua pea e lau Afioga i le Fofoga Fetalai le soifua laulelei, ia pe tefa foi le finagalo i le itumalo ae manuia tele le Palemene o Samoa, manuia foi le tapuaiga a le atunuu, soifua ma ia manuia.

**FOFOGA FETALAI:** Ia malo saunoa i le sui usufono mamalu o Vaisigano Nu.1, ia o lea ua faafofoga le tatou Maota i tuleiga ma saunoaga. Ia e sao a oe, malo le onosai, e le faigofie le pele ma mamae o mafutaga ae tuua ona ua valavala i le valaau paia a le Atua. Ia ae fai aso le Alii, ia tatou lagona pea ma le agaga o le loto maualalo aua tatou te le iloa po o fea o taatia ai le finagalo o le Alii i lenei Paeaiga. Ae o manu na o lea foi ua e faapaʻa i le itumalo, ia tatou tuu i le Atua mea uma o ia e sau ai le tali mo tatou uma. Ia o lea ou te matau o lea lava e lavapapale sui usufono o le Komiti o Tupe ae o lea lava e avanoa le tatou Maota, sui usufono mamalu o le taimi lelei lenei o lea ua fai ifo le la i lona tauafiafi. Ae tulai maia sui usufono e saunoa, o le a faasolo le tatou galuega o le ala foi lena o le faaopopo o le tatou taimi ma le talitonuga ia vave ona faauma le tatou galuega ona tatou malolo ai lea.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai, sa i ai soʻu manatu leaga e faigata o le malae lenei o Faleata sa ou faapea o au o le a mulimuli i ai lenei Itu. Ia ae ui i lea, ua musumusumu mai le Susuga i le Faafeagaiga e faaalu loa i lenei taimi.

Ia ae ou te le i apaapa la i le matila ma le ofeloa, e muamua ona ou tapa le filiga e muamua foi ona ou faatulou i le paia ma le mamalu o le Palemene nei ii lau Afioga i le Fofoga Fetalai aemaise le paia i le Palemia ma le Kapeneta, o Minisita Lagolago aemaise foi ia lenei itu i le Taitai o le Itu Agai ma sui usufono, ia o Ofisa Sili o Pulega o Matagaluega taitasi.

Ou te faatulou foi i le paia o Samoa o lo o faafogafoga ma ii lau Susuga i Lana Afioga Mamalu O Le Ao o le Malo ma le Masiofo, Afioga i le Sui o le Fono a Sui Tofia ma le Masiofo, o le paia i le Aiga Faamasino aemaise le mamalu o Samoa atoa. O lenei taeao o se taeao e ese foi ona lagona ona a ou mafaufau i le 5 tausaga ua tuanai, o le taeao lenei pei ona taua o le taeao nai Moamoa, o le aso mulimuli e faafogafoga mai ai foi le mamalu o le atunuu aemaise foi le paia ma le mamalu o le Palemene i se manatu foi o le sui aua foi taualumaga o le tatou taumafaiga i le atiaeina o Samoa aemaise foi se sui usufono o lenei itumalo.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ae ou te le i tautala la i isi vaega o le Tulafono Tau Faaofi, e muamua ona ou faafetai i lau Afioga i le Palemia ma le Kapeneta. Sa i ai lou manatu ou te tautau taitasi atu le paia ma le mamalu o Afioga i Minisita, ona e fia momoli atu sau faafetai i lo outou paia ma lo outou mamalu mo galuega fai i tausaga ua tuanai aua e le o se galuega faigofie, aua o outou nei e tuu atu i ai le faamoemoe o le Palemene o Samoa, aemaise o le paia ma le mamalu o le atunuu aua so tatou lumanai manuia. Ia o lenei ua tatou oo mai i le faaiuga o lenei Paeaiga, o lea lava e malu le tai. E moni lava e tele taimi sa tau sousou ai, e i ai foi ni tatou feeseeseaiga i luga lava o manatu ma ni finagalo ua faaalua, o manatu lava ma finagalo faaalua aua le lagolago atu, ma taumafai foi ina ia ogatasi le futia ma le umele ina ia manuia ai si o tatou atunuu. O lea la ua ou faafetai faalauaitele atu ai i a outou Afioga, e ala atu i le Palemia.

E faapitoa lava lau faafetai i le Afioga i le Minisita mo Aoga, Taaloga ma Aganuu e pei ona silafia, o au sa pei o se agai. Ou te le i agaia la le Minisita mo Aoga, Taaloga ma Aganuu, sa ou lagolago i le Minisita mo Aoga, ae ou te faafetai i lou tulai mai i lenei Paeaiga, malo tau e le faigofie, ua e masani foi i mea tau aoga, malo. O lea lava ua alualu i luma le atinae o mea tau aoga aemaise foi o le Minisita mo Faatoaga ma Faigafaiva aua o Matagaluega lava ia e lua sa tele atu ai ni manatu. Malo le galue. O manatu lava ia na faatino aua le taumafaiga o le tatou faamoemoe, e momoli le faafetai i lau Afioga aemaise le Matagaluega.

E faapea foi i lau Afioga i le Minisita mo Galuega, Felauaiga ma Atinae Eeseese, sa amata lava le tausaga i ni manatu na tuuina atu, ia o matou ia na o le avatu lava o ni manatu, ae o outou e faatino. Ia atonu e i ai se taimi e oo ifo ai le silasila i nisi foi o vaega sa talosagaina e lenei afioaga po o lenei itumalo, ae malo le tau, malo lava le galue.

Ia lau Afioga i le Palemia, e faapena, e tau le selu atu i le tatou galuega o le galuega e fai faatasi.

O nai vaega ia sa ou faapea e tatau pea ona ou lauga ail au Afioga i le Fofoga Fetalai, ae tatau pea ona avatu lau faafetai i lau Afioga i le Fofoga Fetalai i le amataga lava o le oo mai foi iinei i le Palemene, e le o se mea faigofie le tu atu i i e taumafai e fai ma sui o le itumalo, e matua faigata ni lagona, ae faafetai i lou lagolago i lenei Paeaiga atoa i le tele foi o aoaoga aemaise o workshops e faatino aua lava le taumafai e atiae sui usufono ina ia faapena ona maua ni sui usufono e tautuaina le tatou atunuu.

Ou te momoli foi le faafetai tele i le Ofisa o le Palemene i le Failautusi ma le mamalu o le aufaigaluega ona o le lagolagosua ia matou nei sa fou mai i lenei foi mea o le sui usufono, ae ua avea lo outou lagolago, ua leai ai se mean a manao ai e le i talia le manao. Ua avea foi manatu ma finagalo e faaalua i totonu iinei, ua vaaia lava le lagolagosua a le Ofisa o le Palemene. E momoli lau faafetai i alii ma tamaitai o le Ofisa, faamanuia le Atua ia te outou aua galuega o feagai ai.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

Ia, o le lima tausaga ua tuanai sa tatou omai ai i totonu o le Palemene lenei. Ma ou te manatua le 2011 sa filifili mai ai i tatou iinei. O lona uiga, o a ni manatu, o a foi ni fautuaga sa avatu, o lea foi ua toe tepa i tua i lenei aso ma nei tausaga ma toe tilotilo po o le a le auala lea na tatou sau ai. E tele fita sa tatou savalia, e tele faafitauli, e tele foi faaososoga, a ua aumai lava e le Atua manatu lelei ma finagalo lelei aemaise o le atamai i le Palemene aemaise o le Kapeneta e faatino ai nisi o fuafuaga e pei ona tatou oo mai i lenei vaitau. Atonu e le i atoatoa aua e leai lava se isi e atoatoa, e i ai foi ni manatu po o ni tuualalo sa taumafai e tuutuu atu, ina ia taumafai tatou te soosootauau, ae faafetai pe afai o i ai se finagalo e i ai ni nai manatu e aoga. Afai foi e i ai ni manatu ua paopapa, e le o le agaga lena na mafua ai ona fai atu ni manatu. O le agaga lva ia ina ia vaavaai ma autilotilo ma suesue, atonu o se tasi lea o auala e mafai ai ona faaleleia nisi o galuega e pei ona taumafai atu i ai.

Lou itumalo e Faleata Sasae, o lo o outou silafia le faigata o lenei galuega. O lou itumalo lenei o Faleata Sasae pei ona outou silafia, e lavea ai nuu mavae e pei o Lepea, Vaimoso, o Nuu, e i ai ma nai nuu ia o Sinamoga ma Alafua. Ia le paia e o le tatou itumalo i le afio o Faumuina ma Usoalii ma Tamapaa, maluu mai oulua Vaifale ma le Falelima ma le Falevalu, ma le Saofaiga a le Atua, Faleata ma Ituau. Afio foil au Afioga Nuu Leatinuu, aemaise si ou nuu pele i Vaimoso, susu le Tama a le Fale, Usoalii ma le Matua ia Patauave, oulua e toalua Une ma Manuleleua ma oulua Aiga, oulua Matua ma upu ia te oe Vaimoso.

E le faagaloina le lagolago ma le tapuaiga o tatalo, o faamanuiaga, o faamalosiua, aua e pei ona silafia pei ona saunoa se tasi o sui usufono, e fesili lava le sui usufono, o le a tonu lava le matafaioi a le sui usufono? O le a le matafaioi e ala ai ona sau le sui usufono i le Palemene? O le a le mafuaaga ua filifili ai e le itumalo e te sau i le Palemene? Ae foi ona fai mai le tasi upu, a maea le aso ona e toe tagai lea i au galuega ma au mean a fai ona e faapea ane lea, òLe Alii e, o au lava o se auauna le aoga.ö Ioe, ma e leai lava se sui usufono o lo o nofo mai nei e le i taumafai e fai le mea e gata mai ai lona lelei ma lona mafai aua si ona itumalo, aemaise le paia ma le mamalu o Samoa. O lea la lou itumalo e, afai e i ai foi se sasi o le auauna, e faapena lava le olaga nei, e potu lava le tautai ae sese le atu i ama. A o la outou pule ma la outou lagolago, a lea, lo outou alofa lea ua toto tetele, ma ua ou sapaia faatuaeleele. A lea ua ou tu ai nei i Taumeasina ae ou tepa i le matagofie, o la outou tapuaiga i mea ua mafai ona faatino e le tatou itumalo. Ia, e le umi sau lauga, ae le galo ia te au si ou aiga, o nai au uo ma e masani ona o lo outou lagolago, faafetai mo la outou tapuaiga, faafetai i lo outou alofa, faafetai mo mea uma lava. O lea foi o le a tatou toe alo atu i le isi tatou Faiga Palota, ia, e filifili lava e le Atua. E pei lava ona saunoa le Afioga i le Palemia ma le mamalu o sui usufono, e filifili lava oe e le Atua, ia fai lau filifiliga e tusa ai ma le finagalo o le tatou Tama i le Lagi.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

Lau Afioga i le Taitai o le Itu Agai, aemaise foi le paia ma le mamalu o le tatou Itu, malo le tau i lau Susuga i le Sui Taitai. E lagona lava le faamalosiua foi ma le mitamita i le malosi foi o lau taitaiga. Na pau lava o lea, na ou tau fesili i si ou uso o Leala po o le a tonu lava le mea lea e tu ai nei, ae o lena vaega, o lea lava tou te tagai mai, o lea lava e nofo atu lava Leala iinei i le Itu a le Tautua. Ia o a lava nit ala o outou faafofoga i ai, e sese uma na tala, o Leala lava ia, e lagolago lava i lenei Itu. Faafetai leaga e faigata ua fai l au tala Leala, ia ae leaga e uso maua iinei i Faleata. Ae faafetai foi i nisi o uso a sui usufono o le HRPP, faafta i Minisita Lagolago, faafetai mo le tatou mafutaga. E ese le matagofie, aua pau lava le taimi tatou te eseese ai faapea o outou e HRPP a o matou e Tautua, o le taimi lenei o Fono, tou te nonofo mai ai i ina ae matou nonofo atu iinei, a o le tele o taimi o le tatou galuega, sa tatou fai faatasi.

Ou te faafetai foi i Taitaifono o Komiti sa ou auai ma sui o Komiti sa galulue faatasi, ona o i ua ou iloa ai, e leai se HRPP leai se Tautua i totonu o le Palemene lenei, ona o Tulafono nei ma vaega nei o Komiti nei e suesuea, e taua tele ona o i e fua i ai le manuia o Samoa. Ae sa faaalua lava i totonu o Komiti i le tele o fonotaga a Komiti, e le o i ai lava se faaituau i totonu. O le mea lea e momoli atu ai foi le faafetai i le lagolago a Taitaifono o Komiti aemaise foi o sui usufono o Komiti taitasi, aemaise foi o Failautusi, aua e le o se galuega faigofie lenei galuega.

Ia, e tatalo atu ai i lau Afioga i le Palemia ma le mamalu o le Kapeneta, aemaise foi o lena Itu, ia manuia le Faiga Palota. Ua i ai lava le manatu o lenei Itu, ia lafo maia se i matou taitai i le tausaga fou. Atonu o lo o faafogafoga mai le... se i fai sina suiga, aua pei lava foi ona ou fai atu, pe matou te taitai pe tou te taitai, e tasi lava tatou, na o le taimi lava tatou te faapenei ai, ae o le tatou galuega e faifaatasi.

Ia alofa le Atua e foai atu le manuia i lau Afioga i le Palemia, aemaise le paia o le Kapeneta, faapea foi i Minisita Lagolago aemaise foi lau Afioga i le Fofoga Fetalai ma le mamalu o le Ofisa, o Ofisa Sili o Pulega, malo le galulue, e le o se galuega faigofie, aemaise le taimi e amiami mai ai Pule ma Ofisa mamalu i manatu. E faapena le tatou galuega e faifaatasi.

Lau Afioga i le Taitai o le Itu Agai ma le mamalu o lenei Itu, ia manuia le Faiga Palota, ia manuia foi le Faiga Palota a lena Itu o le tatou Palemene, aemaise lau Afioga i le Fofoga Fetalai, ia foai atu e le Atua manuia i lau Afiog, malo lava le tau, malo foi le galue.

E faauma atu i ina lau lauga, ia alofa le Atua e faamanuia mai ia i tatou i lenei aso. Faafetai lava.

**FOFOGA FETALAI:** Malo saunoa Aveautau, aua sa e ulufale mai o Aveau ae mulimuli ane ua iloa lou suafa atoa o Aveautau, o se igoa matagofie tele lea pe a faatulaga, ua talafeauga ma le mea lena e feagai ma oe i lena Itu o le Maota. Aua e fai foi o lena a o lenei, e molimau atu le Fofoga Fetalai o lea e faamaumau uma ma ou maitauina galuega uma sa faatino.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoga i luga o le faitauga faalua**

E le tau selu atu foi Aveau, e pei lava o lau saunoaga, e le o se ta lava ma se lavea, ae sa tatou aoao uma i tualumaga sa feagai ai. E faamalo atu foi i le feagai ai ma fonotaga a tatou Komiti, o lea foi e maitau le Fofoga Fetalai i le vave ma ii tatou fonu i taimi uma, ma tuleiga ma saunoaga, a o faapena ona tatou galulue faatasi. E sao lelei lau saunoaga, o le Palemene e tasi. Ioe, ona e faifai foi tau ese lena Itu e mafua ai ona tatou feeseeseai. Aua e te popole ia Leala, God will speak to Him. O tatou talanoaga ma mea uma, faamalo atu le saunoa, o lea ua lagona le saunoaga, aemaise foi o le faafofoga mai a le itumalo, ua mama foi lena. Ia manuia le Faiga Palota.

Ia, lea Itu o le Maota, e i ai se isi e fia... Ia o lea ua ou vaai atu ua tuu i lalo mea faalogo a le Afioga i le Matua ia Maualaivao. Tulai mai le uluai sui usufono muamua o le Faiga Palota a le Nofoa Tu Taulaga. Maualaivao, ua avanoa le Maota mo le saunoaga i lenei vaega o le aso.

**Afioga MAUALAIVAO PAT AH HIM (Palota Taitoatasi):** Faafetai lava i lau Afioga i le Fofoga Fetalai, vaeane lava le malu, sa aveese au meafaalogo ua mamafa tele, ae ui i lea, ua maua lou avanoa. Ou te tulai atu ma le faaaloalo i le Maota, e muamua foi ona ou faatulou atu i le paia o le Maota nei i le afio o lau Afioga i le Fofoga Fetalai ma le tatou Faigamalo i le Afioga i le Palemia, e faapea foi lou auvaa i le paia o le Kapeneta. Le mamalu ma le paia o Sui Minisita, tainane foi le Taitai o le Itu Agai ma le Sui Taitai, le mamalu o sui usufono ua o le Palemene ma le Malo o Samoa.

E faapea foi ona ou faatalofa atu i le tapuaiga a Lana Afioga Mamalu, O Le Ao o le Malo ma le Masiofo, vaeane foi le Sui o le Fono a Sui Tofia ma lana Masiofo, Afioga i le Alii Faamasino Sili ma le Vasega o Faamasinoga i le Afioga i le Peresetene. Tainane foi Pule o le tatou Malo i Faauluuluga o Matagaluega o lo o faapena ona galulue aua se manuia o Samoa. Ma ou te faatalofa atu foi i le Aiga Sa Levi i auauna a le Atua o lo o faanonomanu ma faapena ona tatalo punouai aua se saogalemu ma maua se Samoa toafimalie.

E faatalofa atu foi i tina ma tama matutua o le tatou atunuu, e faapea foi ona faatalofa atu i lou itumalo Nuu Tu Taulaga i Sisifo. Ae ou te le i alu loa la e tusa ma lenei... ua ou tulai atu ma le faaaloalo ou te le toe asaina le filifili o le vaoasa aua o lea ua faalepa saunoaga ma fetalaiiga foi e tusa ma le aso. Aua o ou paia Samoa aemaise le mamalu o le tatou Palemene.

Ae ou te tulai ma le faaaloalo se i fai foi sina au faamatalaga ma sau faafetai i le Tala o le Tupe e tusa ai ma le aso ma le tatou Fonotaga. Ia e momoli atu lau faafetai i lau Afioga i le Minisita o Tupe po o le Afioga i le Taitai o le Malo, faamalo, faafetai it ala na aumai o le tupe, ma ou te talitonu, o lo o atoa le faasoa. Ma e faaoo ai foi sau faafetai tele i le tatou Faigamalo i le mau auala eseese ma aga eseese o lo o faatino ai ia mea e faatino ai a tatou atinae, tai pei o le atinae nei o Tagata Tafafao Maimoa Mai Fafu, ou te molimau atu, faamalo faafetai i le tatou Malo. E tele le faalauiloa o seleni e lau i le faalauiloina o Samoa i atunuu i fafo i auala eseese e faalauiloa ai Samoa. Ia aumai ma au lakapi iloga o le lalolagi faapea foi tagata i taaloga eseese e i ai fusuaga i taaloga faava o Malo ma fonotaga faava o Malo.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafaiga i luga o le faitauga faalua**

E faapena ia auala eseese nei ou te talitonu ai o lo o faapena ona faamanuiaina ai pisinisi o faletalimalo ae le gata foi i lea, o tagata taitoatasi. Ma ou te faafetai atu ai foi i nisi o faletalimalo iloga o Samoa ua leva ona latou tautua i le faatinoina o lea vaega o le auunaga mo le aumaia o tagata tafafao mai fafo, o lea e tafe mai ai faamanuiaga mo Samoa.

E faapitoa lau faafetai i le faletalimalo o Aggie Greys ua iloga lona sao ia Samoa i le fia ma e oo foi i auunaga o pisinisi tumaoti, falefaigaluega. E pei o auunaga eseese faapea o lo o tele ai galuega i lo tatou atunuu. I nei pisinisi ma auunaga, i laʻu matamata i le Tala o le Tupe, e tele so latou sao i le atinaega o Samoa, e le gata i le fia afe ma afe o tagata faigaluega ae faapena ona faaaogaina fua o faaeleeleaga o faatoaga, faapena ona faaaogaina iā o le sami. Ma o mea eseese uma lava nei, ou te talitonu ai e le tele le tupe e alu ai, e i ai foi taimi e tatou te faatalitali ai e fua mai, ae a fua mai, e fua tele mai e tai selau e le toe motu le tafe mai o faamanuiaga ia Samoa, ma ou te faafetai atu ai i le tatou Malo e tusa ai ma lea vaega.

E oo foi i pisinisi tau amata aufai pisinisi laiti, tulou, o lo o i ai tai pei o atinae nei o maketi, maketi laiti lea sa maua le malaia i le afi, tulou. Ia faamalo faafetai i le tatou Malo i le vave, vave ona tapue vave ona maua le fesoasoani mo tagata. Aua o galuega nei ma atinae nei ou te talitonu e maua mai ai le malosiaga ma le tamaoaga o le tagata e fesoasoani i le tamaoaga o Samoa. I lau vaai foi i ai i le faalauiloaina o Samoa, o le tele ia o le lagolago a le tatou Malo i mea tau pisinisi tau atiae laiti amata, e tele lava auala e faamanuiaina ai latou nei. Ia faamalo faafetai i le Tala o le Tupe, o lona taua lea o lona sao i le tamaoaga o Samoa, aemaise i le tele o mea e faaaoga i nisi o tatou tagata e fai auunaga lea e manuia ai so o se isi. Ia ma o lau faafetai lona mo le tatou Malo e tusa ma le Tala o le tatou Tupe ua taatia nei.

O leni taimi ou te tu atu ai ma le faaloalo lau Afioga i le Fofoga Fetala, e fia fai sau upu laitiiti e uiga i lo matou itumalo, o leni itumalo, sa faaigoaina o le Palota Taitoatasi, ae ua suia nei o Itumalo Taulaga i Sisifo ó ma ua faalautele ma ua atoa ai leni itumalo i se itumalo atoa ma le malosi.

E avea foi leni itumalo i lou tulai mai, ua mafai ai ona matou galulue faatasi ma le tele o tagata eseese, a o i latou nei, o tupu ma tamalii o le atunuu, o tina, tama, faafeagaiga, faletua ma tausii. O tagata uma nei ua aofia i leni itumalo, ma e o lou tulai atu lou itumalo, e momoli atu lau faafetai tele lava ona ua maua sou avanoa i leni taimi o outou faafogafoga mai. Ua ou tulai atu i totonu o le Maota leni i la outou faaeaea, la outou titi faitama, i se ua avea ma o outou sui o se tagata ou te talitonu, e faatauvaa e le faaagatonuina lo outou paia ma lo outou mamalu. Ma e faapea sau faamatalaga i lou itumalo mai Moamoa se i tau i Vaitele pai atu i Puipaa, o nuu uma lava nei e aofia i lalo o leni vaega o le atunuu o lou itumalo lena. Ma ou te talitonu, ua outou faafogafoga mai, Moamoa, faamalo faafetai le tautua, e talitonu o lea ua ou mautinoa e tele o outou manaoga.



26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

O Moamoatai, Moamoauta, Moamoafou, o Moamoa i luga o le mauga, o Moamoa uma nei, o lo o i ai o latou mafatiaga. A outou faafofoga mai, ia faamalo le onosai.

Lau Afioga i le Fofoga Fetalai, o le tatou Malo lau Afioga i le Taitai o le Malo ma le Palemene, masalo e faapea lava lou lagona, e tulai mai se Malo e malosi i le faiga palota o lumanai nei. Ma ou te tatalo atu e i ai le matou talosaga ua taatia atu i ina e tusa ai o Moamoa nei, o auala lava, o auala lava e pei ona matou tau atu i le taimi nei faapea foi ia vai. E i ai vaega o Moamoafou ma le agai i uta e faalagolago i le suavai o le timu. Ia faafetai tele, malo Moamoa le onosai ma le lavapapale o lo o loma le tatou faiga palota, ia faatino mea nei pe a faapea lea e tulai mai le tatou Malo, e faapena foi nisi nuu o le tatou itumalo, e i ai Vaiusu, Elisefou, o manaoga lava nei o auala lava, ioe, o auala, e faapena foi i Vaigaga, o auala. E i ai auala e agai i le sami e aoga foi i mataaga. Ia Vaigaga, onosai o lea faatoa tatou feiloai ma ou vaai...

**Tofa Lealailepule Rimoni Aiafi:** Lau Afioga....

**FOFOGA FETALAI:** Ia, se i malie lava le sui usufono o lo o saunoa, o le a le faauilavea? O se mea e fia faasao po o se mea e fia faamalamalama?

**Tofa Lealailepule Rimoni Aiafi:** Ioe, o le mea e fia faasao i le saunoaga a le Afioga i le sui usufono, aua o lea ua tatou faalogo ua lima tausaga a o lea faatoa pese Moamoa ae ua uma le Paeaiga.

Lau Afioga i le sui usufono mamalu, leaga e le malie i lau faalogo ma le faafofoga mai a lou itumalo, o lea ua saunoa mai pea ia Vaiusu, Vaigaga, o nuu nei o afioaga o lou itumalo, o lea ua saunoa mai pea ia Vaiusu, Vaigaga, o nuu nei o afioaga o lou itumalo, e le iloa pe na o se lima pen a o le ono ni au palota e maua mai ai. O le Aso Toonai na tea nei o lea e faafofoga mai le afioaga, sa matou fonu ai ma le afioaga atoa i Fogavaiusu, alo o Malietoa, Ulugia ma le paia o le afioaga, na matua faafetai mai, Leala, oka, se ua lava na mea i lenei Paeaiga, se i e toe sau fai nisi mea. Leaga o lea e te saunoa mai, o auala e tau if ea tau i le sami ma tau if ea? Ua ou faamalulu atu i lau Afioga, ioe, se i oo i lou taimi ona ou lauga lea ma tau ia nuu mavae ia o lou itumalo, leaga o lea e i lalo o Lealailepule, o au na muamua oo mai i le USP, aua pei o nuu na o Alafua faasolo ifo i Laloanea, ia na pau lava na o nuu Falelauniu, Tafaiata, ae taatia pea nuu mavae, ma lou faaloalo lava.

**FOFOGA FETALAI:** Ia o le manatu e le o ni ai ave, ou te talitonu o lea e sagatonu le saunoaga a le sui usufono, leaga o nuu uma na o lea e i lalo o le faafanua lea e taua ai o nuu utu taulaga, ae manatu foi leaga o lea e tietie nuu utu taulaga i luga o nuu mavae. O le ala lea ou te manatu ai o lea e sagatonu le saunoaga a le sui usufono, ae faauau mai pea lau saunoaga. O le a ave foi le avanoa ia Leala, ona tulai mai foi lea o ia e faalaulau mai mea la ua fai mo lona itumalo mavae, a o taua lea e alu i luga o le Urban.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafaiga i luga o le faitauga faalua**

Tulai mai le sui usufono mamalu.

**Afioga MAUALAIVAO PAT AH HIM:** Faafetai i lau Afioga i le Fofoga Fetalai, ma e o le a le toe tautala i ai ma toe agai a ii tua lau faamatalaga, faafetai mo le faauilavea, ae u ii lea, ia o mea lava e tatau ona faatino. Ae ou te le taea le pola motu i tua ma le faalavelave e le taua.

Ae ou te talitonu, o afioaga nei a o tulai mai le sui usufono lenei o Faleata, ioe, a faapefea la ona fai? O Le mea lea ou te taumafai atu ai au ia, ae u ii lea, e leai, o le a tatou le faataumatatao, ae faapena, aua ne i tetena i lou finagalo, a ua afaina... ae ui i lea, e faapea foi ona matou soso atu i...

**FOFOGA FETALAI:** Ia malie le sui usufono, se i avatu lava le avanoa i le faauilavea a le sui usufono mo Faleata Sasae. O se mea e fia faasao po o se mea e fia faatonu?

**Tofa Aveau Tuala Lepale Niko Palamo:** Lau Afioga i le Fofoga Fetalai, leaga e lavea Faleata Sasae i le saunoaga a nisi foi o itumalo, ae pei e le logomalie le saunoaga a le sui usufono e faapea, a leai se mean a faia e le sui usufono. E pei o lea e faasau i i ia Leala, ia leaga o lea e pei ona silafia, o lea faatoa fai lana itumalo lea se is au na alu lea i ai faamolemole.

**FOFOGA FETALAI:** Ia e manatu lava o le a le afaina lea i le lua sa seelua Faleata i Sasae ma Faleata i Sisifo, e tatau ona oulua fiafia i le taunuu atu o Maualaivao, ma o se matua fesoasoani sili lea, lea foi na saunoa le sui usufono mo Faleata ua tufa sipuni ma naifi ma tui i lo tatou itumalo, se i silasila la i ai, oka se fesoasoani ina tele, ae le o ni ai e avea, o le saunoaga lava a si toeaina leaga o lea faatoa fotuai mai lona tulai mai e faatino aulape o le Tulafono. Ia a o le fesoasoani ia, ia avea ma ni ai, aua le manuia o le tatou itumalo faafotu o le taulaga, o lo o aofia ai Faleata i Sasae ma Faleata i Sisifo.

Tulai mai Maualaivao.

**Afioga MAUALAIVAO PAT AH HIM:** Faafetai lava, e leai, e faamalulu atu a faapea foi ae o le tulaga lea, e leai, ne i te i ua tetena i lou finagalo, ia e le o faapito faapena se tautalaga. E ui i lea, ou te tautala faafetai i le Minisita mo Galuega, Felauaiga ma Atinae Eseeese i Vaitoloa ia, o lea ua faatino nisi o auala sa talosaga atu ai, faamalo lava le manatu ane i lenei foi pitonuu o lo o papaaao ai tupu ma tamalii o si o tatou atunuu. Ia e faapena foi si o matou nuu o Falelauniu, e i ai Falelauniuuta, Falelauniutai ma lau asiasiga foi a le tatou Malo, ia masalo o se taimi talosaga se faleaoga mo lea vaega ma nisi nuu o taulalata ane i ai, e i ai Siusega ma Ululoloa e aoga i nei nuu ua faatuputupulaia ma ua tele tagata ua nofoia nei nofoaga tumaoti.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

Ia o le a le toe faaumia sau faamatalaga i lou itumalo leaga ou te iloina e afaina ai nisi sui usufono, a o lea e faafogafoga mai lou itumalo, ia faamalo faafetai le onosai. Faafetai tele i lo tatou itumalo, ou te talitonu ua lava sau faamatalaga e tusa ai ma lo tatou itumaloo, faamalo le faaeaea, faamalo i lo outou onosai. O le a foi sa outou faafogafoga mai lou itumalo i se galuega le atoatoa, ia, faaatoa e le Atua so matou vaivai, ma ou te talitonu foi i lou titi faitama, ia faamagalo mai foi se matou leo ua paopapa po o ua faaletonu i lau faafogofogaaga lo tatou itumalo. I totonu foi o le tatou Palemene i le tatou vatapuia ma sui usufono mamalu o le tatou Palemene, lau Afioga i le Fofoga Fetalai, faamalo faafetai. O le mea lea ou te maitauina i le tatou Palemene, o le avafatafata ma le faaaloalo o le isi i le isi. E faapena, po o le a lava le fesuiaiga ma le lugaluga ma sousou o le tai i le isi taimi, ou te talitonu, e matua lava i le oo. Tatou te oo lava i le faatamalii ma le faaaloalo o le isi i le isi e toafimalie ai le tatou Palemene.

Lau Afioga i le Fofoga Fetalai, e momoli atu lau faafetai, faafetai i lau Afioga ua toafimalie le Maota i lau taitaiga. Ou te talitonu foi i le Nofoa lena e te seei ai, ua laitiiti le Nofoa, ioe, ua tataua ona sui le Nofoa e te seei ai, ioe, ua tataua ona e seei i le nofoa o le laoi o le tupu. Ae faamalo faafetai mo lau tautua e tusa ai ma lau taitaiga o le tatou Fonotaga. Ia o se matou faamatalaga lea.

Lau Afioga i le sui usufono mamalu mo Faleata i Sisifo, ia o lou tau tu atu lava ae e faalavelave mai, ioe, e i ai se mea ua e popole ai, po o ua afaina ai? Ia aua le popole, e pei ona ou fai atu, a ua iloa ua e popole ma ua iloa e te le toe sau, o le a le mea e maumau ai le taimi e te tu ai ai fua? Ia o lena, agalelei le Atua i lena aso i le tatou Fonotaga, ma...

**Tofa Lealailepule Rimoni Aiafi:** Lau Afioga i le Fofoga o le Fono....

**FOFOGA FETALAI:** Ia leaga o lea sa taua le suafa o le sui usufono, ia tulai mai Lealailepule.

**Tofa Lealailepule Rimoni Aiafi:** O le mea lea o le popole, e le maua i lau dictionary, a oo ina ou moe, ou te taagulu ou te le te i, ia ae ona o le sui usufono e popole, e talanoa i luga o le popole. Vaai foi i le mea na tupu i le sui usufono lea, ua fiu e transfer tagata palota e le o. O e malamalama o au lea e numera tasi lau lola ia Samoa atoa e faalua Paeaiga e numera tasi le lola? Ou te iloa a palota uma Samoa ia te au, e leai sau palota e maua. Ioe, a o lou fai ma e saunoa mai ia te au, Mauala, ua tataua ona e faamavae mai. Ia manuia le Fono.

**FOFOGA FETALAI:** Ia malo...

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

**Afioga MAUALAIVAO PAT AH HIM:** Faafetai, malo le sua. E leai, o le agaga lava ia o tatou tala lava e faapea ona fai, a o le agaga ia, e leai, e faamalo faafetai foi i lou lagolago mai, ma ou te talitonu, ua ou fiafia foi i le tatou mafuta. Ioe, e tele le tatou sao e fai. O le mea taua o le sao, sao e fai i le itumalo, po o ai e faia lea mea ma lea mea, ae o le mea taua, o le faatino o le mea e manuia lautele ai le atunuu, e manuia uma ai tagata. Ia ma lou faaaloalo lau Afioga i le Fofoga Fetalai, faafetai tele mo le avanoa, ia faapea foi ona manuia le tatou faiga filifiliga. Samoa, ia filifili ma le Atua lau filifiliga, ina ia tatou maua ni taitai lelei ma ia manuia ai Samoa, aua e fai mai le upu a le Tusi, òO ai se tumau i lona afioaga paia, na o le e i ai lima mama ma le loto mamaö, ia ma le tatou faiga filifiliga Samoa, ia filifili ma le Atua, e maua ai tatou faamanuiaga ma le manuia o Samoa. Lau Afioga i le Fofoga Fetalai, ia manuia le aso.

**FOFOGA FETALAI:** Malo, malo lava le saunoa ia te oe le Matua Maualaivao, ia e lagona pea le agaga faafetai i taimi uma e te tulei saunoa ai, o lou saunoa faaaloalo ma lou saunoa faatamalii. Faafetai, faafetai mo tuleiga ma saunoaga o lea e faafofoga tapuai ma molimau lo tatou atunuu. O le fetuunaiga foi o lou nofoa e le faigofie, na taofi lava ona e tele le fetuunaiga o le tatou Tulafono sa i ai, ae faafetai i le Atua lea ua taatia i lagatonu. Ia alo ia ma sagai ane ai o le tai, faafetai foi le faafetai mai i le Fofoga Fetalai, a o le fautuaga a le Fofoga Fetalai, e fai si laitiiti o lou ata lea e faapipii i le aualatele, fai se ata tele e pei o le ata o Lefau lea ia na matagofie laia, ae faafetai saunoa. Malo le timai, ia faafetai foi le faafetai i lo tatou itumalo male tapuaiga a le atunuu. Ia lea ua oli mai le moli o Aiga i le Tai.

Ia tulai mai le Feagaiga, Ifopo, lea ua avanoa le Maota mo le saunoaga, ona faasolosolo ifo ai lea i le Aiga Tauaana ia faapena foi le isi sui usufono mo le Fale Vaimauga, ia oo i Finao, ae faauma e le Alataua le tatou session lena.

Tulai mai Ifopo.

**Susuga IFOPO MATIA FILISI (Aiga i le Tai):** Faafetai i lau Afioga i le Fofoga Fetalai mo le avanoa o lenei sui usufono, le sui o Aiga i le Tai. Ia e pei lava e malie i le faalogologo lenei taeao ma lenei Fonotaga i saunoaga matagofie ua uma ona tulei saunoa i ai sui usufono mamalu o le usugafono. E pei e fou foi ma e ese foi lenei aso, pei o le aso lenei, e le gata foi i le toe faatalofa atu, ia ae o se faaftai foi aua ua iu foi lenei Paeaiga i lenei Fonotaga.

O le mea lea, e faatalofa atu ai i lau Afioga i le Fofoga Fetalai, malo lava le faatoatoa, ua api foi le uli ma o lea foi ua faapea ona tatou Fono i lenei aso. Ia malo faafetai i lou tuu avanoa pea i le mamalu o le Maota nei. E faatalofa atu foi i le Afioga i le Palemia ma le Kapeneta, ia faapea foi le Afioga i le Taitai o le Itu e Agaia le Malo faapea foi le Itu a le Tautua, faapea foi le mamalu o le au usufono uma o le Maota o lenei aso. Faafetai, malo lava.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Faafetai i lau Afioga i le Fofoga Fetalai. Ia o le Lipoti o le Tala Faaopopo o le Tupe, e i ai le talitonuga e talia atoatoa e lenei sui usufono le sui o le Aiga i le Tai le Lipoti. Ae lau Afioga i le Fofoga Fetalai, se i ou oo atu lava i lou itumalo ma le agaga faaaloalo. Ua ou manatua vave lava le tama o Siʻoutaulalovasa, le atalii o Siʻouseiʻa ma Fitipupula na malaga mai i Savaii i Faleata nei se i saili le aiga o lona tama i Tafaiagata. E taunuu le malaga i Vaiusu, ua lagona le vaivai ma ua fia inu, na saili se vai ma tau atu i le alia e matutu, e le sua, na moe vaivai le tama, ae ina ua oo i le vaveao, e toe asi atu le alia, ua sua loloto. O lea na mautinoa ai e le alii o Siʻoutaulalovasa, o le vai e usu. O le mafuaaga lea o le tala ma le mau o le tala i le vai ma le usuga e i ai le taeao lenei. O le Malupapa ma le Malumauga o tua o Lepea ma Vaitagutu o Vaiala foi ma Fogavaiusu, ua tau fai mapue ai le matila ma le ofeloa i le afifio o lau Afioga i le Palemia ma lau Kapeneta, afio ai lau Afioga i le Taitai o le Itu Agai, mamalu i le taufaanuu, i le usugafono eseese mai tafa e fia o Samoa ua potopoto, e tu liliʻa foi i le to ae maniti tino i le pisaga. O le manu foi a le Tuifiti na aumai e Muamai ma Mulimai, o le ulugalii mai Savaii na maua e le Tagalao i Vaiafai, ua fia lele ina ua vaaia manu a Samoa, peitai ua taofiofi mamau ona e faigata manu o le Utufiu. Ua sausaufialele ai le manu nai Utufiu ae popoe lava lagona ma manatu e faigata e paia le Fonousu a Samoa.

Ia, matou te faatalofa atu i lau Afioga i le Fofoga Fetalai, faapea le afio o lau Afioga i le Palemia, faapea foi le mamalu o le Palemene, ua api le uli. Ua tufala foi le lafo ma ua maea vavae foi tiʻa o le tautiaga, ua tu foi i siui, o lenei ua toe o se aga, sisi la o le tatou folauga, ua tuanai foi atuava ma atuvasa, ae galo i lenei usugafono le tala i le alualutoto o le galo Ta i Atu o. O tala foi o le Faasaleleaga, o le manatua pule ae le manatua faalaeo.

Lau Afioga i le Palemia, e lagona lava e le usugafono a Aiga i le Tai le faafetai, i lau faatamasoalii, o ou faiva faale-tautai o lau lufilufiga ma lau faasoa ua afe mai i lenei itumalo, faafetai. Faafetai i le paia o le Kapeneta e ala i la outou tali ma ii le faatauana atu a si ou itumalo. Faafetai i sui usufono uma i le lagolago ma ii le tatalo a le Aiga i le Tai. Faafetai i lau Afioga i le Fofoga Fetalai ma lou Ofisa i le tali mai ma fesoasoani mai i manaoga o le usugafono a Aiga i le Tai. Faafetai i Faaululuga o Matagaluega taitasi i lo outou agaga fesoasoani i le tatalo atu a si ou itumalo.

Le paia e o le tapuaiga i le mamalu o Aiga i le Tai, lou itumalo pele, o lo o tu mai i Tafailagi le lagaali a Tamafaiga, o le mamalu taueʻe o le tatou itumalo, ou te faatulou atu. O upu lava o le Aiga i le Tai, ua malie toa ua malo tau. Le paia e o Luatimu, le uluai pou o Malo, e susu ai Leiataualesa, le mamalu ia Futi ma Mutimuti ma le matua o Vaisagote. Malo le tapuai, le paia o Malaetoli, aua le susu o Leiataualesa ma le mamalu o le Falelima o alo o Sapapa, le lauga a le Faletolu ma le matua ia Vai, malo le tapuai.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Tulouna Aiga ma Falemaii, o ana o le maile ma Fogamanono, susu lau Susuga Taupau ma le Aiga Sa Taupau, Susu Mulipola ma le Aiga Sa Mulipola, Susu Luatutu ma le Aiga Sa Luatutu, Susuga Tuilaepa o le Alo o Malietoa, le Matua ia Finau ma le Usoga ma Aiga, alaalatai lau Fetalaiga Auapaau ma le Falefa o Salua ma Sa Tuilagi faapea le Pologama. Faafetai i la outou tapuaiga.

Tulouna Lalotoa i le Susu o Saʻo ma le Aiga Sa Saʻo, le paia o le Usoalii, Susu Tumalauao, mamalu o le alaalatai o Saʻoma. Foi mai isi ou nuu, aua le Susu o Alo o le Malietoa, lau Susuga i le Faaaloaloga Moananu. Susu lo outou Aiga o Leusoalii, Susu le paia i le Fuailefau, faaaloaloga ia Fuailefau Lote, Susu le Pouli ma le afio o Lilomaiava, le mamalu i le Faatei ia Falute ma Amaoso, le Lautinalaulelei, le Tofa i le Tuua ia Vaatiuola ma le mamalu ia te oe Ati ma Lautolo. Le paia ia Satoa, le tatou itumalo, faletua ma tausii, Pouli ma le aumaga, o le malosi o le itumalo, le tupulaga talavou, o le taeao o aiga, nuu, o itumalo ma Samoa atoa.

Ou te faatalofa atu foi i le afio o lau Afioga i le Tama Pule, lau Afioga Patele Douglas Fidow, ma le vasega o ositaulaga, le paia o le aufaigaluega a le Atua i so o se fatafaitaulaga o le tatou itumalo ma outou faletua ma aiga, malo tapuai, faamalo le tatalo. E mautinoa lava e lou sui usufono o lo outou aao ofo mai e ala i tatalo ma tapuaiga, fautuaga ma laufofoga fiafia na ou lototele ai e tauave lo tatou faamoemoe. A o ta felafolafoaiga auupega o le toa, e le gata i le amouta a o le amotai, a o le toeaso nai Moamoa, o le lototele o la outou tuualaga na ou faatoatoa ai e tauave le tatou sao i upufai a le Malo. Faafetai tapuai, faafetai lagolago, faafetai i le tatalo.

O faiva o le gataifale e potu lava le tautai ae sala i ama lona faiva. Loʻu itumalo Aiga i le Tai afai ua faapea lo outou matau mai, faamolemole o faiva o Fiti ia lililo, o le sala o le tautai e tofogi. O upu ia o le tatou nonofo, ae ou te matua momoli atu le faafetai i la outou tapuaiga ma la outou tatalo e oso pea le la i le tatou sailiga Malo. Ua tu le loma i le faamoemoe o le atunuu, o lana faiga filifiliga mo le Palemene o Samoa. Aiga i le Tai, ou te ofo atu lou faatauvaa ma lou malosi atoatoa ma manuia na aumai e le Atua e avea ai au ma auauna, o lea lava ou te malosi. Ou te augofie e faatino lou finagalo ma faamaea le anoanoai o fuafuaga pei ona sa taumafai atu ai ae le i faatinoina uma ona o le taimi ua utiuti, aumai lou faatuatuaga ou te faaauau ai ae e le fai lotu lava loʻu tagata.

Lau Afioga i le Fofoga Fetalaiga faamalo pei lava ona ou fai atu faamalo i lou faatoatoa i le tatou Fono, faamalo foi i lou faaloto malosi ia i matou uma o sui usufono o lenei Palemene. Ia e faamalo foi i lau Afioga i le Palemia faapea le mamalu o le Kapeneta faapea foi le Itu Agai ma le mamalu o sui usufono uma o le tatou Maota nei faafetai mo le usugafono. Ia pei ona malie foi i saunoaga e lua itu o le Malo nei, ia ae faapena ona tatou nutinuti mea faatasi i le tele o tatou Komiti. O le mea lea e faamalo atu ai i le mamalu o le au usufono, faamalo i mea uma lava ua foaiina mai mo le tatou Paeai lenei. Ae pau lea o le tatalo, faamolemole ia manatua pea si o matou itumalo o Aiga i le Tai i fuafuaga uma.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ou te faafetai atu i lau Afioga i le Palemia ma le Kapeneta i fuafuaga uma ua faapena ona faataatia mai le auala i tai i Manono, o le vai, o uafu, o le auala lea ua amata atu i Mulifanua agai i o i Apolima ma Salua, malo faafetai e ui lava e le i amataina. Ae ua talia talosaga sa faapena ona faatauanau atu ai mo fuafuaga. Ia o le tagi a le sui usufono mo Aiga i le Tai e le o manaomia faapea e fai uma i se taimi e tasi, e lelei a le fai ma auaua<sup>o</sup> ae ia fai foi le mea e faamuamua aua le tatou nonofo ai. Ia faamalo foi ia Puleono aua ou te talanoa atu tatou te eseese ma isi itumalo, leaga ou te talanoa atu o matou o le motu e le o se itumalo tou te faatofa i ai pe a outou agai i Puleono ia faapena foi le femalagaa<sup>o</sup> atu o Tumua ia faapena si o matou nofonofo ma iisi o matou tamai motu o Manono ia po o Aiga i le Tai. Malo, faafetai i lau Afioga i le Fofoga Fetalai mo lo<sup>o</sup> avanoa, faafetai mo lenei usugafono ia manuia faafetai.

**FOFOGA FETALAI:** Malo saunua i le sui usufono mamalu o Aiga i le Tai lau Susuga Ifopo, e manatu o le fofoga taumomoli lava lea o le tatou itumalo i ona tulaga faalupe. Ia aua ia le alo le foe ma faanape, tatou faamoemoe i le Alii pei o upu o lenei aso, tofi mai lagi tatou nofoaga fou. Ou te talitonu e leai se masalosalo ua lava ma totoe foi galuega sa faatino i lou taimi, but lets all pray. Ia o lo o faagasolo mai pea le tatou laina lea i tua, o Aana o le sui o le Komiti, ia o le a agai i le Fale Vaimauga. Ia o le a tuu atu ia le avanoa i sui o le Komiti leaga o lea e matau atu e le i sauni nisi o sui usufono, tulai mai lau Afioga Taefu Lemi, sui o le Komiti o Tupe. Ia e lelei foi lea e vavae foe se i faalogologo le tatou Maota.

**Afioga TAEFU LEMI (Falelatai & Samatau):** Malo faafetai mo le avanoa i lau Afioga i le Fofoga Fetalai. O le itumalo e le tauanauina le lauga so o se taimi a e lauga ai, po o totonu o le Palemene pe u<sup>o</sup> le tootoo ma le fue, lauga tup e lauga saofai, lauga i le pulelaa po o fafo ma fale so o se taimi a e sauna. O le mea la lea lau Afioga i le Fofoga Fetalai ma le faafofoga mai o itumalo ia e leai e le o nofoai lenei sui usufono.

Ia ou te faatalofa atu i le paia o le Maota i lau Afioga i le Fetalai, ia malo lava le faatoatoa i le faatautaiga o le tatou fonu le Fonousu a Samoa i lenei 5 tausaga ua lamalama faaii. E faatalofa i lau Afioga i le Taitai o le Malo, Sui Taitai ma Afioga i Minisita o le Kapeneta, faatalofa foi i lau Afioga i le Taitai o le Itu Agai ma le Sui Taitai ia ae a le paia ma le mamalu o sui usufono mamalu o lenei Palemene o le Fono Aoaofaitulafono o Samoa. E faatalofa foi i le paia o Faauluuluga o Matagaluega ma Faalapotopotoga a le Malo i latou o lo o vae ma lima i ai le galuega o fai nei, le Ofisa o le Fono e tautuaina le tatou galuega. E faatalofa atu i le paia o Samoa o faafogafoga ma ii itu e fia, Lana Afioga Mamalu, O le Ao o le Malo, lau Afioga i le Tama Tauaana, le Sui o le Fono a Sui Tofia, le paia o le Faamasinoga ia ae a Auauna tofofi a le Atua o lo o faafalelemalu ma faafaletulua i itu e fia o Samoa e nonomanu aua Samoa ma lona manuia.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

E faatalofa atu ia Samoa i lona tulaga aoatetele aua le paia o Aiga ma Tama, o Tama foi ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Ou te faatalofa isi ou itumalo i le paia o le Aiga Tauaana ma le latou Tama le Falefitu o le Ati Tagaloa ae a Fasavalu ma lona Aiga, Salu ma Auvaaipeau, le Taotoalii ma Tama a Tausala, le Taiva na falefia i ai Aiga, Tonumaivao o lo outou matua aiga, taeao Tuaomauga e alaatai ai Galuefa ma Tula o Salogo, o Falelatai ma le Tagata o le Vavau ma le vae o le Nofoafia.

E faatalofa atu isi ou nuu o Samatau, Falefa o Usoalii ma le Gafa, Fiamē ma le Tamaitai, ae a le mamalu o le saofaiga ia te oe Leulumoega. E faatalofa atu i lau Afioga i le Taitaifono, Sui Taitaifono lau Susuga i le Toeaina Faatonu Tautiaga Senara. E faatalofa atu i lau afioga Patele aemaise foi o lo outou sa seetolu, Patele ma Patele ma Patele. E faatalofa atu i lau Susuga i le Aao Tusitusi o le Pulega, o le fofoga lava lea aua le Matagaluega, faatalofa atu i lau Susuga Livigisitone Toelupe ia o oe a ua tusi matuaina i le saofaiga a le aufaigaluega tofoti a le tatou itumalo. Ia o le matou faatalofa lea e faapai atu ai i la outou faafofoga aemaise foi o le Fonousu a Samoa.

Lau Afioga i le Fofoga Fetalai, e i ai nai vaivaiga e fia agai i a ii le Tala o le Tupe muamua ae le i agai se faamatalaga i si ou itumalo. Lau Afioga i le Fofoga Fetalai e momoli le faafetai i le Afioga i le Minisita o Tupe mo le tatou Tala o le Tupe pe a fua i le aofai ua faataatia mai ia e i ai a le manatu ua tataua ona pasia loa ae tatou malolo. Ae ui o lea e faigata o le tatou toe Fono lenei a o lumanai ai le Faiga Palota. Ae i ai lava le manatu i nai mea laity atonu e aoga, e faafetai atu ai i le tatou Malo i tulaga uma ua i ai. E i ai lava nai isi foi o manatu sa faaalua sa ou taua foi le vala lea i le resitalaina o le tagata Samoa ina ua faatoa fanau mai seia oo a ina ua valaau mai le Atua ma faamaloloina ana galuega a o tumau lava le numera lea e iloa ai lava lea tagata. Ou te talitonu au o se faiga e taua, se Id foi lenei e mafai ona fanau mai loa le pepe tuu loa i ai, alu ane i le aoga faasolosolo mai le olaga aoga alu atu e faigaluega avefa ma Matai, avefa ma tagata palota ma alu i le falemai pe malaga i fafo ae tasi a le numera e iloa ai. Ou te talitonu foi o le a faigofie ai, aua o lea tatou te alo atu i le Faiga Palota ae le o fealofani lava le galulue ai o Matagaluega e tolu, e pei o le Matagaluega o lo o lesitalaina nei le aupalota, Matagaluega o lo o lesitalaina Matai ma le Matagaluega e lesitalaina i latou e fananau mai ma e maliliu. E le o iloga a ona fealofani faamaumauga a Matagaluega ia e tolu, aua e taua le galulue faatasi.

O le mea lea e i ai nei o le lesitalaina o tagata palota masalo o le 80% e fai e le mamalu o sui usufono o le Maota, aemaise i latou o lo o olioli mai i le Faiga Palota. Ae o se vaega lea e ao ona silasila i ai po o le a se faiga e tuuaititia ai le faatinoga lea e faatino ai nei. Aua a le Maota nei e lesitala le mamalu o le atunuu, ia e uma ane lava le piliota lea e faatulaga mo lea galuega e lei uma ona lesitala. Ae pei o le agaga lea, na ona oo lava o le tamaitiiti lea sa lesitala ina ua fanau mai i le 21 o lona tausaga, okometi lava ona fiki i o i le mea e lesitala ai ona vaai foi lea e le Ofisa o Pepa Fanau pe ua oti po o la lava e ola vaeane le Maota.



26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

A oo foi ina malaga i fafo o le numera lava lea e fesootai ma ia, a Matai foi le tagata o le numera lava lea e okometi ona piki mai i o, ta te le tau sau e avatu le pepa na lesitala ai le Matai ae okometi lava ona fai ia mea ona e i ai le number lea e mafai ona ID pe trace atu ai le tagata mai lea vaega i lea vaega. E faigofie foi ia mo tatou aua a fai Aoga faataitai i Siufaga ae aoga i le Kolisi i Avele faaii i le Iunivesite ma alu atu i Ausetalia ae mafai lava ona trace i le tatou system lea e i ai le faasologa o le olaga aoaoina o lea sui ma lea sui o le mamalu o le atunuu. O lau lea faatauanau pe faaoololomaau i le paia o le tatou Maota, o se faiga e lelei mo le agai i luma. E tatau lava ona okometi le faiga o le lesitala pe a mautu a tatou faamaumauga, pau lava le mea e agai i ai le tagata i o, o le toe pueina o le ata ina ua atoa le 10 tausaga, pue le ata ina ua 20 tausaga ma faasolosolo atu ai ia update lava le ata. Ae o faamaumauga lava ia o lena ua i ai le aso na fanau mai ai ona faaopoopo lea i ai o Matai ma tulaga faapena. O le mea lea ua tupu, o lea lava e i ai tagata ua suafa Matai ae le o lesitala ai i le Suafa Matai, o la e lesitala i le suafa taulealea ona o la e manatu i le vaega o lo o suafa ai i le suafa taulealea. Ae o ia mea ua tatau ona taofi, ae okomeki lava le palota o le Matai ina ua matai po o fea lava le Itumalo e le mafai foi la ona alofia e le atunuu, leaga o le la lava ua i ai a tatou faamaumauga e iloa ai. O lau lea tatalo lau Afioga i le Fofoga Fetalai, o lea ua tatou sauni e fai malologa i le 5 tausaga ao lea e i ai lava nai suiga, tele suiga o le Faavae ua o tatou faia. E faafetai i le Alii e le o se Tulafono e tamau e pei lava foi ona malie i saunoaga, o le mea lava foi e mafai ona fai ma silasila i ai e faaleleia atili. Ia tailo i ai ta te nofonofu ma vaavaai i le tulaga o i ai le atinae faaleagaga o tatou tagata. E i ai le vaega foi nei e tuu saoloto ai tapuaiga i totonu o le tatou Faavae, ou te tilotilo lava i le vala lea freedom of religion. Ou te vaavaai lava i ai aua e alu aso sau aso e mou atu lea augatupulaga sau lea augatupulaga, a o se teuteuga ina ia laugatasia ai Samoa e Faavae i le Atua, le Atua lea na liutino tagata pei ona molimau mai ai le Tusi Paia, le Tama, le Alo ma le Agaga Paia. E le faapena uma Religions, e le faapena uma tapuaiga ae e taua lea vala ia te au. Ou te le o manatu i le isi 10 tausaga po o le isi 50 tausaga, leai masalo o le isi 100 tausaga leaga e tala lotu le tagata e i ai taimi e eseese ai. Ae a tausila lava le tapuaiga e tasi tapuai i le Atua Tasi Tolu Paia, ona ou talitonu lea ua malu Samoa. O le mea la lea o lau tatalo e leai e le mo nei e le mo taeao ia ae o auga tupulaga fai mai atali.

Faafetai i le suiga mai i le 5 tausaga ua i ai ia tatou fesootaiga televavave, faafetai i le atinae lea i fesootaiga tau internet. O le tasi lea atinae ua leva ona ou lauga ai foi ma tuualalo e alofa ane ia i le tau o vaega ia, aua e faaoga e nai tamaiti aoga, faaoga e le Iunivesite ia le atinae lea. A tuu foi e tatou le atinae lea e faaleago i ai, ia leai lava se eseese o Samoa mai le fesootaiga ma le taualumaga o i ai le lalolagi atoa. O le mea lea ou te faafetai ai i cables o faataatia solo ina ia mautinoa o maua e tatou le atinae televavave i se tau e taugofie. E lelei lava le vaavaai pea vaavaai pea, aua o le mea lea e i ai, a fai lava le pou a le Blue Sky na o le Blue Sky lava ia e faaogaina. A fai foi le pou a le Digicel, na o latou lava ia e faaogaina.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Na ou fesili atu i le vaega lea e nafa ma lena atinae, po o le mea ea e maua se interference pe a tuufaatasi i le pou e tasi tower a le Blue Sky ma le Digicel? O le tali e leai, na ou fai atu lea, o le a le mea e le tasi ai le pou ae tuu uma ai masini ia e lua a le Digicel ma le Blue Sky? Ae sefe ai le space ma le tele o nei mau pou e tutu ai, aemaise foi o luga o mauga e tau le lava le tumutumu o le mauga mo pou e lua pe tolu pe fa. A o la lava e tasi le pou ae faaoga uma e auunaga eseese. Ae taatia atu faapena, na pau lava le mea o le agaga faafetai ua i ai ia le vala o le atinae, e manuia ai nai o tatou tagata. Talosia ia ou faiva lau Afioga i le Minisita, aemaise foi o le Faigamalo ina ia tini mai le cable lea e sau mai o i Ausetalia agai mai ai i Samoa i Fiti. Ina ia vave ona maua se toomaga mo nai tamaiti aoga mo le taumafaiga o le internet. O le mea foi lea e i ai matou ia e taumafai e faaoga lea auunaga, o le tele lava o le taimi lea e moomia ai le alu i le Ofisa e faaoga le internet, e le mafai ona ta faaogaina i le fale, e taugata tele. O le tuualalo lea i lau Afioga i le Minisita.

E momoli lau faafetai tele, lau Afioga i le Fofoga Fetalai i le Palemia ma Minisita uma o le Kapeneta. O lau faafetai lava lea i Matagaluega e fia ma Faalapotopotoga e fia a le Malo. O le 5 tausaga e i ai lava foi taimi e siisii ai le leo ma tauanau se fesoasoani, ua manatu lava ua tatau ma onomea ona faaleo le agaga o le faafetai. Faafetai mo atinae fai, e le gata i totonu o Falelatai ma Samatau, a o le aotelega mo Samoa aoao i le atinae o lo o manuia ai le tatou atunuu. Faafetai i le galuega fai ua faapena ona alualu ai i luma le tatou tamaoiga, o mea lava ua fai ua lelei, viia le Alii ma mea ua fai ae le i atoatoa ona lelei, toe sasaa ane le fafao ina ia silasila mo le agai i luma, po le a lava se faiga ua sili lona lelei e faatino ai, a o mea lava ia ua mafai ona taunuu mai i le faaiuga o lenei tausaga ua mafai onan tatou faia, o mea na e osi ai le taulaga i le Alii. Faafetai mo le faaogaina o le sui usufono o lenei itumalo i totonu o le Palemene. Faafetai i Komiti sa galue ai, sa galue o se sui o le Komiti o Tupe, sa avea o se Taitaifono o le Komiti o Ofisa o le Palemene po o le Audit Committee ua tatou silafia ai. Na avea ma sui o le Taitaifono foi o le Komiti Suesue, o se uluai Komisi Suesue ua faavaeina mo le Palemene o Samoa talu ona tutoatasi. O nai vaega ia o le auunaga sa faaogaina ai lenei itumalo e tautua ai ma fai sona sao i le tatou Palemene. O le mea lea e momoli ai le agaga faafetai.

Faafetai mo le faaogaina o lenei itumalo i malaga sa malaga atu ai i fafo e sailimalo le tatou Palemene ao le tatou atunuu i fogalemalo i le lalolagi ma le vasaloloa. E momoli ai lau faafetai i malaga e lima sa ou mauaina. Faafetai i lau Afioga i le Fofoga Fetalai, e lua malaga sa auala mai i le tatou polokalame faale-CPA, e momoli ai le faafetai. Faafetai i le Minisita o Tupe faapea le Faalapotopotoga o le SIFA i le faaogaina o lou tagata i le malaga sa malaga atu ai. E faafetai foi i le Kapeneta sa maua mai ai le malaga i Sigapoa na faaogaina ai lenei itumalo e fai ma sui o le atunuu.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

Faafetai i lau Afioga i le Sui Palemia, po o le Minisita mo Fefaatauaiga, ma le Matagaluega o le MCIL mo le malaga na fai ai au ma sui o le tatou atunuu i se tasi o fonotaga sa usuia i Peru. O le faafetai tele lea i lau Afioga i le Fofoga Fetalai aemaise o lenei Palemene.

Lo tatou itumalo o faafogafoga, ia ou te le i sau i le Palemene lenei e saili se mea ou te nofo ai, ou te le i sau e saili sou manuia i le Palemene lenei. E leai na ou sau ua uma lava ona faamanuia le Atua ia te au, ou te sau e faaaogaina lou ola ma lou malosi ma se vaivai o i ai, e tautua ai le tatou itumalo. O le a ea se mea ua fai, o le a se mea ua mafai, ia tofamalie ma utamalie, ona pau o se mea ua mafai e le auauna, a o se tautua sa fai i le tatou Malo e fai ai ma sui o le tatou itumalo o Falelatai ma Samatau. Ou te sau i le Maota o au o se tagata sa faigaluega e usu mai Falelatai o pogisa, e toe taunuu i Falelatai ina ua manava o pogisa lava. O le ulufale mai i le Palemene, na ou matauina ai e i ai nai taimi ma laolao e fia faaaogaina ai le tagata e moomia nisi mea e tatau ona fai. Masalo ana se galuega e mafai ona saili se isi part time e faatino, ona faatino lea. Nei, sei tulou le Maota, o Minisita lava ia ma le Palemia ma lau Afioga i le Fofoga Fetalai ma outou uma e pisi lava, a o le faaaogaina o le sui usufono o lenei itumalo, o lau lava matau, e lelei i le saili o nisi mea e fai. O le ala lea e manava ai ma tuua le Fono i le agai atu i Falelatai ae sau le faasilasilaga a le Aoga Tusi Paia i Malua ao agai atu i le taavale, ona afe loa lea i Malua, afe e faalogologo ma vaai po o le a lea mea e fai. Lua tausaga, o fai le aoga Tusi Paia i Malua, 2011, 2012 maua le Certificate, maua le Diploma, o mea e faigata ma e seasea ona ausia e le toatele o e fai mai i le Maota nei. O le mea lea lou itumalo e, na sili lava ona ou iloa le Atua aua na tatou ola ane lava ma outou soifua tatou malamalama i le Atua lea tatou te tapuai ai. A o la outou sui usufono i le Palemene, na sili lava ona malamalama i lona Atua ina ua outou filifili o ia e alu e fai ma outou sui usufono i le Palemene o Samoa.

O le mea lea e momoli atu ai le faafetai i lo tatou itumalo mai lava i le 2011, ina ua outou filifili ia te au, na ou iloa ai. E mai lava i lenei taimi i le agai i luma, e le toe faigofie le palota a le tatou itumalo. Aisea? Aua foi o le amoa sa faalava i lea faamoemoe ua le o toe i ai, o le mauga sa faigata ona aea, a lea ua mafai ona aea. O le toamanumanu o le tagata malosi ua mou atu ua tulai mai le tagata vaivai. Ua faaseetuagalu le tagata e le taualoa, e le tau ai la outou silasila. Ona ou manatu ai lea, e le faigofie le agai i luma mo le tatou itumalo. Ua leva lava ona faauuina Tavita, ae le iloa e tagata Isaraelu, ae na toilalo loa Koliata iloa loa e Isaraelu le tagata e igoa ia Tavita. Ua leva ona faauu Tavita ae leai lava ni ona fili, ae na toilalo loa Koliata, i ai loa ma fili o Tavita, ao fili o Tavita o e o lo o faia le nuu o e o lo o taitai i le nuu.

O le mea la lea lou itumalo e...

**Tofa Motuopuaa Uifagasa Aisoli Vaai:** Lau Afioga i le Fofoga Fetalai .

**FOFOGA FETALAI:** O le a tuu atu le avanoa i le faauilavea a le sui usufono mo Vaisigano Nu.2

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

**Tofa Motuopuaa Uifagasa Aisoli Vaai:** Leai na ona ou fia fesili atu lava i le sui usufono lea e saunoa nei, pe a le toe tulai mai i le palota, po o i ai sona faamoemoe mo Malua i le tausaga fou. O le tulai atu lea ma le faaaloalo.

**FOFOGA FETALAI:** Sei tulai mai le sui usufono e faaauau mai le saunoaga.

**Afioga TAEFU LEMI:** Lau Afioga i le Fofoga Fetalai, ua ou iu mai Malua. Ae po o fea lava e tofi i ai e lauga, so o se mea lava la e alu atu lava le lauga. Faafetai mo le faauilavea. Fai mai le isi talitonuga, afai o lelei le tatou itumalo o au o le tofi o le Falefitu o le Aiga Tauaana ma Tuimalealiifano, o lea ua opogi e Leulumoega le Falefa o le Usoalii ma le Gafa, Fiamē ma le Tamaitai, la outou saofaiga Leulumoega. Le mea la lea, faafetai aiga, faafetai Leulumoega i la outou galuega e tausi vaatele aua aiga ia. E tasi le mea na iloa ai Tavita lau Afioga i le Fofoga Fetalai, ona na uma loa Tavita ma lona atalii amata loa ona taapeape le nuu. O Tavita ma lona atalii sa tasi ai le nuu uma loa vaeluaina le nuu, o isi i Matu, o isi i Saute, o isi e fai Isaraelu, o isi e fai Iuta. Na uma loa Tavita ma lona atalii amata loa lea ona vaeluaina le nuu.

Ona ou manatu lea, oi se talofa i nai tuua ua lagomau mai Tiasa, o i latou sa asa le vaofilifili o le atiaeina o le nuu, o i latou sa maua ai le autasiga o le nuu, o i latou sa faataoto maia le alafua tou te solisoli muliaao i ai, e maua ai le nofo lelei, maua ai le maopoopoga, o i latou na tasi ai le nuu. O le mea lea lou itumalo, ou te le faumalo lava i sou lagona, ae pau lava o lea, o mea o ia te au o mea na e fai ai le auaunaga, le tautua i le itumalo. E pei lava ona ou taua, ou te le i saili mai se oa po o se manuia i totonu o le fale lenei, leai, o mea uma foi na ou maua a o i totonu o le fale lenei, sa atinae ai le tatou itumalo ma fai ai mea fai o le tatou itumalo. O le mea lea e momoli atu ai le faamalo i le tatou itumalo, le tofi o le tofi mai le Atua. O le valaauina o le tagata o le valaauina mai le Atua, tatou faatalitali po o fea o i ai le tatou valaauina.

Le itumalo e pele i le agaga, Falelatai ma Samatau, alo ane ia i lau filifiliga, sema se mago, fili se agavaa, fili mai se tasi e galue mo le itumalo, se isi e galue mo le Malo o Samoa, fai se sao mo le ta itumalo aua le Malo o Samoa. O la outou faaaloalo ma la outou faaeaea ua tuuina mai mo lou nei tagata, ia o la outou pule lea, ua malieo ua malie malo, ua malie le faga i Paau, ua malie le faga i Lalau, ua malie le papa i Tau, ua malie le papa i Lau, ua malie le Papa i Galagala ua malie le Faatolotologatama, ua malie le soavaesele i lau pule ua to to tetele. O le mea lea le itumalo e, ia manuia lo outou alofaiva i le faiga filifiliga a le atunuu, manuia le Fonousu a Samoa. Manuia le tapuaiga a Samoa o lo o fita faafogafoga mai, manuia ona o Iesu. Amene.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

**FOFOGA FETALAI:** Malo saunoa i lau Susuga i le Faafeagaiga Taulagi. Aua e te popole, o le a ea le mea e te atugalu ai, ua alu le aso lenei, o lea foi ua fesiligia oe pe e te alu afea i Malua. Ia lafo laia i le Alii, o lea e faafogafoga tapuai mai le tatou nuu. E le o ni upu e avane ai, o latou e faia le filifiliga atoa ai ma le musumusuga a le Alii e fua i le tatou galuega ma le valaauina. Ia lafo laia i le Atua le faamoemoe, o se taimi ma se aso, e le faia i le ala upu o lea e saofafai mai i maota ma laoa e fonoa ai le tupua ma le laoi, e faapena ona ua le aulapauta ma le aulapatai e faatino ai le filifiliga amiotonu ma le tofiga a le Atua mo i tatou uma. Ae faamanuia atu foi i le sui usufono mamalu. Malo foi le galue, e le na ma le laina lou foi tulai mai i le tauaveina o le tatou galuega, aemaise o le faatinoga o Komiti, o lea foi e molimau le Fofoga Fetalai. O lea foi ua faafetai i le itumalo, ia avea lea i uta.

Ou te taofi ua tatou taunuu i le tatou taimi malolo, sei vasai foe o le a tatou o e fai le tatou faasiliga malosi ona tatou toe faaauau ai lea pe a maea mai le tatou malologa masani.

*Na faataatiaese Taulumaga a le Fono Aoao mo lana malologa masani i le itula e 4:43 i le afiafi ma toe faaauau i le itula e 5:25 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2015/2016.*

**FOFOGA FETALAI:** E faasilasila atu ua toe amataina nei Taulumaga o le Fono Aoao Faitulafono.

E faamalo atu le onosai i lenei vaega o le aso, i le paia ma le mamalu maualuga o le tatou Maota. E ai le talitonuga o lea ua tatou taunuu i le afa mulimuli o le tatou galuega i lenei itula o le afiafi. E talitonu o lea ua maea palega auau le taliga o le sua ma e manatu foi ua maua le tou faasiliga malosi e faaauau ai le tatou galuega. Ia malo le onosai, malo le tauatai, faamalo foi le usufono.

E faia le tatou malologa ua faamaea mai le saunoaga a le sui usufono mo Falelatai ma Samatau. Ae o le a faasolososo ifo pea faapea. O le sui usufono mo Gagafiomauga Nu.2, ona sosoo ai lea ma Vaimauga Sisifo, o Finao, ae faaiu i le Alataua. E manaia ae faatea mai le tou faalau lena ona agai loa lea o le tatou ona totoe ai lea o le toe Ulutaia o le tatou Maota.

Tulai maia le sui usufono mamalu. O le Tootoo o Lavea e sauni i so o se taimi, o le muaau aua le usoga a Pule ma Tumua. Tulai mai ia le sui usufono mo Gagaifomauga Nu 2, ua avanoa le Maota mo lau saunoaga.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

**Tofa SOOALO MENE (Gagaifomauga Nu.2):** Faafetai i lau Afioga i le Fofoga Fetalai mo le avanoa ua tuuina mai e fai ai foi se sao o lenei itumalo e ala i le Tala Faatatau Faaopoopo o le Tupe, o lo o ua tatou tauaaoina nei i luma o le Laulau a Fono.

E muamua lau Afioga i le Fofoga Fetalai e le itiiti le agaga faafetai i le alofa matalasi le faatuaoina o lo tatou Matai Sili i le lagi i lenei foi taimi faaumiumi o le tatou Matai oi le lagi. Ia goga ia le viiga o le Atua i ana Auauna Totofi o le Talalelei aua o le latou faiva foi lea, o le tatalo i le ao ma le po aua se manuia mo Samoa.

Lau Afioga i le Fofoga Fetalai, ou te faatulou atu i le paia o le Maota, e faatulou atu foi i lau Afioga i le Fofoga Fetalai. O lea e ee maua luga le Afioga i le Taitai o le Itu Agai, ia faapea o lea foi e faalepa sa o itumalo taitasi, sui usufono na faa mai le fuifui aua upufai o le Malo.

E faatalofa atu foi i Ofisa Sili ma Pule Sili o Matagaluega ma Faalapotopotoga a le Malo, lau Afioga i le Failautusi ma le Ofisa o le Fono e lima ma vae i ai le tatou Maota nei. Ou te faatulou atu foi ia Samoa i ona tulaga faalupe i le afio o Lana Afioga Mamalu o Le Ao o le Malo ma lau Masiofo, Sui o le Fono a Sui Tofia ma lau Masiofo, le Faamasino Sili ma le Ofisa o Faamasinoga.

E faatalofa atu foi ma faatulou atu i Taitai o Ekalesia eseese aemaise foi o le au ositaulaga o lo o faafaletulua faafalelemalu, o lo o faatuna paulia foi i malae e fia o le atunuu.

E faatulou atu foi ia Samoa i lona vavaloloa aua le paia o Aiga ma Tama o Tama ma Aiga, o Aiga o Tupu, Aiga o Nofo o Aiga o Papa o Aiga na Taifaifa, aua le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E le faagaloina foi le tapuaiga a le motu i Sasae i o tatou uso aua le susu o Sua ma le Vaifanua, Fofu ma Aitulagi, Saole ma le Saleaumua ma le Launiu Saelua, Tama a le Manuatele ma le Tootoo o le Faleula, ma le mamalu i le Faleagafulu. O paia na o Samoa mai le Taisamasama o le Tuimanua seia paia Fili ma Puletuu, na itea ai Mataniufeagaimaleata, Faleu ma Utuagiagi, o Malaeola ma Nafoga. O taeao na o le Talalelei, o taeao na o le manumalo ua fai ma faavae papa o Samoa. O lea ua paia ma mautietie ai Tiafau na tauave nei ae taui ma liolio e le mamalu ma paia faaleatunuu.

Ona ou oo mai ai lea i le Tala Faatatau Faaopoopo o le Tupe, lau Afioga i le Palemia po o lau Afioga i le Minisita o Tupe, e avea foi lenei avanoa taua e momoli atu ai le faafetai a lenei itumalo i lau Afioga aemaise foi o le Kapeneta i outou faiva alofiaa i lenei foi lima tausaga o le a mou atu. E i ai le talitonuga e tele lava fita ma faigata o le ala sa outou uia aemaise foi o le tele o le tomumu e ala i le tauavameaina o le atinae o le tatou atunuu, ae malo le onosai. E ui lava ina tele foi faitioga ma tuuaiga e tuuina atu i a outou Afioga, ae o lo o onosai pea ma fai lava ma le lototele ma le toa, malo le onosai, malo foi le faapalepale, malo foi le silasila mamao aua le manuia o si o tatou atunuu ma lona atinae.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

O le faafetai a lenei itumalo ua uma ona taoto atu nai atinae sa talosagaina mai le amataga mai o lenei Paeaiga, ou te molimau atu ua 95% ua ausia pe a fua i ai i le faataotoga ua i ai nei. Ia e lagona ai le agaga faafetai ma le faamalo, faamalo le onosai, malo le lototetele. Ou te molimau atu ua femolimauai nai tina ma tama e oo lava i nai fanau o si o matou itumalo e ala i le faatinoga o outou faiva alofiaao. E le taumate foi o le agaga lena o le atunuu lenei i le tele o atinae ia ua latou lagifetalai i le nanamu ola o la outou tautua ma la outou auaunaga e ala i atinae ua faatinoina mo le manuia lautele o tatou tagata.

Lau Afioga i le Fofoga Fetalai, ona ou oo atu lea isi ou itumalo. Le paia e o lou itumalo Gagaifomauga Nu. 2 aua lo oulua Falelua Safune ma Samauga e amata mai Fatuvalu, Faletagaloa ma Matavai aua le afifio o Tapaau ma Sausi, le toafa o alii ma Tuumatavai, ia faapea le Susu o le Alii ole nuu, lau Susuga Leota, alaalatai le toafia o tama tulafale ma lau fetalai i le Tuua Tugaga ma lo oulua Toalua Sa Oloapu ma Safune.

Liliu le vai o Sina i lea itu o le vai i si ou nuu o Lefagaalii, Samauga ma Paia aua le afifio o Sao e Fa. Lau Afioga i le nofo matua, Tuu, Fuimaono, Tuailemafua ma Malaitai, le nofo Usoalii ma le Aiga Sa Peseta faapea Pagamalie, Mauai, Laupue ma lau fetalai i le Tuua o Sooalo, ma lo outou Faleupolu o Samauga.

Ua faapoopo nei ni aso ua ae ua le tuua aso folau, ua sina le galu ua ite foi fanuaalalo, ua tuanai atuava ma atuvasa, o lea foi ua faatauata le la ma le masina. Lou itumalo pele, le Falelua Safune ma Samauga, ua le toe pouliuli lau silasila ma lau faafofoga i lenei foi lima tausaga, o lea ua magoto le igafu sa tuliaupu e le aiga tautai na afua ai ona ou ulufia maota ma laoa o le tatou itumalo ina ua maea le faiga filifiliga i le tausaga ua mavae. O le agaga moni o le atalii, e moomia la outou tatalo ma la outou faamanuiaga ae le i nofoia le nofoa o le itumalo. O lea sa e tusi ai le faafanua ma faasino le tapasa ou te savali ai, aua e vaivai le auauna, e oge foi manatu ma mua le vao i lo outou atalii, ma ou seu ai i Falemua e ala i lau puleto ma lau faaaloalo i le nofoa o le ta itumalo, ae sa e seu i falevaai ma tui mai le mulipapaga atoa ai ma lau tapuaiga lelea i le ao ma le po.

Le aufaigaluega paia a le Atua, sa e po le fala ma ula le magalafu ae lagona ai le malosai, lagona ai le fiafia, aemaise le mafanafana o le loto. Ona ou manatu lea, e fai foi o le ae i faga, a o le ifo i fagaoa, e ae i le ti ae ifo i le nonu, e ifo i le lio ae ea i le fuiono. Ou te le folomolemoleina lau faaaloalo, ae tainane lau faaeaea ma lau pule ua tototetele. A o ai foi le tagata faatauvaa ua e manatu ane ai, ua e faatiti, faaula, faasei ma faapale.

Ou te faapea atu i le agaga maulalo, faafetai tatalo, faamalo tapuai, ua malie le vaai ma malie le faalogo, faafetai le agalelei ma le moni o lou alofa. Ou te asu atu vaimalu i o outou finagalo, o le a se mea ua mafai po o se auaunaga ua le lava i lenei Paeaiga, fale ia i le fale o le Atua lo outou finagalo.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

O le faaunautauga lava o le loto, e momoo faalupe o naumati ia lava se taimi e faatino ai le tautua ma le auaunaga i le ta itumalo. Ou te faamalulu atu foi lou itumalo e, e leai se faiva e asa ma se maumau. O le a se pati ua sala ma se aga ua le tautamalii, e leai se tautai e atoa, e leai foi se tama taaalo na te iloa sona sese. Ou te faamoemoe atu aua o oe o le matua faitama e magalo ai le faaletonu o le auauna.

Le paia e o lou itumalo, e tafafao taliga o tufuga uli e ala i lau tofa faatupu ma faatamalii, lau faautautaga faafaleupolu e tausi ai mamalu o nuu ma itumalo, ou te le selu atu, malo faatupu, faafetai faafaleupolu. O laʻu tatalo, tatou faamoemoe ia i le tatou Atua pule aoao, o ia na te silafia finagalo ma loto na te faasino mai ma tofofi o tatou tiute ma faiva. Ona faapea lea o se manatu, o le a foi Faletagaloa ma Lalokava paopao o le tautai Safune ma Samauga, ia mama ia le lagi lo ta Falelua i ona tupu ma ona ee, alofagia foi le faamoemoe o Samoa ua toe o se aga, ia faataunuuina i le filemu o le Atua soifua, manuia le Fonousu a Samoa. Ia faamamalu e le Atua lau tapuaiga Samoa. Soifua.

**FOFOGA FETALAI:** Malo saunoa i le sui usufono mamalu o Gagai fomauga Nu.2, ou te manatu lava ua tele upu i manu i lenei itula afiafi. Ia tatou tau laia ma ave le faatuatuga i le Alii e pei ona outou saunoa, ave le tatou faalagolago i le Alii, o Ia na te tofofi ma filifili i tatou, e pei lava o upu mai lenei taeao atoa, malo le onosai, malo foi le tauatai malo foi le galue. Ou te lagona ua fai foi lou leo e fai ma fofoga taumolimoli aua le tapuaiga a le tatou itumalo i ona tulaga faalupe. Malo fetalai.

Ia tulai maia le sui usufono mamalu mo Vaimauga Sisifo, Tofa Lenatai Victor Faafoi Tamapua e faaauau ma tuu mai le saunoaga i le Maota i le tatou taeao na liugalua.

**Tofa LENATAI VICTOR FAAFOI TAMAPUA (Vaimauga Sisifo):** Faafetai i lau Afioga i le Fofoga Fetalai mo le avanoa. E avea foi lenei avanoa e faafetai ma faatalofa atu foi i lau Afioga i le Fofoga Fetalai, i le afio o lau Afioga i le Palemia ma le mamalu o le Kapeneta. Afio le Taitai o le Itu Agai faapea le Sui Taitai, ma sui usufono uma o le Palemene o Samoa.

E faatalofa atu foi i Ofisa Sili o Pulega ma Pule Sili o Matagaluega ma Faalapotopotoga, susu lau Susuga i le Failautusi, le Failautusi Lagolago faapea le paia o le Ofisa o le Fono.

E faatalofa faapitoa i le itumalo pele o Vaimauga Sisifo aemaise le faafofogaaga a Samoa i ona tulaga faalupe o le a le oo ai se leo. Malo lava le soifua maua ma le soifua laulelei i lenei itula o le aso.

Lau Afioga i le Fofoga Fetalai e fia Faaleo le lagolago a lou nei sui usufono i le Tala Faaopoopo o le Tupe, faamalo faafetai i lau Afioga i le Minisita o Tupe lau Afioga i le Palemia aemaise foi le alii Pule o le Matagaluega ona o lenei galuega. Ia aemaise foi le faasoa lima lelei ina ia mafai ona faatino galuega a le tatou Malo aua se lumanai manuia o Samoa.



26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafaiga i luga o le faitauga faalua**

Lau Afioga i le Fofoga Fetalai e avea foi lenei avanoa faaauuro e faapito augafa ai faʻo faamata;aga ma ou faafetaia ai le tapuaiga paia a si oʻu itumalo pele o Vaimauga Sisifo. I le paia o le fale Sagauga, le afifio o Alosina i lau Afioga Seumanutafa ma lau Afioga Toomalatai, afifio le Aiga Paia o Salevalasi lau Afioga Tamaseu ma lau Afioga Faualo. Susu la oulua matua Onofiatele ma Faaolesa, afifio Tupuola ma Faumuina ma Siligatusa, susu le matua o Leupolu ma Alo o Malietoa, afio Sooiolo ma le matua o Feetau, alaalatai Faletolu i lau Tofa Tuiletufuga, lau Tofa Letaa, faapea lau Tofa Pupualii. Alaalatai Vainalepa i lau Tofa Lima, lau Tofa Lealasila ma lau Tofa Atoa ma Fuaiupolu, alaalatai oe Tuisamau i lau Tofa Samau ma lau tofa Fagaimaalii. A liua le vai o Sina fatulua i le paia maualuga o Fuaiupolu i le afio o le Matua i lo oulua Sa seelua, Tofaeono afifio oulua tama Patu ma Asi o le afifio lava lea o le Aiga e tolu. Afifio Leusoalii, alaalatai Lenatai Tamapua ma Manogiamanu ma le mamalu i tupu ma eʻe o failauga ma punaoʻo, saʻo maualuluga o faletua ma tausi o aumaga ma ava a aumaga e oo lava i tupulaga talavou ma le mamalu o le aupalota. O paia ma faataotooto na o oe loʻu itumalo pele sa ou auauna ma ou tautua ai mo le 5 tausaga o le a mavae atu nei e ala i se tasi o ou Nofoa i le Palemene o Samoa. E uma upu ae le uma loʻu agaga faafetai tele ona o lau pule to ma lou faaeaea, sa e faatietie i loʻu tagata augavale i le maa salafa, sa e to pule sa e faatietie i loʻu tagata augavale i le maa salafa, sa e to pule sa e faaea e te lei talituaalimaina soʻu manao. O le tala o le tusi o ai ea le tagata ua e manatu mai ai ma le atalii o le tagata ua e asiasi mai ai.

Ou te momoli atu le faafetai tele mai le taele o loʻu fatu ma loʻu agaga ona o lau faaaloalo ua mamalu ma ua maualuga. Ua tau tupu ua tau tamalii, ua le mafai e le mafafau ona faavasega, ua le mafai foi e upu ona faamatala. Faafetai, faafetai, faafetai tele lava Vaimauga Sisifo.

Ou te molia foi malu i puega ma ou faamalulu atu o le a sau silafaga le tau ma sau faafofoga ua le faamallicina i saʻu auaunaga ma saʻu tautua ua le aʻuaʻua ma ua le atoatoa afai e i ai ni ou alofa ia foi Sina i Futu e pei o lea upu o le atunuu ona ua pau o le mea ua mafai ona oo i ai le malosi mai le Alii. Faafetai tele mo la outou fesoasoani, faafetai mo la outou tatalo, faafetai tele mo la outou lagolagosua malosi i le faatinoina o ou tiute i le 5 tausaga o le a mavae atu aua se manuia o le tatou itumalo. Ae tusa ai ma le suiga fou e pei ona faataoto mai i le Palemene i le vaevaeina o le tatou itumalo i le Faiga Palota o loma nei, o lea ua aʻe ai se manatu ou te toe fia tauva mo le Nofoa o oe loʻu itumalo pele o Vaimauga Sisifo Nu.1 e aofia ai loʻu nuu pele o Fuaiupolu. I le afifio o a oulua Afioga Tofaeono Vui Faatali ma lau Afioga Tofaeono Fonoti Iupati, le afifio o a outou afioga Patu Ativalu Tunupopo Patu, Patu Tiavaasue Falefatu Sapolu, Patu Sola Siaosi, le afifio o a outou Afioga Asi Tuiataga Semisi, Asi Sagagauatasi Tunupopo ma Asi Leuluaiialii Peleiupe. Alaalatai lau tofa Tamapua ma lau Tofa Manogiamanu faapea le mamalu tele o le nofo a ituaiga ia Fuata, o le afifio lava lea o le paia I Aiga e tolu.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

E faapena foi le paia ma le mamalu maualuga o si ou nuu pele o Maagiagi, i le affio o Leusoalii ia Luafau ma Tuiono ma Lupetaliaami tainane le mamalu ia Ataga ma Sa Ataga faapea le Launiu na Sae lua Ataga ma Salaitia ma lo la Moanafagatau. A o le susu o Susuga i Faafeagaiga ma le Aufagaluega paia a le Atua i le nofo a Ekalesia eseese i totonu o si o tatou itumalo. Ou te faatauanaau aua o le pule o lo o i ou aao ae na ona faaaoloolomaau, to maia lau pule e te toe faanofo ai au i lou Nofoa i le Palemene mo le isi 5 tausaga, aua o lena o le a mafai ai se taumafaiga e faaatoa ai ni mea sa le atoatoa i le 5 tausaga o le a mavae atu. Ou te avefa foi lenei avanoa maualuga ou te momoli atu ai le faamalo ma le faafetai tele i lau Susuga i le Toeaina Peteru Tone ma le Faletua, ua maua o le tausaga nei e ausia ai e lau Susuga le tulaga penisione e tusa ai ma faiga faave a le Ekalesia. Ua faamalo le onosai, faamalo foi le galue punouai mo Iesu ma lona Malo e faavavau. E faapena foi ona momoli atu le agaga o le faamaise ma le faamafanafanaga i lau Susuga Semikueva ma le Faletua ma le aiga alii ona o le ao pogisa ua ufitia ai le aiga ma le afioaga ona o le valaau paia a le Atua i le tama o le aiga. Ia faamafanafanaina e le Agaga Paia lo outou finagalo faavavau.

Lau Afioga i le Fofoga Fetalai faafetai mo le avanoa, faamanuia le Atua i taulumaga o totoe o le tatou Fonotaga, soifua.

**FOFOGA FETALAI:** Malo saunoa i le sui usufono mamalu, Lenatai ia ou te manatu e le o toe i ai a ni mea ua tuua o lea ua talatala ma le la lou manatu i le Itumalo. Ua oø i Tapaau ma Saø o le tatou Nuu ia ou te ofo au i se na te le lagona lau faaoioi i lenei afiafi. Malo e le tuulafoaiina oe leaga o oe le isi sui o le tatou fono tatalo, tatalo pea ina ia manuia le alofaiva ma le tatou faamoemoe.

Ia o lea ua tatou oo mai i se tasi o tamaitai Sa o le tatou Palemene nei e lua ai tamaitai o le motu tele i Salafai, Faimalotoa ia tulai maia le tootoo Finao o lea ua avanoa le Maota mo le saunoaga ia ma faasolosolo mai ai lava seia oo mai i le isi pito lea o le tatou Maota fono nei.

**Tofa FAIMALOTOA KIKA IEMAIMA STOWERS (Gagaifomauga Nu.1):** Lau Afioga i le Fofoga Fetalai ia ou te muai momoli atu le agaga faafetai tele ona o lenei foi avanoa ua ou maua e molimoli atu ai se leo o si ou itumalo pele o Gagaifomauga Nu.2 mo le taimi mulimuli o lenei Paeaiaga a le Palemene.

E talitonu lau Afioga i le Fofoga Fetalai, e leai lava se sui usufono o lenei Maota e le o fia lauga ma sausaunoa ma fetalai aua le faafogafoga mai o le tapuaiga a nai itumalo ma Samoa sa tuø mai le mulipapaga a o alofaiva a outou Afioga o sui usufono mamalu o le Palemene i le tau faaiui ai o le 5 tausaga o lenei Paeaiaga.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

Ou te faatulou ai i le paia o le Palemene o Samoa i lau Afioga i le Fofoga Fetalai, faatulou foi i le Taitai o le Malo lau Afioga i le Palemia Tuilaepa Sailele Malielegaoi ma sui usufono mamalu uma o le Kapeneta. E faatalofa foi i lau Afioga i le Taitai o le Itu Agai, Palusalua Fapo II, lau Afioga i le Sui Taitai ia ma sui usufono mamalu o lenei Palemene i le vaega nei o lo o tulai mai i le Faigamalo, o lo o taitaiina le atunuu ia faapea foi lena Vaega Faaupufai a le Tautua o lo o agaia le Faigamalo. Ou te faatalofa foi i le tapuaiga a faaauluuluga o Matagaluega ma Faalapotopotoga a le Malo, o a outou Afioga ia o lo o faapena ona amo i o outou tauau ma tapa atu i ai le Malo i so o se mea. Malo le galulue, faatalofa foi i lau Afioga i le Failautusi ma le aufaigaluega a le Ofisa o le Fono. E faamalo atu foi isi matou Vaega o le aufaasalalau ma le au tusitala i Leitio, TV ma Nusipepa o lo o outou molimoliina atu i maota ma laoa tualumaga o le Palemene o Samoa aua le faafogafoga mai o si o tatou atunuu i lea taimi ma lea taimi. E faapea foi ia i latou uma lava o lo o galulue ma lagolago aua le sologa lelei o galuega a le Maota, faamalo lava le tautua.

Ia ona ou faatalofa ma faatulou atu ai lea i le faafogafoga tapuai mai a Lana Afioga Mamalu, le Ao o le Malo, lana Afioga i le Tamaaiga Tui Atua Tupua Tamasese Efi ma le Masiofo. Lau Afioga i le Sui o le Fono a Sui Tofia lau Afioga i le Tamaaiga Tuimalealiifano Vaaletoa Sualauvi II ma lau Masiofo, ia o le paia lava lea aua Tama Aiga, o Aiga ma latou Tama, le mamalu ia Pule ma Tumua, Ituau ma Alataua, Aiga i le Tai ma le Vaa o Fonoti. Ia ae tainane foi le faafogafoga tapuai mai a Samoa i Sasae, ia Sua ma le Vaifanua, Fofu ma Aitulagi, Saole ma Saleaumua ma le Launiu na Saelua, le Laau na Amotasi ma Auvaa o le Tootoo ma upu o le Manuatele.

E faatalofa foi i le faafogafoga tapuai mai a feoi o le Talalelei o le ituvai paia i auaunaga a le Atua i Ekalesia e fia o lo o asu le ipuvai o le ola aua le mamalu o Samoa e le gata i la le tino aemaise lona soifua faaleagaga. Ia o paia ma mamalu faalupe ia o Samoa, o paia ua taotooto a o se ala ua oo e faigata oe Samoa o le aomamala.

Lau Afioga i le Fofoga Fetalai, ne i te i ua ou ta i i ma o, ae ou te manatu ou te faaoo muamua atu e faia se faamatalaga e afea ai si ou itumalo i lana faafogafoga tapuai mai, le itumalo pele ia Gagai fomauga Nu.1. Ou te faafetai loo itumalo i lau faatupu ma lau faatamalii sa ou tiu ai nei, faafetai i lau faaaloalo maualuga sa ou sapi ai nei i upufai a le Malo. E faapitoaugafa ma ou muai momoli atu le faafetai tele i le Aufaigaluega paia a le Atua o lo o faafalelemalu ma faafaletuluia i totonu o si o tatou itumalo faapena ona outou nonomanu i le po ma le ao aua se manuia o le itumalo aemaise Samoa mo a taeao. Faafetai tele i lau Susuga i le Toeaina, lau Susuga Tanielu ma le Faletua, faafetai i lau Afioga Patele Jerry, lau Susuga i le Faafeagaiga Tolutasi ma le Faletua, lau Susuga i le alii Sea ma le Faletua, lau Susuga i le Epikopo Patai ma le Faletua, aemaise foi lau Susuga Filipino ma le Faletua o le Ekalesia EFKS i Manase. Faafetai tele, malo i la outou tapuaiga faafetai mo a outou faamanuiaga sa maua ai pea le lototele ma le fafia e tautua ma auauna aua si o tatou itumalo.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

E le faagaloina foi le tapuaiga tatalo a taulaga soifua uma a si o tatou itumalo o avea ma Vaa ma Ipu o le Talalelei i so o se Ekalesia o lo o galulue ai e le gata i Samoa nei, ia ae faapea foi i atunuu i fafo.

Ou te momoli atu foi le faamalo ma le faafetai tele i le faafofoga tapuai mai, i le paia maualuga a si o tatou itumalo ia Safotu ma Manase. O paia lava ia aua le afifio o sao e fa ma aiga Sa Umalau le Atipouniu ma le Faasau ma le mamalu ia oe le Pule. Le alaatai a lau fetalaiga Lavea na e mua i malae e te tausi vaatele aua le tupua i Finao, le susu o Tito ma aiga sa Malau ma le fetalaiga ia Tauasa.

Ou te momoli atu foi le faafetai tele i faletua ma tausi, o saoa ma augafaapae le ituvai o tina ma tamaitai ma le malosi o si o tatou itumalo o lo o alaala ma papaaao i Upolu nei, ona o le mafuaaga eseese e pei o aoga a fanau aemaise o feau ma galuega i Apia nei. O lo o faapena ona maua ai seleni e tautua atu ai i aiga, i ekalesia faapea si o tatou itumalo. Ua faafetai i le paia o si o tatou itumalo i la outou faaaloalo i la outou faatupu. Faafetai le faaeaea. Sa outou faatietie lou nei tagata faatauvaa i le maa salafa, e ala i lau pule to ma lau faaaloalo maualuga, sa ou pale ai nei e fai ma ou sui usufono i le Palemene. E molimoli la outou tofa ma le faautaga i le Maota o Samoa. O lau pule lea sa ou talisapaia faatuaeleele. Le mamalu o si o tatou itumalo o le a le galo. Ae o le a teu fatu lau faaaloalo ma lau faaeaea na aumai. E le galo lava ia te au ia uluai upu e pei ona ou Faaleo i lau lauga muamua i totonu i le Palemene ia Ianuari o le 2015, tausaga ua tuanai atu nei. Na faapea mai ai faatumutumuga o le tatou nuu, òFaimalotoa, ia tautuana le tapuaiga a si o tatou itumalo ma le nuu, ia toa lou lotu maua sou manatu ma ia e alofa i le itumalo. O ou mama na.ö Le paia e o si o tatou itumalo i ona tulaga faalupe, faafetai tele mo faamanuiaga. Malo mo le tapuaiga aemaise o a outou talosaga molia. O lea sa outou silasila ao se tagatagai malamalama i se sao, se galuega se atinae, ao se fesoasoani sa mafai ona faatino mo oe le itumalo pele. I nai taimi faatauvaa sa totoe i lenei Paeaiga. Ia malu ave i fale finagalo malie ona ua pau o se mea ua mafai. E tautua atu ai la outou auauna. Tatou ave ia lea e fai ma ai ao se taulaga e viia ai lo tatou Matai. O le sa taiala o le sa fesoasoani ma faatasi mai, sa maua ai le lotu fiafia, le mafanafana ma le lotu tele e saili, tuitui ma tauanau ai se ai aua la outou tapuaiga. Ae o se talosaga a la outou sui usufono, talosia ia ave ave oo lo outou alofa ma lo outou faatupu ua faaalua nei i nai taimi faatauvaa sa totoe i lenei Paeaiga. Sa outou tusi aao ou te fai ai ma outou sui usufono i le Palemene, ao sauniuni atu si o tatou atunuu ma si o tatou itumalo pele mo le Faiga Palota tele o lo o lumanai nei.

Ona oo mai lea o se faamatalaga e molimoli atu le faafetai tele i le Malo mo galuega lelei uma ua maea faatino mo si o matou itumalo, aemaise o si tausaga e tasi ma nai masina sa ou tulai ai i le tofi.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoga i luga o le faitauga faalua**

Lau Afioga i le Fofoga Fetalai, ou te fia faaogaina lenei avanoa e toe faaleo ai, mai le taele o le agaga le faafetai tele a si ou itumalo, i lau Afioga i le Minisita o Aoga, Magele Mauiliu Magele, le Pule Sili ma le Pulega o le Matagaluega. E le o toe tele se galuega ona maea lea o le malaetaalo mo tupulaga o si o matou itumalo.

O se atinae ua leva ona moe miti ma tatalo ma faatalitali, ao lea ua tino mai i lou taimi. Ma o le a manatua pea e lenei itumalo lou agalelei. E avea foi lenei avanoa ou te faaleo ai ma molimoli atu ai le agaga faafetai tele i lau Afioga i le taitai o le ekalesia Katoliko i Samoa nei, lau Afioga Alapati Lui Mataeliga. I lou alofa ma lou agalelei i le talosaga sa tuuina atu ma mafua ona tino mai le galueaina o le malaetaalo e ala i le foai. Sa e foaiina mai ai eleele o le ekalesia i Safotu aua alo ma fanau ma tupulaga uma o le itumalo. E te le o faapito e na o le ekalesia Katoliko. Faafetai, faafetai tele lava, aua le itiiti lenei foai. Ia saga faamanuia le Atua, ia faafualoa lou soifua aua le taitaiina o le lafu mamoe ma galuega uma o lou valaauina mo le Atua ma lona finagalo.

Faafetai i le Malo mo le galuega foi ua maea o le toe faalauteleina ma le fausiaina, o le taligalu o le tolotolo i le va o Manase ma Safotu ua manaia ma matagofie lea galuega. Ua fai foi ma Vaega e malolo ma faasavili ai aemaise o turisi o lo o toatele i Manase, aua foi le vevela o le tau i le tele o taimi. Lau Afioga i le Fofoga Fetalai, ou te fia momoli foi le agaga faafetai tele, o la e faafofoga mai si ou matou itumalo.

I lau Afioga i le Minisita mo Galuega, Felauaiga ma Atinae Eeseese o si o tatou Malo. Lau Afioga Manualesagalala Enokati Posala, e tele ma anoanoai talosaga mo galuega eseese mai lea itumalo ma lea itumalo a si o tatou atunuu. Peitai e te le i faagaloina lou savalivali atu tuitui ma tauanau auala galue i le pitonuu i luga o Safotu e fesootea ma Paia. O lea ua logoina mai e pei ona e saunoa mai i taimi ua tuanai atu. Masalo po o le vaiaso fou o le a amatalia ai ai ia galuega, mo si o matou nuu tele o Safotu. Lau Afioga ua faafetai tele le tali manao, faafetai le agalelei ua sao faalelei. Molimoli foi le agaga faafetai tele lau Afioga i le Minisita o Siosiomaga faapea le Pulega a le Matagaluega faapena foi le Minisita ma le Ofisa o Turisi, ua vaaia ua maea faasalalau tusi ofo mo se konekarate o le a fesoasoani mo beach fale i Manase. Ua tele ina tafia ia faleoo a i latou o lo o faapena ona galulue i le atinae mo tagata tafafao maimoa mai fafo. E talitonu e le o toe mamao se taimi ae amatalia foi lea galuega.

Avea foi lenei avanoa, e tasi lava si mea fou i le tele o isi mea ia sa ou faalau i lau lauga mua, sa tatalo i ai lenei Matagaluega e faafetai ai i le Kamupani malosia a le Blu Sky. O lea ua ou matauina e le o toe mamao ae maea ona oo atu lea i Safotu i le agai atu i si o matou Falegagaifomauga i le aoga o lo o aoga ai alo ma fanau a le itumalo Falegagaifomauga Nu.1, Nu.2 faapea le Nu.3.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

O le cable e pei ona talosagaina e lelei ma vave ai fesootaiga aoga mo sailiiliga a le fanau i internet, fanau aoga, skype mai ai lea fomai i taimi e manaomia ai le fesoasoani faatopetope mo le soifua maloloina. Ao ou i ai la i le tulaga lea, e tasi lava si mea lea ou te tatalo atu ai ma le agaga faaaloalo ma le loto mauualalo, i lau Afioga i le Minisita o le Soifua Maloloina, se fomai mo le falemai i Safotu. E tolu itumalo o Gagaifomauga 1, Gagaifomauga 2, Gagaifomauga 3, le itumalo o le Fofoga Fetalai o le Maota, o lo o faapena foi ona fesoasoani i le toatele o isi nuu o lo o taulalata atu. Peitai ane lau Afioga, ou te tatalo atu ma le faamaualalo atu atonu o lo o faafofoga le Faatonu Sili ma le Pulega e tasi le aso, ua na o le Aso Lua e oo atu ai le fomai i si o matou itumalo. Talu ai nei i le Kirisimasi, e tea le ono ae oso le mai o se tasi o toeaina matua o si o matou itumalo. Ae ua tea le taimi ua foi le fomai. Na iua sue mai se avanoa i le taimi o le pisi o vaa ma toe aumai ai i Apia. Ua faafetai i le Alii sa faapena ona faamanuiaina taumafaiga ma ua toe foi i le soifua maloloina o sia foi tama o si o matou itumalo. Ou te faafetai tele.

**Afioga Hon Palusalua Faapo II:** Lau Afioga i le Fofoga Fetalai.....

**FOFOGA FETALAI:** Malie lava lau Afioga i le Minisita Lagolagoí ..

**Afioga Palusalua Faapo II:** Faamalie atu i le sui usufono mamalu, e taua tele le mea lea ua oo i ai lana saunoaga o le mai o si toeaina, lea e aumai i le vaa o le taeao. Aua o le faamoemoe o le Tautua Samoa, a tulai mai e fai se helicopter e aumai ai le mai lea, e pei ona e saunoa. O le uiga lea o lou tulai atu, e faamalosia au i le sui usufono mamalu ona o mea faapea e tupu isi ona itumalo.

**FOFOGA FETALAI:** O le a foi le upu lea e sau i le TV. Alu lava oe son.

**Tofa FAIMALOTOA KIKA IEMAIMA STOWERS:** Faafetai mo le faauilavea a le Taitai o le Itu Agai. Ae o lau lava tatalo, ae e le manaomia i Savaii ni helicopter. O lo o lelei auala ma lelei vaa. Ae pau na o si mea laititi o lau lava lea tatalo i le tama o le Matagaluega o le Soifua Maloloina, ae faafetai mo le faauilavea. Ae o le a faaauau e le toe umi sau fagogo.

E momoli atu lau faafetai tele i le Palemia ma le mamalu o le Kapeneta i le tele o galuega faatino. Ua aulelei ma matagofie ai Samoa. Ua tatou mitamita uma ai, lea sa ou taua foi i lau lauga muamua i le tausaga na tea nei. E tele tagata ua talanoa ma faafetai ua fou le latou vaai. Ua mitamita o latou loto ua tele le suiga o si o tatou atunuu. Lau Afioga i le Palemia ma le mamalu o le Kapeneta e ui foi ina tele nai faasea ua maualuga a tatou aitalafu, ae e le o nofoai ai. Malo le lototele, malo le galulue. Faafetai mo le tautuaina o si o tatou atunuu pele o Samoa tatou te mitamita ai. Ou te manatu ua lava sia agiagi.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ae mo le tatou Maota i lena itu ma lenei itu, manuia le faiga palota. Na ou lagoaina lava i lenei taeao ua ese lava lau tilotilo ma lau faalogona ua le pei o le tele o aso tatou te o mai ai ma tatou talitalie, ae pei ua pau lava ua le talie, ua tau le talanoa. Lototetele faamoemoe i le Alii. Aua e te popole o le lava sa galue, ailoga e popole. E tautala galuega. Ma ou te tatalo atu, aua tatou te popole aua tatou te mamai ai. Afai foi tatou te le o mai, ia o lo o i ai se isi galuega a le Atua e valaauina ai oe ma au. Mo e o le a le toe o mai, ae ou te talitonu e toatele lava isi e lefi .. e toe foi mai. Tatou lafo i le Alii o tatou faamoemoega. Ou te talitonu ua matua le iloa e le tatou Alii le tele o a tatou talosaga i lenei vaitau. Ao le Atua lava ia o le Atua alofa, e faapena ona ia faasoasoa mai mea o le tatou olaga nei. Ae o la ta fautuaga faasui faipule, tatou fai mea talitalie, tatou loto fiafia sapaia mea lelei ma mea faalelelei. Ua lava lea lauga. O le a seu i fanua le sa o lenei itumalo. Lagi mama ma faafualoa e le Atua le soifua o le tapuaiga a lana Afioga Mamalu, O le Ao o le Malo o Samoa le Afioga i le Tama Aiga Tui Atua Tupua Tamasese Efi ma le masiofo, mamao le lagi aua lau Afioga i le Fofoga Fetalai. Soifua manuia le Palemia ma le mamalu o le Kapeneta faapea foi le Taitai o le Itu Agai faapea foi sui usufono mamalu o lenei Palemene. Manuteleina le tapuaiga a si ou itumalo pele o Gagaifomauga NU.1, aemaise le faafofoga a Samoa ma lana tapuaiga. Soifua.

**FOFOGA FETALAI:** Faamalo saunoa i lau Afioga i le Tamaitai Sui Minisita, o le sui usufono mamalu foi o le tatou Itumalo Gagaifomauga Nu.1, o oe foi o le Matua o le tatou fale Gagaifomauga. E te afio i Finao seia paia Masinaafiafi ma Vaalepu, o mamalu na o le tatou va nonofo ai. Ne i faagalo foi Afia i si ona vao, i le tatou mafutaga na faailagi le tuligasia aua le tuua o le Malo e le Tofa ia Tuiloa Anitelea, o lea na e seei mai ai e faaauau le galuega.

E le mafai ona galo le galuega foi sa malele ai ma aumai ai le tofa ma le faautaga a lea foi sui usufono matua o le tatou Maota, ui i lea, ua faailagi le folauga ona o le finagalo o le tatou Atua. Faamalo Faimalo, e ofo atu foi moomooga alofa ma faamanuiaga aua le faiga filifiliga a le tatou atunuu.

Ia, le Alataua Sisifo, Lafaitetele, o le a faasolosolo mai lava, masalo e oo mai lava i lea pito o le tatou Maota i le Afioga ia Leaupepe ma le Tofa Tuuu e tomuli ai le tatou faatofalaiga i lenei itula afiafi. Tulai mai le sui usufono mamalu mo Alataua Sisifo.

**Afioga LAFATELE PATRICK LEIATAUALES (Alataua Sisifo):** Lau Afioga i le Fofoga Fetalai, ou te tulai atu ma le agaga faaaloalo i lenei foi vaega o le afiafi i le paia o le Maota o le faufaugatia a Samoa, i le afio o lau Afioga i le Palemia faapea lau Kapeneta, lau Afioga i le Taitai o le Itu Agai, faapea foi le maualuga o lupe na faia mai lea itumalo ma lea itumalo.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

Ou te faatalofa atu foi i lau Susuga i le Failautusi o le Fono ma lau aufaigaluega, e faapea foi le mamalu maualuga o Matagaluega eseese a le Malo ma Faalapotopotoga Tumaoti. Ona faapea lea o se matou tala, e le tele se matou tala i lenei Vaega o le afiafi. O se taimi matou oo atu i le tapuaiga a lo ta itumalo, a o le tulaga o le aso ma le folasia foi o le Tala o le Tupe, e le o po malae, o le ma Tala o le Tupe ma si ou tama. I le matou foi tilotilo ma le tulaga e pei ona i ai le faasoa e tusa ai ma le Tala o le Tupe lenei, matou te lagolagoina. Na pau le agaga i lenei foi Vaega o le afiafi, e fia fai se matou faamatalaga laititi e faafetaia ai le Afioga i le Palemia ma lau Kapeneta i le faafoeina foi o lenei 5 tausaga e le o se mea faigofie. A silasila foi i le tulaga e pei ona folau mai ai lo tatou sa, e le o se galuega faigofie, o se galuega e fita. Na matou ulufale mai i le Maota lenei i le 2006, na toe filifilia foi au i le 2011, ia, ua tau masani foi i tulaga pei ona i ai felafolafoaiga a le Maota lenei. O le tele o taimi e tuusao foi a matou tala, ma e le tae otaota le lauga a le itumalo lenei. O le a lava se atinae talafeagai ma fetau ma le itumalo lenei, o le agaga lena o Lafai. A toe tepa i tua i le 2006 pe a faapea e sao lau maitau, e tele galuega a le Malo i le faafouina lea o fale leoleo i Asau.

Faafetai foi i lau Afioga i le Minisita mo Leoleo ma le faatuina o le Matagaluega a le Fuimu i lea foi itu o le tatou atunuu. Faafetai foi i le tulaga o le falemai o le tatou faa-Vaisigano, o lea ou te talanoa lautele i le fauina o lenei galuega tele aua le autovaa atu o le tatou itumalo. Ia, e tele ma anoanoai galuega.

Faafetai foi i lau Afioga i le Minisita mo le tele o auala ma tulaga faapena. O lea foi ua maua le pa-uta e pei ona saunoa lau Afioga i le Minisita mo Aoga, e momoli atu le agaga faafetai. O lea ua maua mai foi le tala fiafia ua maua se fesoasoani mai fafo e tauala mai le Malo o Iapani e fauina ai le tatou faleaoga i Falelima. Mo le faalogologo mai a si ou itumalo, Falelima, o le matou tala lena, o se taimi e le o toe mamao ona faamautuina lea o nisi o le tele o maliliega a Malo e lua ma faataunuina ai le tatou galuega lea.

O le tulaga foi i le tatou Kolisi i Neiafu, o lo o taliga foi le tele o talosaga na ave i fafo, aua se seleni mo le fauina o le tatou Kolisi lea. O galuega ia ma molimau ola ia tatou te iloa ai le alualu i luma o atinae a le tatou Malo.

E faamuli sa matou tala i lau Afioga i le Palemia e faapea foi le Kapeneta, ia, pei lava ona ou fai atu, o Lafai e faapena e i ai foi taimi e siisii ai sa matou tala, ona o le faanaunauga o le loto ia manuia lea tafa o le atunuu. E pei lava ona i ai saunoaga masani a le tatou Vaega Faaupufai, o le mea e lelei mo le talafatai i Apia nei, o le mea lelei foi lena mo i matou i Salafai. E momoli atu ai le agaga faafetai i lau Afioga i le Palemia faapea foi lou auvaa.

E faapea foi i lau fetalaiga Leulumoega i le faamautuina o nisi o tatou atinae mo tina ma Tamaitai i le itumalo lenei, ia, e atulasi galuega ma tulaga pei ona taumafai i ai. O le matou agaga faafetai lena. E pei lava ona ou fai atu, o le a foi se taimi ua sola i tulaga e pei ona inaina atu ai, o le faanaunauga o le loto, ia manuia itumalo ma o tatou tagata o lo o alaala ma papaa o le la foi itu o Salafai.



26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoga i luga o le faitauga faalua**

O lenei galuega tele o le vai, e le tau faailoa sa matou tala, e le mafai ona galo i loto ma afioaga o le itumalo lenei, o le tele o nai taimi ua tuana'i atu sa feagai ma mugala a o lo o sua lelei le vai, manino lelei, magalo lelei. O molimau ola ia o sa matou faamatalaga vaeatu le maualuga o le Maota lenei e tusa ai foi ma galuega.

Faafetai foi i le la Itu o le Malu i le Taitai o le Itu Agai mo le taulgalaga i mea lelei ina ia fusi le fau o le Malo e tasi ai le tatou Faigamalo ina ia manuia Samoa. Ia, o le matou tala lena.

Ona oo mai lea o sa matou tala i le tapuaiga a le tatou atunuu, i le paia aua Aiga ma latou Tama, e le taufaafulua le usoga a Tumua ma Pule, o outou o Tootoouli o le tatou atunuu, malo le tapuai. Lana Afioga Mamalu O Le Ao o le Malo faapea foi le Sui o le Fono a Sui Tofia, lau Afioga i le Faamasino Sili ma le tapuaiga a le tatou Malo i ona tulaga faalupe, malo le faitatalo.

Le paia o le Aufaigaluega totofi a le Atua o lo o faalepa ma faanonomanu i fatafaitaulaga e fia aua se manuia o le tatou atunuu, malo le tapuai, faafetai i la outou tapuaiga, o lea ua lata le taulaumea, ua tatou taunuu i siui o lenei Paeaiga, matou te momoli atu le agaga faafetai i le tapuaiga a le tatou atunuu.

E faapitoaugafa se matou tala i lou itumalo pele o Alataua Sisifo e amata mai Falelima, le paia oaua Aiga ma le Nofo a Faalupea, lau Fetalaiga i le Fofoga o le Papa faapea lena itu o le ta Alataua, faafetai le faitatalo, malo le tapuai, o lea ua tatou tini taunuu i le Paeaiga lenei ma lona siui. E matou te talitonu ana le tapuaiga o matou faiva, e le ae ma manuia la matou galuega.

Oo mai lea o sa matou tala i lou nuu pele o Neiafu, lau Susuga i le Matua Tauiliili faapea le Aiga na Muaimalae, Aiga Samoeleoi, le Nofo a Pule, le la itu o le vai i lau Fetalaiga Tapaulefano, Tama Igoa Taatitimanaia ma Tuafaiva faapea Faleauga ma lena itu o le tatou nuu, malo le tapuai. Lau Afioga i Levalasi ma Tilomai, se ua le ole lea, aumaga a Toleafoa ma le malosi o le tatou nuu, a lea ua tatou taunuu i le faaiuga o lenei Paeaiga. Matou te talitonu i la outou tapuaiga, sa pofala ma feula le mulila lea ua manuia ai faiva o lenei usugafono. Matou te faafetai atu i la outou faaaloalo, lea sa outou faaaloalo i le 2006, o la outou pule lea, sa outou faaaloalo i le 2011, se ua maeu, a o lea foi ua outou toe faaaloalo mai i le 2016, faafetai le faaaloalo. A manatu i le soifua tautua o le tatou nuu i tupu ma ee, le aumatutua i Tootoouli ma le Aufuesinasina, a o ai Lafaitale ua outou toe manatu mai ai? O le matou tala i le afiafi lenei, e le auuaoa le lagi, ma e tautala galuega a tagata. O a faaletonu, o a foi tulaga na ou tatalo atu ai e tatala le palota, o lo outou finagalo lava, a o le tatalo a Lafai, tatala le tatou palota. Ou te musu e fai ni pa pupuni. E mafua i se a? Leaga o i e faatino ai aiaiga o Malo Temokarasi ma le amiotonu, a o lo outou alolofa lava ia te au. Ia o le matou tala lea i lenei afiafi.

Ou te fafetai atu foi isi ou tama pele lau Afioga Leota Leiatuaalesa Paumoli II ma lau Afioga i le Sao Puletiu Atoa, ia, malo le tapuai, o lea ua sao ma uli lo tatou faamoemoe. Le paia i le Aufaigaluega Totofi a le Atua o lo o galulue i le ta itumalo, malo le faitatalo, o lea ua iu ma le manuia lenei foi Paeaiga, e leai lava se mea o gase.

26 IANUARI 2016

**Tulafono Tau Faaofi o le Faatatauina o Tupe Faaopoopo (Nu.1)  
2015/2016 - felafolafoaiga i luga o le faitauga faalua**

E pei lava ona ou fai atu i le taimi ua sola, e le toe faasuka se ti a se aiga i se faamatalaga a se isi, o galuega ma molimau ola e pei ona ou taumafai atu, o atinae na fau e le Malo lenei, a lea ua tatou saafi ai ma tiu ai i matalaoa ona o tulaga e pei ona i ai foi lenei vaitau.

Lo ta itumalo, ua e masani, e le tauanauina e Lafai, e lafo a le tofi. Ou te manao tatou te faimeia fiafia ma tatou faanonomanu aua foi le filifiliga o taitai o Samoa. O le matou tala i le afiafi lenei i le tapuaiga a le ta itumalo, o lena ua ou fai atu, faafetai i la outou faaaloalo ma saga faaaloalo pea i o matou tagata vaivai ma faatauva. O la le Tusi, ðO le fua e te lulu, o le mea foi lena e te selesele.ö

A o la matou tala i lenei afiafi lenei e pei ona ou fai atu i lou nuu pele o Neiafu, tatou faanonomanu aua le faiga filifiliga a le Atua, aua tatou te vevesi fua, ae tofi mai lava i le lagi taitai o le atunuu lenei.

Falelima, o lena ua ou fai atu, a o le tulaga e pei ona i ai le faamoemoe pei ona ma talanoa ai ma le Minisita o Aoga, ia, o lea ua to manu, faamalo foi le onosai, o le tele o taimi e agai atu ai asiasiga a le Komiti foi, e maitauina lava le faaletonu o le tatou faleaoga, o lea ua to manu, o lea ua maua le fesoasoani, tatou faafetai lea i le Malo, e pei ona ou tau faamaninoa Vaega ia, ona o tulaga pei ona i ai le tele o atinae, e ao ai ona avea lou leo e fai ma fofoga taumomoli o le ta itumalo Alataua Sisifo, e faafetai ai le galuega fita a le Afioga i le Palemia faapea le Kapeneta ma le tatou Malo, aua foi le fesoasoani ina ia manuia o tatou nuu ma afioaga o lo o taumamao ma le talafatai o Apia.

Le Alataua, ou te le tau fai atu, o saafiafiga o ou laufanua, e te masani i tulaga pei ona i ai le faiga filifiliga a le tatou atunuu, tatou lafo i le Atua, tatou tuu i le Atua, o ai lava e tofi mai e fai ma sui o le ta itumalo, ia o le filifiliga lena a le Atua. Ae le mafai ona tuua le agaga fafetai ona o le faaaloalo, ia o lea foi ua outou faaaloalo mai. E pei ona ou fai atu i le taimi ua sola ma fatia ua alu, e toatele le au atamamai o le tatou nuu, e toatele Tootoosinasina ma le aufaitau lauulu o le ta itumalo, a ua e toe faaaloalo mai, faafetai le faaaloalo. Ona faalepa lea o lo outou sa, o le a seu i fanua le tatou faamatalaga i le afiafi lenei.

Lau Afioga i le Fofoga Fetalai faapea le maualuga o le Maota o Samoa, e leai lava se faiva e asa ma se maumau. Matou te faamalulu atu foi, o le a foi se pati ua sala a o se aga e le tautamalii, o lena e i ina le tofa faatupu i lau Afioga i le Fofoga Fetalai faapea le maualuga o le tapuaiga a Samoa, ia alo maia, tatou te fai mea fiafia, lea na saunoa nei le tootoo o Finao, se aua le faamamafa ia mea i o tatou loto aua e mamai ai tatou. Tatou fai mea fiafia ma alo fiafia e fai le tatou palota, o ai lava e tofi aua le faatautaia o le sa folau o Samoa, se o latou lena e tofofi mai le lagi. Ae aua nei galo, e o faatasi a le tatalo i le Atua ma galuega a le tagata. Manuia le fonu.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

**FOFOGA FETALAI:** Malo, Malo, faafetai Lealataua, ia e manatu o lea ua logo faa-Tutuila le tuleiga ma le saunoaga, ma e pei a o le tulimanu lea sa fai ma faafitifiti tuleiga ma saunoaga aua ua fai i lagi a Tuloa. Ia faafetai lea ua oulua mafuta ma Faimalotoa ua taotao ai le pito lena. Malo, o lea ua faalologo lo tatou Maota aemaise foi le tapuai mai o le tatou itumalo, malo fetalai, malo le saunoa. Tatou ave lea i uta, lava ulu ma tala e tau ma tatou lafo le faamoemoe i le Atua, fai le filiga aua Samoa ma lona finagalo. Ia o lo o totoe lava lo tatou taimi, o le a se lua finagalo, ia faafetai, faafetai le faaaloalo. Ia tulai mai se tasi o sui matua o le tatou Palemene, le Afioga ia Leaupepe Toleafoa Apulu Faafisi, ia o se tasi foi o toe ulutaia o le tatou Palemene, ua o i le taimi o lau saunoaga. Tulai mai le sui mamalu.

**Afioga Hon LEAUPEPE TOLEAFOA APULU FAAFISI (Aana Alofi Nu.1):** Faamalo faafetai mo le avanoa ua tuuina mai e lau Afioga i le Fofoga Fetalai, ia ma e muamua ona faafofoga tapua'i mai a Lana Afioga Mamalu, O le Ao o le Malo ma le masiofo faapea foi le Sui o le Fono a Sui Tofia ma le Masiofo, ia le Afioga i le Faamasino Sili ma Alii ma Tamaitai o le Faamasinoga, ia faapea foi le paia o nuu. Ou te faatalofa atu foi i le paia o lenei Palemene aemaise o lau Afioga i le Fofoga Fetalai, lau Afioga i le Palemia ma lou auvaa ae a le Kapeneta, ia faapea foi le Taitai o le Itu Agai ma lea foi Vaega o lo o agaia ia upufai o Malo. Tatou te momoli faatasi le agaga faamalo ma le viiga i le Atua, ona ua mafai ona taitai ma le filemu mai lo outou soifua ma lo tatou ola ia ua tatou maua mai ai ia siui o tatou galuega o lenei aso. E momoli le agaga faafetai ma le agaga faamalo i le Malo i galuega lelei sa faatino, e le na ona naunau e talosaga, ia ae tataua ona momoli le agaga faafetai ma le agaga faamalo i le tele ma le anoanoai o galuega sa faapena ona faaleleia i lea itumalo ma lea itumalo, e faapena foi i lo'u itumalo, eletise, auala galue, o le suavai ma mea faapena, faleaoga le latou foi fesoasoani, ia sa faapena ona faaleleia ai itu eseese o le itumalo a'o faafogafoga tapua'i mai. E momoli ai le faafetai i lau Afioga, ia malo le faasoa malo le lufilufi lima lelei, e le faigofie le faasoaina o le utiuti o le tatou tamaoaga ia ae ia faapena ona tofutofusia lea itumalo ia ma lea itumalo le atunuu ia ma lea itumalo le atunuu ae a se manuia o tagata lautele, e momoli atu ai le faafetai ma le faamalo.

Ou te fia o'o mai i se Vaega o le Tala o le Tupe, le Tala Faaopopo o le Tupe, na o ni nai manatu e lagolago a'i le Vaega lea o le fautuaga a le Tala o le Tupe ma e matou te talia ma e faamauina ma le agaga faaaloalo le talia e lenei usugafono le Tala Faaopopo Muamua o le Tupe, ae na o se fautuaga e pei ona fautuaina ai e le Komiti o le Tupe. Malo faafetai i lau Afioga i le Taitaifono ma le Komiti ona o fautuaga o lea e pei ona tuuina mai ina ia silasila le Matagaluega o Tupe maua. Silasila le Matagaluega o Tupe i oloa foi nei auina mai o oloa fau meafale, po o oloa faufale, o lo o faapena ona okaina mai e konekarate foi nei i polokalame fesoasoani a le malo, ina ia mafai ona malu puipuia mai le latou toe faatauina atu i nisi e ese mai le faaoga tatau ai ia Vaega oloa.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

E mafua ona ou talanoa ona o le lagolago i lea fautuaga lelei ia nei o tatou misi i le vaai lea tulaga leaga e anoanoa'i tupe a malo lea e alu ai, leaga o lea oloa e faaulufale mai i se tulaga e aunoa ma se tiute e pei o le tulaga lena. Ia ae o lo o faapena ona manaia ia le Lipoti a le Komiti ia e faapena ona fautuaina ai ina ia faapena ona mataalia pea i taimi uma. E momoli le faafetai, e le o se tupe lapoa lenei tupe ua tuuina mai ia ae ona o le faaaauuina ia o tatou galuega masani aua le faaiuina o lenei Paeaiga. Ia masalo na o le pau lea o se manatu e uiga i le Tala o le Tupe , ae ou te fia o'o mai i lo'u itumalo, ia ona o le maitauina, o lea ua taoto i paga tifa o le tautiaga, ia ua talio solo foi le tamaloa Faleata, e ala i lauga a sui usufono mamalu ia e tusa ai o le tatou toe Fono lenei o lenei Paeaiga. Ia e lagona le agaga faafetai ma le agaga faamalo. Faafetai atu i le tatou Palemene i le tatou galulue faatasi, e tatou te fili mea faatasi ae a se manuia o Samoa, ina ia aua nei faapito manu ia tasi, ia ae lelei ona tafe i tino i vai ia le manuia i o tatou lava tagata.

O lo'u itumalo o faafogafoga mai e le mafai ona laaloa se lagona I le tapuaiga a Satuala ia Aiono ma Leaupepe o Su'a ma Toleafoa ma le Tauso, o le mamalu i le Tuua ma le Falefitu po o le Falematusa ia Tauauvea faapea le loaloa o Fasitoota, ae ona o le toe Fono lenei o le Paeaiga lea sa filifilia mai ai e le gata ia te au nei ae faapea foi lo'u uso a faipule le Afioga i le Minisita, le Afioga i alo o le Tamalelagi le Afioga ia Tuitama sa filifilia mai e le falelua lea o Faleasiu ma Fasitoo. E ao a la ona o'o sa matou faamatalaga, e faafetaia ia afioaga e lua ma le itumalo o Aana Alofi Numera Tasi, Faleasiu le Paia o Aiga e Tolu, ia o Aiga o Mavaega Satuala ma le Taulagi ia faapea foi Alo o Tamaalelagi Tamaaitu ma le Magalafu ia faapea ia oe le Faletolu ma le loaloa ia Faleasiu se'i vaeatu le tapuaiga le tapuaiga i le Aufaigaluega Totofi a le Atua ma le Susuga i le Toeaina Faatonu. Malo faafetai, i lo outou faaeaea Faleasiu ma Fasitoo na outou tusi aao ai i ai maua ma le Afioga i le Minisita e fai ma sui o le tatou falelua po o le Itumalo o Aana Nu.1, ia ua aa le see i ai e tauave Nofoa e lua o le tatou itumalo, peita'i, o lea ua suia ia tulaga ua i ai foi lenei vaitau ma ia faapena ona vaeluaina ma tuu itiitia ai. O se faiga e sui mai i se mea e aupito sili ona lelei, ia o lea la ua i ai le vaeluaina ai le itumalo o Aana Alofi Nu.1, ia ma ua suia ai, ua tofi Faleasiu, ma ua faapena foi ona filifili le tofi o Fasitoota.

O le mea la lea, ae le'i se'e sa matoufaamatalaga e faafeiloai ma faafetaia foi ia le faafogafoga tapuai mai o Satuala ia Aiono ma Leaupepe Sua ma Toleafoa ma le tausole la itu o le vai aua le Falefitu ma le fetalaiga i le aoa matua, ae ao a ona momoli atu le faafetai ma le faamalo ia Faleasiu, e le toesea se iota ia mataitusi o lo otuou paia, ma lo outou mamalu, ua outou faaea ma lafo mai i ai maua ia, e sola lagona ma manatu foi. E molimoli atu le agaga faamalo ma le agaga faafetai, e le tasi e le lua e le tolu a ua lasi lau faaaloalo ma lau faaeaea ia ua faapena ona outou tusi aao ai matou te avea o matou tagata faatauvaa matou te tauaveina ia nofoa o le tatou itumalo.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Ia o le matou tatalo, ia alofagia e le Atua ia faapena ona maua pea le tofa, aua neʻi gauolosaa aua neʻi to le timu aua neʻi tafea le tauofe ma gasolosolo ao, ia aua le paia o aiga ia aemaise se usugafono aua le igoa o le Faletolu ma Fuaifale ia aemaise o ni alagaseu o le paia o le aufaigaluega tofofi a le Atua, i lea fata faitaulaga ma lea fata faitaulaga. Ia manuteleina Faleasiu, o lea a tatou te militino, o a faalavelave ma mea tutupu o le tatou osiosiga nuu, ia o lea lava tatou te mafuta, ae na o se upu e iloga aʻi se matou faamatalaga se manatu faafetai se upu faafetai o lo o outou faaeaea ae leʻi seʻe atu se faamatalaga i le alofaiva mo le faiga palota tele a le atunuu o loma nei e ala lea.

I faiga filifiliga aoao o lena masina o lo o lumanai. Ia Fasitoo, ia o oe a o le nuu sailimalo, sa e saili i mamalu faaleaganuu, sa e toe saili foi i mamalu faale-Atua. E le o se mea e tau avane ai, o le pi matamata tetele lena mea, e le tau laeia foi i se upu pe tau sula foi i sa matou faamatalaga, ia ae manatu o le pule faitalia a le sui mamalu e fai ai lana filifiliga. O le matou faamanatu, tatou filifili ma le Atua, o le Palota e le se mea a Samoa, e le masani ai le atunuu ma e leai se faiga faa-Samoa e faia i se palota. E masani ai i le gagana faapea o tu ma aga mai fafo i le mea e igoa o le palota, ae o le faiga filifiliga a le atunuu, sama se mago, sama se mago tautai se poto fili i tai se vaa. Sa fua i ai faiga filifiliga ma faiga faaiuga e le gata e afua mai i totonu o aiga ae faapena foi i nuu, ma Ekalesia, lea ua sau aʻi sau aʻi, o lea ua o tatou suia i tulaga faa-Temokarasi, ua tatou o i faiga palota, ia ae o le tulaga lena sa masani aʻi ia Samoa, sa fua i le tautua, o le ala i le pule o le tautua. Ae fai mai le finagalo, o fesili ma faaaloalo muli mai ia mua mai, ia ua na o se manatu, ae o ia faiga uma faaleaganuu, o lea ua tatou suia i le faiga faa-onaponei, tatou te filifili faatasi ma le Atua. Ia, loʻu nuu e Fasitooouta, ia lea faatoa o tatou filifili lea i so tatou lava sui faipule, e le pei o le mea sa i ai muamua, sa tatou filifili falelua, i le lua o a tatou tofi faipule, peitai i le taimi lenei, ia lea ua tafe i tino i vai le faiga filifiliga. Ia alo laia i lau filifiliga, faamoemoe i le Atua, o ai lava e tulai mai i le tatou faigapalota e ala i le tatou filifiliga, faamoemoe i le Atua, o ai lava e tulai mai i le tatou faigapalota e ala i le tatou filifiliga ma le faiga palota aoao o le atunuu, o le tatou tofi lena mai le Atua, ina ia mafai ona tauaveina, tauaveina le Nofoa o le tatou nuu, ia po o le tatou itumalo. Ou te faamalulu atu ma ou faamalie atu po o le a se tautua le aʻuaʻu sa faapena ona mafai ona faatino le manatu o le tofa i le Atua o le a uimagalo ai le auauna.

O le a foi se faifua sa faapena ona mafai ona fesoasoani ai le auauna ia ui magalo i lou alofa ma lou agalelei. Ae o le manatu faamagalo mai le sui usufono, o le a se amio o le a foi se upu ua soli tuaoi ma paʻo papa i lau faafofoga Fasitoo-uta ia e poto a le Tautai ae sese lana atu i ama, faamagalo le auauna. Ae faamoemoe i le Atua ia tofofi mai e le Atua ia se sui usufono e tauaveina le Nofoa o le tatou Nu. Ia o le matou tala lea faamanuia le Atua i le tapuaiga a Samoa, faamanuia le Atua i le tapuaiga a lenei Palemene, faamanuia foi le Atua i le tatou alofaiva aea le tatou faiga filifiliga, soifua ma ia manuia le Fono.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafaiga i luga o le faitauga faalua**

**FOFOGA FETALAI:** Malo faafetai saunoa i lau Afioga Leaupepe ia e manatu ua faafofoga ma le manino le tatou Maota i lenei itula o le afaifi. Ia faapena foi ona matou pale laei i lau saunoaga e le toe fesiligia foi lou tagata matua i totonu o le tatou Palemene i lenei vaitau, sa e seei atu foi i iinei i le Nofoa o le Fofoga Fetalai ia ma e manatu e le toe autalaina le tautua ua ogo aua le tautuaina o le Palemene ae le gata foi i lea o tatou itumalo. Ia o mama na tatou lafo faatasi saunoaga pei ona saunoa ai foi nisi o sui usufono i lenei aso, tatou faamoemoe ia i le Atua.

Ia Tuuu o le a lafo atu ia o lea e lava tatou minute e lelei foi le amata nei ae faauma taeao, tulai mai le sui usufono mamalu o le itumalo o Siumu lau Tofa Tuuu.

**Tofa Hon TUUU ANASHI LEOTA (Siumu):** Lau Afioga i le Fofoga Fetalai o le lauga a Tuuu e le moe afai o lou finagalo lea o le a ou lauga i le 5 minute lea e totoe ia e talosaga atu ma le faaaloalo ia afu pea le lauga a Tuuu. Ae faafetai mo le avanoa, e le toe tau faamatieina le paia o Tupua ma le eleele lenei, afioaga o Tapaau o Tamaalefale tainane le susu o le Alo o Malietoa, alalatai le Toafa, Pule ma Manuleleua, Ale ma Ulu, le pule lua le faiga ma nofoapule ae tainane le nofoa fa le Tauaitu ma le Saofaiga a Atua faapea upu ia te oe Faleata o le ituvai malosi. O paia na o le eleele Sa lenei o lo o ua usuia ai nei le fonousu a Samoa. Ae o malae tauave lava o Tiafau o tua o Malie ma Vaitoelau ae matua le tuu ia Tuisamau o le malae foi e fatufatu ai titi e malupopo ai ma lipoi ai upu o faigamalo. E afio ai lau Afioga i le Fofoga Fetalai, afio lau Afioga i le Palemia ma lau Kapeneta, afio lau Afioga i le Taitai o le Itu Agai ia aemaise o sui usufono mamalu o le Palemene o Samoa. Ou te faapai atu foi i le paia o Samoa i ou Sa le avea, o ou popo ma ou mafatutoto ma ou papa tuloto e leai lava se vave na te autalaina lou fue lavelave aua o ou paia ua uma ona tuumatamaga. Le tapuaiga a Lana Afioga Mamalu, O Le Ao o le Malo ma le Masiofo, Sui o le Fono a Sui Tofia le Faamasino Sili ma le mamalu o le Faamasinoga, le tapuaiga faifaipea a le Aiga Sa Levi o Feoi o le Talalelei o e o lo o fai tatalo mo se manuia mai le Atua aua se manuia mo Samoa ma lona Malo Tutoatasi.

O le paia lava lea i Aiga ma latou Tama, o Tama foi ma Aiga ae o se faautautaga foi i le aufue ta ma le aufueloloa o Samoa, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, o Faleupolu Tofia ma Tulatoa o Aiga. E faapea foi ona ou faatalofa atu i le tapuaiga a Ofisa Sili o Pulega ma le mamalu o tagata faigaluega uma ale Malo, Matagaluega ma Faalapotopotoga Tumaoti a le Malo o Kamupani ae a le maave eseese o le aufaipisinisi o lo o latou tautuaina le atunuu i le ao ma le po. E fia oo foi se upu i le tapuaiga a Tutuila ma Manua, le afio o le Kovana Sili le Peresetene o le Maota maualuga le Fofoga Fetalai ma le Maota o sui o le paia lava lea i le afio o Faasuaga ma le Fetalai i le Tama matua ma upu i le Faleagafulu, le afio o Aliifaatui ma le afio o alii, le Laau na Amotasi, alaalatai Tootoo o le Faleula ma upu ia te oe le Manuatele.

26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Fai mai upu o le atunuu, e ui ina pipii tia ae mamao ala, e tulilia foi le to ae maniti tino o le... ae peitai o le aso ua matapule le seuga ua sila saaga le lupe o le taeao. E ui i le mamao o le ala ma soua ma lualuta le gataifale ua afemoe le malaga a nisi o le au tulatoa o le atunuu a o lenei ua tuta ma le manuia le sa o le tatou paeaiga i le faaiuga o lenei 5 tausaga. Ia tatou faafoi la le viiga ma le faamanu i le Atua soifua o le Atua o malo ma le Atua o atunuu uma o le lalolagi.

Lau Afioga i le Fofoga Fetalai o le a muliai se upu i le tapuaiga a si ou itumalo ia ae le tele foi se faamatalaga i le Tulafono Tau Faaofi o le Faatatauina o Tupe Faaopopo 2015/2016. O lea ua taoto mai le Lipoti a le Komiti o Tupe pei ona sa lauliliuina ai ma le maeaea le Tala Faaopopo o le Tupe ma o lea ua tuuina mai ai a latou fautuaga ma iugafono talafeagai ma ua i ai le manatu tatou avea ia lea i uta ma ua ou taliaina ma le fiafia lenei Tala Faaopopo o le Tupe. E avea lenei itula ma lenei taimi ou te momoli atu ai le faafetai i galuega lelei ua maeæ ona fai aua lava se manuia lautele o le atunuu. Faafetai i le Malo aemaise o le Malo o Saina mo faleaoga, lea faatoa uma ona umusaina o le faleaoga tulagalua tele lea o lea ua i ai i totonu o Samoa i lenei vaitau, faafetai tele. Ona ou manatua lea o le auala i Tiavi e amata atu i Vailimaí . seia paia le itumalo o Sa Asomua ma Aiga, lea e masani ona lauga ai le Afioga i le Minisita mo Galuega ma taua o le auala galue o Siumu. O le aso lea ua ou tautino atu ma laæ amiotonu e saolelei le Afioga i le Minisita, e \$7miliona lea na faaalu ai e le Malo ina ia faaleleia ina ua maeæ atu afa ua tuanai atu nei, ma o lea ua ou toe vaaia ma lou fiafia ma le agaga faafetai ua amata ona suasua atu ma o le a faapena ona toe faalautele amata atu i Malifa se i oo atu lava i Siumu, faafetai i lau Afioga i le Minisita. Ou te fia avea foi lenei avanoa e momoli atu ai lau faafetai i le Afioga i le Minisita mo Galuega tetele a le Malo ia atonu o se taitaiga foi i lou faafofoga soo i faatalua ma loæ faalavelave soo atu i lau Afioga e faamanatu atu pea lea auala o si ou itumalo i Maninoa. Ae faafetai o lea ua alu alu suaga o le vaatele o lea ua tafa lou finagalo o le a faatinoina le auala lea i Maninoa, lea na vili nei mai a le toeaia mai tua, Tuuu o lea ua taunuu masini o lea ua amata ona sua le latou auala, faafetai i lau Afioga i le Minisita. Ia manuia lau palota ou te faamanuia atu ia te oe.

Ou te fia faafetai foi i le Pulega ma le Kamupani a le Silva Transport mo le tou agalelei ma le lagolago mai lea ua faasolo lava ina maeæ le matou auala i Saaga lea agai i Maninoa. Ia e ui a ina le fesoasoani mai le Malo ae atonu e i ai se aso ma se taimi, faafetai tele Sala Lesley mo le galuega matagofie. E fia avea foi lenei avanoa e fia momoli atu ai le faafetai i sui usufono o Itumalo sa tatou pulupululima faatasi i lenei Paeaiga 2011 seia taunuu mai i le 2016. Malo le galue, malo le onosai i faafitauli sa tatou faafeagai ai i lena 5 tausaga ma sou vaivaiga, ona ou fesili lea. Pe sa lelei ona tatou taitaia le atunuu i lena 5 tausaga ua tuanai atu? Po o faamalieina le tele o finagalo maæmaæ o le atunuu aemaise le tulaga o le tamaoaiga?

26 IANUARI 2016

**Tulafono Tau Faafoi o le Faatatauina o Tupe Faaopopo (Nu.1)  
2015/2016 - felafolafoaiga i luga o le faitauga faalua**

Afai sa lelei ma o lo o lelei pea, ia tatou faafoi le viiga i le Atua soifua afai foi e le o lelei pe le o manuia le atunuu lautele ia tatou sese ma lo tatou vaivai ina ua le mafai ona tatou faatinoina o tatou tiute pe afai sa tatou maua se avanoa tatou te faatino ai ae ua tatou le faia i lo tatou taimi. Ia tatou tatalo ma faamoemoe i le Atua ia alofagia le tatou alofaiva atu i le faamoemoe o le atunuu o lo o loma nei. O ai lava o le Maota nei o le a faamanuiaina i le toe foi mai o le a i outou aao lava ma o tatou lima se faamoemoega aua se manuia o Samoa mo a taeao. O nai tuualalo ma se fautuaga sei toe timata le upega, seu le manu ae tagai i le galu. O upu faatoeaiina e iloa le tautai matapalapala i lana ofe tai a lalo ae ponalia i aau mamao aua e vae fua le upega ua iloa e manulele.

Lau Afioga i le Fofoga Fetalai ia faafetai atu mo loʻu avanoa lenei ua maua sei fai ai se upu i loʻu Itumalo pele, le Itumalo o Siumu, Sagaga i Palalaua amata mai Siufaga ma Saumolia seia paia Faletele o le paia lava lea o le Faleagafulu alo o Asomua ma Aiga e lua, Tapusalaia ma Talapa, afio mai Tofaeono o le Tama Tumua ma lau Falefa, Susu Matualii le fanau alii ma le tagata e tasi, afio mai Tafilipepe, Tupuola ma Leatigaga alalatai lau Fetalai Tuu ma le tou Aiga. O oe o le moa na vini mua i le fale Tuamasaga na itu faia te oe Atua, í i le Mulivai ma le Maota o Tofiga e faaaʻe i ai le pagota, lau Afioga i le Fofoga Fetalai ua ola. Malii mai le í .. o tulafale Mano ma Faoagali, alalatai oe Liʻo ma Tafili o le fofoga o Alataua, malii mai Utaileuo ma le mamalu o le Faletolu ae tainane le tapuaiga faifaipea a Faafeagaiga ma Ekalesia i so o se fatafaitaulaga o lo o faafalelmalu aua le Atua ma Lona finagalo i totonu o le tatou itumalo. O le tapuaiga mau foi i faletua ma tausí, saoa ma le aualuma a Asomua ma le malosí o le tatou itumalo. O paia ma mamalu faataotooto na o le tatou itumalo, ia lou itumalo pele i loʻu agaga ua le lava upu o le gagana e faaleo ma faailoa atu ai le agaga faagaetia ma le agaga o le olioli aua o ai a le tagata ua e manatu mai ai. Faamalo i la outou tapuaiga, faamalo i lo outou titi faitama, faamalo i la outou tofa faatupu ma la outou faautautaga faafaleupolu i lo outou faatuatuaina pea o so outou atalii e fai ma sui usufono o le tatou itumalo i Upufai o Malo. Faafetai mo talosaga ua lototele ai ma maua ai se manatu o le auauna vaivai e fai ma o ta sao i le faaalagamaea a le tatou atunuu. E ui a ina faatauvaa ma vaivai le tagata ae sa taumafai lava i le malosí e gata ai, ou te asu atu vaimalu i puega ma ou faamalulu atu i le malosí e gata ai, ou te asu le vaimalu i puega ma ou faamalulu atu i le tatou itumalo aua e le asa se faiva ma se maumau, e poto lava le tautai ae le atoa i le liu o lona vaa. O le iuga o se mea o le amataga foi lea o se i si mea fou aua se manuia o le tatou itumalo, o oe o le itumalo e sue Malo. O lea ua tatou aga atu nei i le Faiga Palota a le Malo i le masina o Mati, o e tatalo i le Atua ina ia agalelei mai ma fesoasoani mai i le faiga filifiliga a le atunuu a ia manatua Tae o i Atua.



26 IANUARI 2016

**Tulafono Tau Faaofi o le Faatatauina o Tupe Faaopopo (Nu.1)  
2015/2016 - felafolafoga i luga o le faitauga faalua**

O se upu ua le tautamalii i lau faafofoga mai le paia ia Sa Asomua ma Aiga, ae tainane lau Afioga i le Fofoga Fetalai ma le mamalu o lenei Maota, ia natia i fatualavai ma ia alofa faatea i nuu le aina. Ia faamanuia tele le Atua i si ou itumalo, ia manuia lau tapuaiga Samoa aemaise o lenei Maota. Ia faamanuia le Atua i lau Afioga i le Fofoga Fetalai. Ia manuia le Fono. Soifua.

**TOLOPOINA**

**FOFOGA FETALAI:** Malo saunoa i le sui usufono ua faamuli i ai tuleiga o lenei aso. E talitonu o lea ua togipa tau i le ave e tusa ai ma tatou taimi faatulagaina. Malo fetalai, e talitonu foi le faamoemoe o lea ua logona le tatou Maota aemaise foi o le tapuaiga a le itumalo. E le tau fesili foi o le lua vaa seelua ma Leaupepe o lo o taoama i lena itu o le Maota. Malo le faapalepale, malo foi le onosai, malo le galulue, o lea ua faafofoga atu le paia ma le mamalu o le tatou Maota Fono, e manatu o lea ua tatou taunuu i le tatou lafo faatu o lenei aso, ua ta le itula e 7:00, ua atoa i ai le 19 o sui usufono ua saunoa i lenei aso. Ou te manatu o se taimi muamua lenei faatoa oo ai se tatou galuega i le 19 i le 20 sui usufono i se aso muamua o le taimi o le faasologa o tatou galuega. E momoli atu ai le faafetai tele i lo outou amanaia o le tatalo atu a le Fofoga Fetalai. E i ai lava le talitonuga ma le faamoemoe leaga o le Aso Faraile le aso tuupoina e faataape ai le tatou Palemene, ae a vave lava ona faatea le tatou Tala o le Tupe Faaopopo, leaga o lo o i ai foi le tapenaina o le faamoemoe o le atunuu.

O lea e momoli atu ai le faafetai tele i le paia ma le mamalu o le tatou Fonousu i lenei aso, i le paia o sui usufono i alii ma tamaitai faipule sa sausaunoa i lenei aso, malo malele faafetai saunoa. Ona i ai lea o le talitonuga, o le a tulitulimatagau le ufi a Sina i le aso a taeao e tusa ai foi ma le tatou lafo faatu lea ua i ai tatou te amata i le 9:00am ó 1:00 ona tatou toe amata ai foi lea i le 3:00 ó 7:00 . Afai lava tatou te alu i le tulaga lea e i ai le tatou Fono, ona o lona uiga e tatau ona tali le tatou Malo i le afiafi a taeao, ona tatou malolo ai lea, tapenapena lelei a tatou mea mo le afiafi o le Aso Tofi, ona tatou toe potopoto mai lea iinei i le faaumaina o le tatou Fono. O le tatalo lena e tuu atu pea i tafatafa, o lau maitau toe i le sui usufono e le i saunoa, ona tali lea o le tatou Malo i le aso a taeao pe a talafeagai e taitai i ai lo outou soifua i le manuia.

E faafetai atu i le faafofoga mai a Samoa i so o se tafa e fia tupu ma ee, o tamalii ma failauga, le tapuaiga a Samoa aoao i ona tulaga faalupe, malo le tatalo i le aufai tatalo a le atunuu ua ae ma le manuia faiva o le Palemene i lenei aso, talu lau tapuaiga mau ma le tatalo a tatou feagaiga taulagi. Faafetai atu foi i le paia ma le mamalu i Ofisa Sili o Pulega o Matagaluega ma le Ofisa o le Loia Sili, ma Matagaluega eseese uma ua tatou faatasi i lenei aso, malo le tauatai malo foi le afifio mai ma tala mai o aao. E i ai le talitonuga o le a tatou toe faatasi faapenei i le aso a taeao e toe faauau ai le Fonotaga.

*26 IANUARI 2016*

**Tolopoina**

Ae le i faaiuina le tatou Fonotaga i lenei itula afiafi, ou te tatalo atu i le Afioga i le Minisita mo Galuega, Felauaiga ma Atinae Eseese, tulai mai lau Afioga i le Aoao Fesoasoani e faaiu mai le tatou Fono ona tatou tolopo ai lea.

*Na tolopo Taulumaga a le Fono Aoao i le itula e 7:10 i le afiafi, seia aulia le itula e 9:00 i le taeao o le Aso Lulu, 27 Ianuari 2016.*